

**SPEAKER** : Mi chung a khawngaihna nei lo chu khawngaihna tel lovin rorel sakin a awm ang; khawngaihna hi rorelna aiin a chungnung zawk a ni. (Jakoba 2:13)  
Starred Question No. 21-na zawt turin Pu Sailothanga Sailo i lo sawm ang.

**PU SAILOTHANGA SAILO** : Pu Speaker, Starred Question 21-na zawhnate chhan harsa lo tak a nih ka ring a. (a) Serlui 'B' Project hi engzata generate tur nge ?  
(b) Engtika zawh beisei nge ? (c) State sector a ni em ? (d) A tira estimate engzatnge ? tih leh senso tawh engzatnge ni a leh a zawh theih nan engzatnge la ngai ang tih ka zawt e.

**SPEAKER** : A chhang turin a changtu Chief Minister zahawm tak Pu Zoramthanga ilo sawm ang.

**PU ZORAMTHANGA CHIEF MINISTER** : Pu Speaker kan Member zahawm tak Pu Sailothanga zawhna chhanna chu (a)-na kha, a power chak zawng a kha engzatnge a generate theih ang tih a kha M.W. 12 pechhuak thei tur a ni a, a technical a an han ziaknaah hian kumkhatah hian G.W.H. an ti a, chu chu Gigawatt Hour an ti a chu chu 35 a ni anga, tin seasonal tlem laia GWH 11 pechhuak thei tur tih a ni a, hei Giga hi maktaduai tihna a ni awm e. Amaherawhchu hei hi chu a technical em a, kan hriat thiam theih tur zawng khan M.W. 12 a siam theih tur a ni a. Tin, a zawh theih hun tur kha tuna kan han beisei dan chu kumin December hi a ni a. Amaherawh chu operational tak tak meuh tur hi chuan December-ah hian kan zo hman angem aw kan ti deuhva. Hei hi a tira kan han tum a chu December thla hi a ni phawt a, kan khum deuh chu a ngai mai awm mange tih kan ngaihtuahnaah a awm a. Tin, State sector a ni em ? tih kha chu, ni e, heta a power siamchhuah zawng zawng hi midanga pekchhuah ngai lovin State-ina kan pumbilh liau liau tur a ni e. Tin, a tira estimate zat hi vaibelchhe 85.81 a ni a. Tin, senso tawh zat hi vaibelchhe 86.41 a ni a, tin, la ngai zat hi vaibelchhe 48.79 a ni e.

**PU SAILOTHANGA SAILO** : Pu Speaker, zawhbelhna. 1-na, Serlui 'B' Hydel Project atan hian compensation engzatnge pek a nih ? tih leh pek loh an la awm em ? 2-na Serlui 'B' khuah a nih dawn khan Builung khua chu insawnchhuak tura hriattir an ni a hriat a ni a, an insawn chhuak ta em ? insawn chhuak ta se khawiah nge an awm ? Sorkarin tanpuina, chhawmdawlina engtingge a pek tak zel ? tih leh he project hi peih lo ni ta se unit khat engzat man tur nge ? tih leh Sorkar hian Electric ..... bill tihsan a tum em ? tih kha ka'n zawt belh duh bawk a ni.

**PU ZODINTLUANGA** : Pu Speaker, zawhbelhna. He Serlui 'B' Hydel Project an zawh hnu hian Teirei Hydel Project ang hian Sorkar hian private hnenah hralh leh a tum em ? tih a ni a. A pahnihnaah chuan, December thlaa zo tura ruahmanna an neih hian a khawl leh engine vel hi engzat percent vel nge a hmun thleng tawh tih kha a ni a.

**PU ANDREW LALHERLIANA** : Pu Speaker, ka lawm e. Zawhbelhnan kan Minister, Power & Electricity changtu chhan atan. Hei Serlui 'B' chungchang thu hmalakna hi lawmawm hlein ka hria a. Hma pawh chak taka lak niin a lang. Chutih laiin a lian zawk Tuirial Hydel Project Mega Watt 60 pechhuak thei tur kha engtingge a awm tak ? Hei hi shelled a ni ta nge ? Mi thenkhat sawi dan chuan compensation demand-tute khan an demand kha surrender ta selangin, chhunzawm leh theih a ni ang tihte kha a awm deuh a. Kha kha an surrender thei hram lawm ni ? kha kha chhunzawm leh tura hmalak theih dan a awm lawm ni ? tih kan zawt duh a ni e.

**PU LALRINLIANA SAILO** : Pu Speaker, zawhbelhna. Compensation chungchangah award no. 3-ah khanin kan han hmuh danah thil fello a awm teuh mai a. Lalmangaiha s/o Pu Lalnunsanga, Pu Lalkhuma fapa, Pu Darchhingpuia tihte hi, a pian hmaa LSC hi lo nei tawh niin hei kan hmu a. Tin, khung Thingdawl ramahte kuanin LSC thuhmun mi pali ina ram khat kawh rawn tihte a awm a. Hei a tam mai a. Compensate chungchangah hianin diklo pui pui a awm teuh mai a. Hei hi Sorkarin siamthat leh enthat leh a tum em ? Tin, Tuirial Hydel Project kan hre tawh a. Compensate avangin a buai a. Khu khu chu buai tawh lo hram se kan ti a. Chu chu kan Minister

zahawmtak hian min tiam thei em ? tih leh hmanni, tun thla ni 6 khanin Maicham Hydel Project a hmunah kan han kal a. An thawhrimnate a chhuanawm hlein ka hria a. Chutih rualin, khi pawh khi nichina Buarpu bialtu zahawmtakin a sawi ang khanin hralh tur anga ruahman zinga tel kha a ni a, amaherawhchu, thawktute Power & Electric Department tena khi khi chu an ui beh avanga zawrh ve loh ta niin ka hria. Serlui 'B' Hydel Project pawh khu khawngaihtakin hralh loh ni hram turin he House min tiam thei em ? tih ka'n zawt a ni.

**SPEAKER** : Ngawi rawh, pathum, paliin in zawhbelh tawh a, han chhang phawt sela, chuan a tul ta ngang a nih leh i ti ang aw.

**PU ZORAMTHANGA CHIEF MINISTER** : Pu Speaker, kan member zahawmtak Pu Sailothanga zawhna kha, compensation hi pek zat engnge ni ? Pek lohte an awm em ? tih kha tihfel kim a la ni lova, crore 5/crore 6 thelh chu pek tawh a ni a. Amaherawhchu, tunah khuan engemaw fello chinfel tum a la awm a, tlem a zawng, kha nen khan a zat chiah chu nakinah a la hriat theih ang a. 5.9 crore vel chu pek tawh a ni a. Amaherawhchu, tlem chu tihbelh a la ngai ang. Tin, kan Member zahawmtakte zawhna kha han chhang chhonzawmin compensation-ah helai hi a fello engemaw tunhma atanga pass lo inthuah leh, an tihna diklo engemaw awm ni a hriat a ni a tih kha - Nia, compensation hi fello tam tak awm thei, kan pass pek dante inthuahte awm thei a nih avang hian khalai kha a D.C. concerned-te Revenue concerned ten chinfel tumin nasa takin hma an la a. A tlangpui thu chuan kan tifel thawkhat viau a. A bang tlem tihfel loh deuh hlek a awm a, tunah khuan tihfel tum a ni a. Helai hi chu harsa lutuk awm lovin kan kal theih kan beisei.

Tin, a cost of generation hi unit khatah Rs. 2.70 vel ni tura chhut a ni.

Tin, Builung an insawnehhuak em ? tih kha insawn turin tunah khuan tih an ni a. An in tur hi khutah Kolasib bul Bawktlangah khuan hmunpek an ni a. An vai deuh thaw khuan in chu an nei deuh vek tawh a. A then hmun dangachte an awm duh a. Tichuan an in tur a tam ber chuan an nei deuh vek tawh a. Tun thal chhung hian an lo chhuah theihna turin kawng pawh siam a ni a. An lo chhuah theih vek kan beisei a ni.

Tin, Tariff bill tihsan tum a ni em ? tih kha chu tunah mai chuan tumna a awm lo a. Amaherawhchu, a hniam lam ai hi chuan khawvel thil man a san ang zel hian tihsan hun pawh a la awm zel ang chu.

Tin, Pu Zodintluanga, kan Member zahawm takin a zawhnaah khan 'private-ah hralh tumna a awm em ?' tih a ni a. Tum lo kan hralh ngai lova, chuvangin heng Tuipang a ni emaw, a nih loh leh hmun dang dang heng kan tih reng reng hi chu a maintenance erawhchu outsource kan tih ang deuha, tu company-in emaw maintain a, khatia agreement siampui erawhchu a hlawk a. Chu chu tunlai khawvel kal dan pangngai a nih avangin hralh lovin, entirnan, Power Project pakhat kan siam ta a, kha kha keimahniin kan enkawl kha chuan Sub-Division pakhatin emaw enkawl zel a ngai a, sawmli sawmnga emaw pahnih khat kan siam chuan Sub-Division emaw engemawzat khan enkawl vek kha a ngai ta a.

**PU LALRINLIANA SAILO** : Hralh thei lo mahsengin a enkawltu, hnamdang hnena han dah laiah khanin han zawh duh ka nei a. Maicham Project-ah ni 9.1.1996-ah an hawng a, tichuan kumlinaah a man an her chhuak tiin vawk talhin an lawm a, kan hriat danin, kumli a ni tawh a, 1996 atanga vawiin chu 2007 a ni tawh a, kumli chhunga a man an her chhuah chuan, kan Engineer-ten an ti thei lawm ni, engahnge hnamdang hnena an dah ?

**PU ZORAMTHANGA CHIEF MINISTER** : Ngawi rawh, Pu Speaker, ka la chhang zo lo a nih kha, tunah Mini Hydel Project pakhat Mega Watt thum siam thei kan siam zo ta a, entirnan, khami enkawl tura keimahni Power Department vekin kan enkawl dawn chuan Sub-Division emaw, SDO ho emaw a group khat khan enkawl a ngai ta a. A dang kan tih zel a, chuti zel chuan hetah kan Power Department-a thawktu zawng zawng kha maintain nan a zo vek anga, hma la tur an awm dawn lo niin ka hria. Project kan ngah poh leh an fai vek a ni mai. Chuvangin, khami kan Member zahawmtakin a sawi, a tir kumli chhungin kan lachhuak tih kha, a enkawltute hlawn kha chhut tel loh a la ni ta a ni. A enkawltu Sub-Division maintain-na kha a to em em a ni. An hlawn leh thil dang zawng zawng a kha. Khati veka kan tih chuan a hlawk lova. Chu ai chuan hetah unit khatah chuti zatin kan lo lei anga. Engtirnan, kan hralhna kha unit khatah Rs. 2/3 lo ni ta se, Rs. 1 in emaw Sorkarin kan lei anga, in maintain ang kan ti a. Heta a Sub-Division emaw a enkawltu zawng zawng kha Project tharah an vaiin kan hmang tel ta a ni. Hetiang zel hian Central Sorkar pawh khuan kal turin min duh a, kan Sorkar pawhin kan duh a. Entirnan, kan tih theih chu Sipaiin ram lain a front-ah an kal ta a. An hneh sa kha, a Sipaite khan enkawl ta zel se, raltu tur an awm lo reng reng a ni. Chutiang chiah chuan tunah pawh Power Department-in a enkawlna an tih zel chuan a Power Department pahnih/pathum tun ami an strength ang kan tih loh chuan Project a tam zel khan a tih theih loh reng reng.

Chuvangin, hei hi chu a maintenance kha, contract-in agreement sign-in kan tih tir a, nasa takin a hlawk a. Hei hi Central Sorkar pawhin min duh dan a ni a, keini pawhin kal zel kan tum dan a ni. A hralh a hralh kan tum lo, a enkawlina a kha a maintenance a kha contract sign-in chu chu kan tihdan a ni. Tin, khawl kha khutah Bhopal-ah siam zawh tawh a ni a, a lokal chho mek a. A then chu a lo thleng tawh a, a lo la thleng kim lo deuh hlek a, kha kha tuna kan dunhmun chu a ni.

Tin, Tuirial Hydel Project compensation an surrender thei em ? tih kha compensation vanga buai a ni lova, compensation vanga buai angin an CMD hmasa Sharma khan vawi 2/1 khutah Power Ministry-ah a sawi a, Power Secretary Ahi-a khan Mr. Sharma awm lai ngeiin midang pawh an awm laiin hetah hian a project-ah vaibelchhe 800, pariat a ngai a ti a, compensation tur a hi tuna inpek tawh sa 4 crore leh tih a ni a, a vai pawh hian 23.24 crore vel a ni a, hei hi 3% pawh a tling lova. Compensation vanga problem nei angah chuan insawina chi a ni lo tiin.....

**PU LALRINLIANA SAILO** : Pu Speaker, June ni 9, 2004 leh August ni 13 inkara Bandh an siam avang khan hna a kal thei lo a nih kha. Engtingge chutianga an sawi leh mai ?

**PU LALDUHOMA** : Pu Speaker, Chief Minister nauin hna chhunzawm thei lova, hlawhfa ruaia Bandh siamin, ni 60 chuang a dan beh tir avanga hawng ta, buai ta a nih kha, engahnge hei hi tunah hian a zep ? Session hmasaah pawh a pawm kha.

**PU ZORAMTHANGA CHIEF MINISTER** : Pu Speaker, zep leh zep loh a awm lova, chu ka sawi vek a, ka la sawi zo lova. Tuiriala Compensation hi tuna pek tawh hi crore 4 leh 5 inkar vel a ni a. Tin, an project tuna an mamawh a ni a, NEEPCO-ina an rawn chhawp a hi crore 800 chuang, 806 atanga 808 inkar bawr vel a ni. Chuvangin, chumi crore 4 vel an pek tawh la bang crore 16 emaw crore 17 emaw la awm avanga Project tawp a nilo tih hi Power Secretary ngeiin an CMD hnenah keipawh ka awm lai leh midangte pawh an awm laia a tih a ni. Chuvangin, hei hi a chhan a ni lova, a tira estimate ang kha a nih loh lutuk avangin crore 808-in tunah pawh kalpui an tum a, chu chu khawi atangin nge pawisa kan hmuh theih ang an ti a. DONER atangin tihdan a awm thei lawm ni, Mizoram Sorkarin min pui thei em ? an ti a, an pek theih che u chuan tha kan ti khawp mai tiin hei hi hmalak leh tur a ni.

Tin, chulo lehah chuan Pu Lalrinliana Sailo zawhna kha chu ka chhang tawh a, compensation fello hi Sorkarin en that leh a tum em ? tih a kha chu nichinah ka chhang tawh a. Tlem fello a la awm a, chu chu tunah khuan an ti mek a, pa 4/5 lek a ni a, a thente phei chu Court-a kal an awm tho a, chu chu kan han tihfel theih kan beisei, Court- ami erawh kha chu Court-in a rawn tihfel theih hun hun a nih chu.

**SPEAKER** : E...a.....i ti tlat si a leh..... zawt ta che..... Pu Lalthlengliana..... a tawpna ni rawh se aw.

**PU LALTHLENGLIANA** : Pu Speaker Crore 808 chuangah compensation hi Tuirial kha an han sawikai chho zel a, 2.87 chauh a ni a, a tlem hle a ni 2.87% a ni a, heta compensation late hi Revenue lam atanga ka hriat danin 98 hmalama Sorkarina a hmu tur a lo duan fel vek tawh a ni a. Tunah a thara he Sorkar dinglai hianin compensation a thara pek pakhatmah a nei lo tih hi a dik em ? Hei, Revenue Minister ngei pawh a awm a, hei hi chiang takin min han chhang fel sela, a lawmawm ngawt ang.

**PU R. LALZIRLIANA** : Pu Speaker, Tuirial compensation peknaah hian tun Session-ah ngei pawh hian khami compensation an lakna huan pass kha ka dil a, a number-te min pe thei lova, hei hi engeni a chhan ? compensation-ah maktaduai/vaibelchhe tel an pe tawh si a, engatinge min furnish theih loh, tih kha ka zawt duh a ni.

**SPEAKER** : Ngawi rawh, i duh tawk ang, Serlui atangin Tuirial in kai tawh a, a tawpna atan tak tak vawi thum thum tih zawng, nichinah i zawh tawh kha, tawk rawh se ti khan, i duh tawk ang.

**PU ZORAMTHANGA CHIEF MINISTER** : Pu Speaker, a facts and figures nen no. nena pe tur chuan Serlui 'B' ah kan kala, Tuirial kha chu a figure lam kha ka nei lova, engatinge pass min pek theih loh tih lam a kha chu a question kha khalamah kan lo inbuatsaih loh avangin kha kha chu nakinah kan Member te pawhin khami relevant a kha chu.....

**PU R. LALZIRLIANA** : I unauten maktaduai, vaibelchhe tel lai an la a, a permit chu an pek theih lohna chhan chu eng nge kan ti a lawm maw le.

**PU ZORAMTHANGA CHIEF MINISTER** : Pu Speaker, kan unauin vaibelchhe tel kan la lova, mi 100 telin an lak zawng zawng pawh crore 4 leh tih a ni a, unau 26 pawh kan nei lo hrim hrim a. Pu Speaker, khang kha zawng..... let thum deuh thaw a revised a ngaihna chhan kha tunah chinfel an tum mek e. Pu Speaker.....

**SPEAKER** : Pass lam kha chu nakinah Revenue Minister-in a tih hunah kan la chai dawn nia..... Le, i duh tawk ang aw, a chian dan dan chuan a Chiang a, mahse i duh tawk ang. Starred Question 22-na zawt turin Pu Nihar Kanti Chakma i lo sawm ang.

**PU NIHAR KANTI CHAKMA** : Pu Speaker, ka zawhna Starred Question No. 22-na Social Welfare Department Minister zahawm tak chhan atan (a) How many number of Anganwadi Centre providing Pre-School Education are there within Tlabung Constituency ? (b) Is there any proposal for providing Anganwadi Centre in every Village Council within Tlabung Constituency ? (c) If so when ? (d) If not why ?

**SPEAKER** : Pu R. Tlanghmingthanga, Minister i lo sawm ang.

**PU R. TLANGHMINGTHANGA MINISTER** : Pu Speaker, Pu Nihar Kanti Chakma zawhna chhanna - (a) There are 37 Centres providing Pre-School Education within Tlabung Constituencies (b) There is a provision for establishment of Anganwadi Centre not only in every village but in every village having no V/C . Where more than 40 children below the age of 6 years are available. (c) The provision is for all times even if regular Anganwadi Centre cannot be established private Anganwadi Centres can be established with the help of the villagers concern. (d) Non-establishment of Anganwadi Centre is mainly due to non cooperation from the villagers.

**PU H. ROHLUNA** : Pu Speaker, Lungphunlian khua hian 2005 atang khan Anganwadi Nutrition hi vawi l chiah kan dawng an ti a. chu chu Minister zahawm tak hian min lo enfiah sak thei ang em ?

**PU LALRINLIANA SAILO** : Pu Speaker, zawhbelhna. Khawhai khaw chhungah khianin an rawn pem thlak san nual tawh a. In 20/50 dawn lai an la awm a. Tahkhian Anganwadi Centre l a awm ve thin a. A chhe tawh em em mai a. Vawkte an riak thei a, min sak sak thei angem ?

Pahnihnaah, tunkum hianin naupang te te Anganwadi-a kalte tana vitamin chaw tha tur semnaah kan siamte, Multi-Vitamin an sem zingah Protivit tih hi Lungdar atangin Biateah an rawn supply a, a thi tawh a. He damdawi hi nikum July kha expiry date a ni a. Hetiang hi sem tawh lo se kan va duh em. Hei hi engtika supply nge kan hre lova, tun January ni 18/19 a Biate thleng a ni. Tam tak zingah hei hi kan rawn present a ni, he thil hi. Hetiang hi thleng ngai tawh suh se. Naupang hrisel lo an siam dawn a nia. Damdawi thi supply hi a tha lo. Kan Minister hian tun hnuah thleng tawh lo turin min tiam se ka duh a ni. Hei hi House ka present a ni.

**PU R. LALZIRLIANA** : Pu Speaker, hei Anganwadi Centre te, Creche Centre te, Zoram hmun tan takah a awm a. Social Welfare Department hian an thawk tha viau thin a kan hriat laiin thingtlang hmun tam takah Social Welfare Board hnuai Creche Centre-te hian lawmman an lo dawn ve thinte kha an hmu thei ta lova. Tunah hian 140 chuang khar mai duhte pawh an awm tawh a ni. Tichuan 2005 - 2006 pawisa



cheng nuai 38 bawr vel lo kalah khan nuai 12 chauh released a ni si a, a dang zawng kha khawiah nge a kal tak tih hi kan Minister hianin a lo chhuichhuak thei em ?

Pahnihnaah chuan nikum June/July thla vel atang khan Field Worker-te hi thingtlangah an hmu ngai tawh lova, heng hi zin tawh loh tur tih order a awm nge tih hi ka zawt duh a ni ? Chutiang a nih lai chuan an zinna tur pawisa kha hman vek niin a lang a, kan Minister hian a lo chhui chhuak thei em tih ka zawt a ni.

**PU R. TLANGHMINGTHANCA  
MINISTER**

: Pu Speaker, Lungphunlianah nutrition 2005 chhungin vawi khat chauh dawn a ni tih kha ka duh aiin min hrilh har deuh hlek a. Kan Member

ten thil diklo a awm a nih chuan min hrilh thuai thuai thin ula action pawh kan la hma thei ang. Chumiruala kan sawi duh chu, Member-te pawh min venpui turin ka duh khawp mai. Nutrition hi kan dawng tha a, Central Sorkarin min pe tha a, chumi avang chuan item leh sem dan tur pawh hi Central Sorkar duh dan angin kan ti theiin kan hria a. Lungphunliana 2005 chhunga vawikhat chauh an lo dawng tih kha kan lo en nghal ang a, a tul angin action pawh kan la ang chu.

Tin, Anganwadi Centre kha Khawhai khaw chhungah a dang dah belh a tha awm e tih a rawtna kha naupang sawmli chuang awmnaah chuan Anganwadi hawn theih a ni a, chu chu Central Sorkar pawhin minrawn beisei dan a ni. Kuminah pawh hian 90 hawn theihna tur minrawn phalsak a, khaw khatah chuti zat awm tur ni ringawt lovin, mihring zat a zir khan tih theih dan kan nei a, chungte pawh chuenzui theih turah ngai ila.

Tin, Vitamin kha July, 2006-a expiry date kha, tam tak zingah khan a tlangpuiin kan Nutrition semtu leh a thawktute hian renchem takin an sem a, chutah chuan a duh tena an mamawh ang a kha an pek bakah a chuang a lo awm thin a. Tin, expiry nei an ni a, chumi a nih chuan an sem duh chuang lova, Biate a expired tawh ni a an hriat kha a pechhuak tuten an pekchhuah leh an lo dawn inkarah eng ang chiah nge tih a hriat lohva. A pechhuak tute lamin an pekchhuah lai khan a expired ka ring lova. Amaherawhchu, renchem taka a tul anga a mamawhte hnenah an sem a nih lai khan a chuang a lo awm a nih kan beisei. Tichuan tunah zawhna chhan in duh loh chuan ka chhang lo mai anga, min chhan tir phawt la. Tichuan Anganwadi Worker-te khan Pu Speaker, zawhna chhan a duh loh chuan ka tawp mai anga, ka tawp mai anga pawikati lova. Amaherawhchu, ka sawi tluan duh erawhchu kan Health Worker-te khan an sem lova, expire a nih avangin an sem duh ta lova, an sem duh tak loh zinga mi kha kan MLA hian an han la a nih ka ring.

Tin, Social Welfare Board Member zahawm tak Pu R. Lalzirliana zawhna kha Social Welfare Board hnuai khatianga pawisa an sem bang a awm a ni awma a rawnsawi a kha, kha kha helai Anganwadi Centre chungchang nen khan a in tu lo deuh a, ka rawn inring lova.

Tin, Field Worker an tih Border Area-a Field Worker an ti thin a kha a zawhna nen a inang ém ? ka hre lova. Helai Central Sorkarin an rawn tihtawp tak avangin chu chu hun rei tak kum 10 chuang lokal tawh a kha tunah chuan Anganwadi Centre-te leh thil dangte a tam ta a. Hetia Border Area-a a bika project-a kha an rawn tihtawp avangin hmun danga an ban rual ruala bang tur an nih lai khan, khata thawktute khan Department hrang hranga kokhawmin khang ho kha semdarhin Department hrang hranga an thawh zui theihna ngaihtuahin absorve ve an ni ta a. Tin, khamite kha a hranpa a awm tawh lovin an awm niin ka hria a.

Tin, zawhna laia hi a general keima hriat dan a nih avangin a dik lo thei mai thei a, Field Worker kha ka rinchhan a ni a. Field Worker-a thawktu turte an tihtawp a ni mai awm mang e tih chu ka ngaihtuahnaah a lut a. Amaherawhchu, Social Welfare ten Board atanga an sem lai a hi Central atanga an lo enkawl leh Board-te hi an sem leh sem loh lai a hi keini chuan kan zu monitor pui lova, hei hi keini chuan a tak tak kan zu khawihpui lova. Board ho hian an khawih thin a. Chu chu detail-in kan hre mai thei lova. Engpawh niselangin, khalai lokal a kha nuai 24 awm si, sem zawh loh lai rawn sawichhuah kha thil engemaw erawh chu semchhuah theih ka beisei.

**SPEAKER** : Starred Question No. 23-na zawt turin Pu Lalhmingthanga i lo sawm ang.

**PU LALHMINGTHANGA** : Pu Speaker, Starred Question 23-na Trade & Commerce Department changtu Minister zahawm takin min chhan atan Mizoram Tlabung - Kawrpuichhuah kaltlanga Bangladesh nena Border Trade hi Mizoram Sorkarin tan thuai a tum em ? tih ka'n zawt a ni.

**PU AICHHINGA MINISTER** : Pu Speaker, Member zahawm tak Pu Lalhmingthanga zawhna kha, Mizoram leh Bangladesh inkar Tlabung leh Kawrpuichhuah kaltlanga Border Trade neih thuai hi Mizoram Sorkar chuan a tum a, kan theihtawpin tan kan la a. Mahse, he thil hi Ram pahnih kar thil a ni a, keini State Sorkar thuneihna hi a ni vak lova, in hriat theuh angin Central leh Bangladesh Sorkar thil a nih avangin kan duh ang ngawt chuan kalpui chu a har khawp a. Chumi rual chuan he House ka'n hriih duh mai mai chu Bangladesh Sorkar lam an mumal hleihtheih lohna avang khuan a changin kan han lawm viau a, a changin beiseite a bo leh thin a, chutiang karah chuan kan awm avangin duh angin Sorkarin hma a la chak hlei thei lo a ni tih kha kan chhan theih tawk a ni deuh mai a ni.

**PU LALHMINGTHANGA**

: Pu Speaker, zawhbelhna. Heite hian a inlaichin vek tho a ni a. Lunglei ka bialah thlakhat aia rei mah ka va cham a, chutihlai chuan thu pakhat

rawn awm chu, hemi Border Trade buatsaih chhohna atana pawisa sanction tawhah khan building sakna tur nuai 106 aian a tam hret mai thei, kha kha pawisa sanction tawhah khan Administrative Building sakna tur nuai 106 kha hetah Zokhawthar lamah divert tum a ni e tih kha a rawn sawi a. Tichuan, Chhim bial chhantu kan tih pawh, NGO leh Political Party hrang hrangte in kokhawmin hei hi divert loh nise tiin Sorkar kha an rawn kar a ni a. Chutah chuan kan Sorkar khan chumite ngenna chu ngaipawimawhin hemi pawisa hi a ngaiin awm leh se tiin a hma thu kalpui chu an han chhut leh ta a, an lawm viau a. Chuan tuna sawlaia mipui rilrua lian deuh mai chu, engpawh lo nise Bangladesh lam hi a inpeih chiaah lo a nih pawn Central Sorkar nen agreement lo awm tawh a, inhrethiam tlanga, heng sanction hi lokal a ni a. Khami an sanction rual khan Meghalaya lamahte pawh Pu Speaker, khung Doki lamahte leh Tripura lamahte hetah Manipur lamah Myanmar-te nena dawrna tur khang ang kha tam tak kha a keng a ni a. Chuti a nih chuan Administrative building-te pawh hi sak chhoh a, tunah kawng pawh P.W.D. in deposit work anga an thawh chhohah an thawk zel ang hian kalpui theih niseng an duh viau mai a, an thinlungah kha kha a lian viau va. Chuan Bangladesh hi a in ready theih hun hunah helama harsatna awm lova Border Trade hi hawn theih nghal mai a nih theihna turin, chutiang ang zawng chuanin sum leh pai lo awm turah hian kan Sorkar kut ami nisiah hianin kan Sorkar hian hma a la thei mai ang em ? tih ka'n zawt duh a, pakhatnaah.

Pahnihnaah chuan enge ni integrated point tih angte ri nawk nawk a awm a, a awmdan a kha min zawta ka sawifiah thiam mai chuang lova kei chuan. Assembly-ahte pawh kan han zawt anga, engang thil proposal thar a awm chuan kan Minister-te pawn mipui hriatah an hrilhfiyah thei ang chu mawle tih angten tawngkam ka lo thlah ve a. Chutiang ang thil engemaw proposal thar deuh hlek chulaia thil awm thei tur awmte a awm em ni ? chungte chu a awm chuanin min hrilh theih chuan a lawmawm ngawt ang.

**PU AICHHINGA  
MINISTER**

: Pu Speaker, Member zahawm tak Pu Lalhmingthanga'n a zawh belhna kha a dik a. Kha pawisa nuai 106 kha hmundanga hman mai kha kan han

tum a, hman kan han tumna chhan a pawh kha han sawifiah law law ila a thain ka ring a, inhrihfiyahna hun dang hi a awm vak lova. Kha pawisa kha 2001 - 2002 a sanction awm daih tawh a ni a, mahse kan hman thei lawk lova. A chhan chu, Bangladesh inpeih hleihtheih leh avanga khulaia in tawl sak ringawt a kha kan tui vak lova. Chutih lai karah chuan Central Sorkarin Plan thar a rawn nei ta a, khumi atan khuan Bride ho kutah a estimate leh a engkim a kha a dah a, chu chuan tunah hian enge an rawn estimate dawn a, engangin nge ruahmanna an rawn siam dawn tih kha kan hre hlei thei rih lova. Amaherawhchu, a pumpui estimate kha an siam dawn niin a lang a, chumi laiah chuan kha pawisa nuai 106 kan han tih a pawh kha

ASIDE-ah hian an amalgamated ta vek a. Chumi an amalgamated avang chuan ASIDE kuta fund a pawh kha a awm ta tlat a. Chuvang chuan Kawrpuichhuah pawisa pawh kha a ni tawh chuang lova, ASIDE ho fund kha a ni ta tlat a. Amaherawhchu, Kawrpuichhuah atan chuan a hranpa liau liauin Bride atangin estimate thar siama hmalak tum a ni a, chu chu Central-in a Bride Company kha thuneiha a pek tak avang kha a ni a. Chuvang chuan an pawisa la awm ta hrim hrim a kha hei Trade & Commerce pawisa pawh kha a ni hlei thei lova ASIDE-ah an amalgamate ta vek a ni. Chuvang chuan kan beisei dan mai chuan Central atang pawhin Bride ho hi chuan plan mumal tak tunah hian an rawn tichhuak tan dawnin kan hria a. Chuvangin hma kan lo la ngawt ngam angem ? tih kha sawi a har viau a, Bangladesh Sorkar hi tunah pawh hian han sawi mai mai ila House-ah chuan, he Border Trade chungchang thuah hian Trade imbalance an ti a, Bangladesh-ina India atanga an lakluh leh Bangladesh-in India an pekchhuah kha a imbalance tlat avang khan India nena Border Trade neih hi an interest lova, chuvangin an inthlanna turah pawh India lo thei ang bera an inelna khu a lian a. Chuvang chuan Sorkar thar a piang a, ngaihtuahna thar a piang a nih loh chuan khulai kalphung khu a nih dan tur sawi thiam a har ta rih khawp mai. Chu chu tuna Bangladesh Border Trade chungchang thua kan dinhmun chu a ni.

Amaherawhchu, kan Sorkar leh Central Sorkar lam chuan neih talh tum chuan tan chu an la mek zel a ni tih kha ka'n sawi theih chu a ni mai e.

**PU LALHMINGTHANGA** : ASIDE tih kha engnge ni a spelling chu le ? A lam pum/chhuah a awm em ?

**PU AICHHINGA MINISTER** : ASIDE a nia, a long form chu ka hrechiang chiah lo.

**PU LALHMINGTHANGA** : Kha kha hemi Border Trade thil atana implementing Agency thara Central Sorkar-ina a appoint tihna ami ?

**PU AICHHINGA MINISTER** : Border Trade lampang a ni vak lova, Industry lam thil a ni mah mah zawk a ni. Khavang khanin pawisa kha an dah ta tlat a ni.

**PU LALDUHOMA** : Pu Speaker, zawh belhna. Hei Mizoram atanga Export leh Import kan tih ve theihna tur hnaivai deuha kan theihthe chu Zokhawtharte,

Tlabungte an ni mai a. Tlabung phei hi chu bul tanna a rei tawhin beisei angin tun thlengin a awm thei lova. A chhan chu kha kan hre tawh a. Hemi chungchanghian kan Sorkar hian Bangladesh High Commissioner-te pawh dawrin. Bangladesh Sorkar leh India sorkar hnenahte pawh thlenin, an tui vak lo a nih pawhin a nawr dan azirin keimahni lam atang hian hmalak tawh an nei em ? Neih an tum em ? Hman atang tawhin India leh Bangladesh inkarah thlai chi hrang 30 chuangah Border Trade a awm reng a. An buai kan hre lova, an duh lohna pawh kan hre ngai lova. Chuvangin, he kan insumdawnna tur kawngah hian nawr deuh an ngai a nih pawhin kan Sorkar hian engangin nge hma a lak tih ka'n hre duh a ni.

**SPEAKER** : Chhang turin Minister ilo sawm ang.

**PU AICHHINGA MINISTER** : Pu Speaker, nia kan Sorkar chuan englaipawhin kha kha a duhthusam leh a thil tum chu a ni reng a. Kan Chief Minister pawhin a zinin

Bangladesh High Commissioner-te midang dangte pawh a bia a. Tin, Bangladesh-a India High Commissioner pawh lo kalin helaiah thusawipuina thui tak a nei nghe nghe a. chutah pawh chuan High Commissioner pawhin theihtawp ka rawn chhuah ve ang a ti a. Chutiang khawp chuan Bangladesh hi, keini Mizoram Sorkar level atang chuan kan phak tawh chuan kan nawr reng a ni. Amaherawhchu, kan sawi tawh bawh, problem-ah khan kan awm tlat avangin rin aiin hma a sawn hleih theih vak loh a ni.

**SPEAKER** : Starred Question 24-na zawt turin Pu R. Lalzirliana i lo sawm ang.

**PU R. LALZIRLIANA** : Pu Speaker, Information & Public Relation Department changtu Minister chhan atan - (a) Kum 2006-2007 financial year chhung hian chanchinbu leh periodicals hrang hranga Sorkar advertisement pek chhuahna turin Information & Public Relation Department hian sum a indaih em ? (b) 2006 - 2007 emaw a hma kum ami emaw advertisement man leiba a la nei em ? (c) A nei a nih chuan engzatnge a neih tih leh eng chanchinbu periodical hnena ba nge tih ka zawt e.

**SPEAKER** : Chhang turin Minister zahawm tak  
Dr. R. Lalthangliana i lo sawm ang.

**Dr. R. LALTHANGLIANA  
MINISTER** : Pu Speaker, kan Member zahawm  
tak zawhna (a) A pawl khawp mai, a  
indaihlo tia chhan a ngai a. (b) Neilo  
tih a ni (c) Eng chanchinbu emaw  
periodical hnenah mah leiba a neilo tih a chhanna a ni.

**PU R. LALZIRLIANA** : Pu Speaker, a lawmawm e, kha leiba  
an neilo a. Ka zawhbelh duh chu.  
Chanchinbu mite hi Sorkar atanga  
advertisement an hmuhte hi  
Chanchinbua chhuah theihna ram leh hnam tana rawng an bawl theihna a lo ni ve a.  
Hetih lai hian pawisa tlem thamte si Kolasib-ah te, Champhai-ah te, Saiha thleng  
pawh a ni ang chu an advertisement bill thehluh leh va draw-a kalte hi a ngai thin a,  
hei hian hun a heh hle mai a. Hetiang lo hian Information & Public Relation atangin  
advertisement hi semchhuah a ni tho a, advertisement semtu Department-ah hian  
pawisa chhunkhawm a, centralise-a tih hi a tha mai lawm ni ? Chu chuanin nasa  
takin Chanchinbu mite a pui dawn niin a lang a. Tin, ram leh hnam tana hun tam  
zawk an ni pawh hian an hmang thei dawn niin a lang a. Chuvangin Information &  
Public Relation hian bill an pek theihna turin Sorkar hian hma a la thei em tih ka  
zawhbelh duh a ni.

**Dr. R. LALTHANGLIANA  
MINISTER** : Kan M.L.A. zahawm tak rawn sawi  
kha a dik khawp mai a. Information  
& Public Relation bikina kan bill pek  
tur chungchang bik a kan chhanna a  
ni a. Bill awm lo tih kha ka sawi duh a. Amaherawhchu Department thenkhat han pe  
tlai deuhte an awm thin a, chu chu kum tel te pawh pe lo kha an awm thin a,  
khalai harsatna kha an tawh thin a. Chumi avang chuan kumin kumtir khanin Pu  
Speaker, Head of Department ho zawng zawngte kan lo ko khawm a, tuna kan  
M.L.A. zahawm takin a rawn rawtna ang chi deuh pawh kha kan agenda-ah kan dah a.  
Department hrang hrang hian Information & Public Relation-ah hian an advertisement  
sum neih a hi chungkhawm ta sela, keini hian buaipui ta ila a tha zawk lawm ni ?  
tih kan Mizoram Journalist-te pawhin rawtna an nei a, chungte pawh chu ngaihtuahna  
kan nei a. Amaherawhchu, han final mai dawn khan eng eng emaw thil kal phung  
enfel ngaite pawh a awm a. Khati zawnga ngaihtuahnate pawh kan nei a, meeting-te  
pawh ka hovin kan nei a tih ka sawi duh a.

Tin, a thu hrimin ka'n sawi belh duh a chu indaih lo tih lai a hi kumin kumtira kan inhmukhawm pawhin Department hrang hrangina hemi kan advertisement tihna tur atana kan sum dah hi a bei tham khawp mai a, a then chuan kum 1-ah Rs. 10,000/-(singkhat) bawr vel dahte an awm a, kan bei tham hle a ni tih kha kan sawi duh a. Chuvang chuan kan duh dante pawh Sorkar lamah kan thlen a, advertisement lam hi a pawimawh a, publicity a pawimawh a, heng atan hian sum tam zawk hi dah theih ni se kumtharah tihte MJA lampang pawhin an duh thu an sawi a, tunah hian a pumpuiah 1% pawh hi kan budget atang hian a tling lo niin ka hria a, chu chu Department hrang hrangte dinhmun pawh kha a ni tih he House hian min hriat sak sela tan lak kan tum mek a ni tih ka'n sawi duh a ni.

**PU K. LALRINLIANA** : Hei Information & Public Relation hmanrua a thuam chhoh a nihna a la bei tham ang reng hle mai a Camera leh thildang chi hrang hrangah. Tin, lirthei hi an nei mumal lo a, Kolasib angahte pawh kan District Officer PRO te hian lirthei an nei lova an buai em em mai a, hemi kawngah hian chutiang zawnga thuam that tumna a awm em ? tih ka'n zawt e.

**PU LAL THANHAWLA** : District hrang hrangah Information Officer-te an han dah a. a lawmawm hle a. Hman deuh khan Serchhipah an dah ve a, hmeichhe pakhat, staff a nei lova, engmah an nei lova, an awm ngawt a, hmanni lawk khan an lachhuak a. Kolasib-ah an dah leh ta a. Engtin nge Serchhip khi tih zui zel an tum ?

**Dr. R. LALTHANGLIANA  
MINISTER** : Zawhbelhna hmasa zawk kha kan chhang anga. Mizoramah District 8 kan nei a, kan District 8 angah hian PRO te dah a tul a. chumi kawngah chuan harsatna a bik takin mobility tul em em mai Department kan ni a. Kan sawi thin a, kan hotute pawhin an hre viauin ka hria a. VIP movement-te, national day-te khang 2.2. a engkima mawh latu kan nihna kawngah vehicle Pu Rintea zawhna kha a pawimawh kan ti a. Chuvangin, tunhnaiah phei chuan pahnih khat chu kan lei ve ta niin ka hria a. Privatise-ah pawh hian telh loh hram teh u kan ti a, engemaw chen hriatthiamna pawh min nei thin a, kan nei chho mek a ni tih kha ka sawi duh a.

Tin, kan District hi District thar te te a ni a, kan la tiphuisui lo khawp mai a. Tuna opposition group leader Pu Lal Thanhawla zawhna pawh kha District Public Relations Officer kan han dah zawk a,

mahse tunah hian indaih lohna avangte pawhin kan la insiamrem hman lova, khaihlahk deuhin a awm a. Engpawhnise, tunah hian PRO post hi post 4 ka hriatsual loh chuan a ruak hnawh khah loh kan nei a. Aizawl-ah hian pakhat chauh a awm thei lova. Minister-te leh kan VIP, kan Governor-te tin, Department Headquarters a nih vek avang hian engemaw zat an awm a lo ngai nen heng hnawhkhah ran hi tul kan ti hle mai a. Tunah hian Sorkarin a Department ang pawhin hmalak mek a ni tih kha ka chhanna ni mai sela.

ngaihtuahna kan nei chho mek e. Serchhip chungchang bik pawh kha

**PU R. LALZIRLIANA** : Pu Speaker, ka zawhna leh min chhanna kha a dik hlel deuh hlek a. Chanchinbu mite pek tur hi Sorkar Department hian leiba an nei tam tihte, kha kha ka rawn tum tak a ni a. Information & Public Relation Department hi a semdarhtu an nih tho avangin chutiang chuan leiba hi an ngah em em mai a. Sorkar Department hrang hrang hian hei hi Chief Secretary, Sorkar hnathawk lu ber order-ah chuanin ni 15 chhungin bill an thelhuh atanga ni 15 chhungin payment hi pek tur a ni tih a ni a. Hei hi Department hian an palzut hle mai a, hei hi chu a diklo a ni, he order hi engatinge palzut a nih tih kha, khawng zawka ken theih a ni lawm ni tih kha ka`n zawt nawn leh duh a ni.

**Dr. R. LALTHANGLIANA  
MINISTER** : Pu Speaker, a dik khawp mai. Khang chungchang pawh kha Head of Department kan kohkhawm nachhan tak a ni a, tawngka pheh chuan kan innawr nasa a. Tun hnaiah pheh chuan engemaw chen chu a zia deuh a, mahse Sorkar ang pawhin tuna thil awm a kha lo execute kan tum dawn nia.

**SPEAKER** : Starred question 25-na zawt turin Pu Sailothanga Sailo i lo sawm ang.

**PU SAILOTHANGA SAILO** : Pu Speaker, Starred Question 25-na - (a) 2007 - 2008 chhung hian Survey Institute hawn tumna a awm em ? (b) Awm ni se engtikah nge hawn a nih ang ? tih ka zawt e.



**SPEAKER** : Chhang turin Land Revenue & Settlement Department changtu Minister zahawmtak Pu B. Lalthlengliana ilo sawm ang.

**PU B. LALTHLENGLIANA MINISTER** : Pu Speaker ka lawm e. Kawnpui bialtu zahawmtak zawhna (a)-na chhanna chu 'Awm e' a ni a. (b)-na chhanna chu hmalak tan mek chauh a la ni a, a hawn hun tur chin ala hriat loh tih a ni e.

**PU SAILOTHANGA SAILO** : Pu Speaker, ka lawm e. Zawhbelhna pawimawh tak he Survey Institute atan hian pawisa engzatnge ngai anga. kum 2007 – 2008 atan hian engzatnge pawisa dah belh a nih tih ka'n zawt duh a. A dawt lehah chuan he Survey Institute hi hawn lo ni ta sela, Revenue Administration bik atan engnge tangkaina tur tih leh eng eng training theihna tur nge he Institute-ah hian awm ang tih kan zawt e.

**PU B. LALTHLENGLIANA MINISTER** : Pu Speaker, ka lawm e. Kumin Budget-ah hian nuai 10 token-in kan dah a, mi an pawm sak ngei kan han ngai a. Tin, Mizoram pawisa a a bul tan tum a ni lova, Central lam dawr a ni a, Central lam rinaiin a lo inhawng viau va, crore engemawzat min lo sawi hmuh tawh a. Mahse, Central-a Joint Secretary-in a hmun turte rawn en ve phawt a duh thu a sawi a. Chumi a rawn en hnuah chuan a sanction chu kan ti dawn nia tiin thu a delhkih sak a. Chutiang chu tuna Institute hawn kan tumna thil kalphung chu a ni a.

Tin, Department-in engnge tangkaina a neih ang tih erawhchu, hei Surveyor ho hi Hyderabad-a Training-in vawi engemawzat kan tir a, an Training man hi a to em em mai a. Chumi a nih avangin kan State Sorkar hian he Training Institute hi nei ve ngei ila tha a hriatna kan nei a. North East State thenkhat pawh hian an lo nei deuh vek tawh a, a la nei lo awmchhunte zing ami kan lo ni a. Chuvangin hei hi nei ngei ila tha kan ti a, hei vanduinana kan tawk a, Revenue Department hian kan Surveyor-te pension-a chhuak mek leh thihna avanga min kalsan ta mi 17 lai kan nei a. Chutiang chuan Training chhuak sa neih si loh chuanin, Training lo a lak theih ngawt bawk si lova. Phai lama intirh a hautak bawk si a. Tunah pawh hian hei, mi 50 tirchhuah tur kan Chief Minister zahawmtak hnenah kan dil a, mi 25 tirchhuahna turin sanction min pe a. Hyderabad-ah training an bei mek a, May thla hian an rawn zo turah kan ngai a.

Chung training ho pawh chu an training man kha a hautak khawp a, Rs. nuai 70 leh tih chuang mi 25 tan sanction hmuh a ni. A chhan pakhatat chuan kan ram tana relevant subject lem lo, a pangngaia an zira kan ram chhunga kan hman tangkai lem siloh, thil tam tak an zir thin a kha tula kan hriat lem loh vangin kan ram chhunga kan mamawh chin chauh subject condensed course-in kumkhat zir tur kha thla 6 chhungin min zirtir ula, kan tih avangin a training man kha a to leh zual a. Tin, chumi hnuah chuan kan Director ten neighbouring states-ah a training-na tur hmundang an zawng leh a, Guwahati-ah khuan tunah mi 25 training-na tur hmun kan hmu a. Chung chu a nih avangin a hautak lutuk dawna kan hriat loh avangin he Training Institute hi din ve ni se kan ti a. Kan tum danah chuan a pawisate la nei chiah lo mah ila, tun financial year chhoah hian Secretariat, Khatla amite luah theih a nih chuan Directorate Building chung, Department dangina min luah sak, an kalchhuah san hunah hawng ve rawih ila tih kha kan ngaihtuahnaah a awm a. Chu chu, tuna hemi Training Institute chungchanga kan ngaihtuahna kal mek chu a ni e.

**SPEAKER**

: Awle; Question Hour a tawp a, tunah chuan List of Business ang hian kan kal zel anga. Vawiin hi Friday a ni a. Kan hriat theuh angin Private

Member's Business kan chai ni a ni a, vawiinah hian Private Member's Resolution kan sawi dawn a. Tun tumah hian Private Member's Resolution 43 kan dawng a. March ni 14 khan Ballotting tih a ni a. Chutah chuan 10 ballot chhuah a ni a, a indawt dana kha Bulletin Part - II-ah khan kan rawn chhuah tawh. Pakhatna chu, Lalchhandama Ralte Resolution a ni a, hetiang chiah Resolution hi 4-na, 5-na leh 9-naah khan kan hmu bawk a ni. Hei, Pu Lalchhandama Ralte hi a Session vawikhatnaah Governor Address, vote of thanks a move a, Private Member's Resolution-ah a Resolution a chhuak bawk a, a vannei hlein ka hria.

He House-ah hian rei tak chhung pawimawh tak nihna a chelhzuite pawh hi kan duhsak theuhin ka ring a. Vannei chungchuangte zingah a telin ka hria. Le, tunah Pu Lalchhandama Ralte a Resolution "Border Fencing hi Indo-Bangladesh chauh pawh ni lovin Indo-Myanmar Border pawh fencing ti turin Central Sorkarah nawr ni rawh se" tih hi move turin i lo sawm ang.

**PU LALCHHANDAMA RALTE**

: Pu Speaker, ka lawm e. Vawiinah ka Resolution thehluh, kan ram kan hnam kal zel tur atana pawimawh tak mai "Border Fencing hi Indo-

Bangladesh chauh ni lovin Indo-Myanmar Border pawh fencing ti turin Central Sorkarah nawr ni rawh se" tih pawhchhuaha a lo awm leh sawihona hun tha min siam sak avangin lawmthu ka'n sawi hmasa duh a.

Kan hriat tlan angin Border chungchang, International Border chungchanga thuneitu hi Central Home Ministry. Ministry of Home Affairs-te an nih avangin State subject, helaia kan thuneihna a ni lova, kan State tana tha tur si hi chu Central-ah thlen/nawr ngai a nih avangin he House zahawm tak hian Resolution hi passed a, Home Ministry lamah kan hotutena an umzui tura kan tih hi a tha a ka hriat avangin he Resolution hi ka han thehltut a niin, chutiangin kan hotu dangte nen pawh inang tlangin Resolution atan kan nei a ni.

Pu Speaker, kan sawi hmasak duh, kan House-a kan member zahawm takten an hriat hnu pawh ni mahselangin information thenkhat atanah helai chungchang a hi han sawi tel duh hmasak ka nei a. India Sorkar hian Border Fencing hi an ti tan chhova, a hmasa berin Indo-Pakistan Border Fencing an tichho a, chumi chu a hlawhtling a tiin kawng chi hrang hranga insurgent group hote emaw tin, chutiangin foreigners lo lut illegal imigrants hote danna chungchangah te Law & Order kenkawhna chungchangahte pawh hetiang anga tihah hian Pakistan side lama a tih chinah hian hlawk thlak a ti a, Home Ministry pawh a lawm viau a. Chutiang chuan a phase-II-na atanah pawh Indo-Bangladesh Border Fencing hi Central Sorkar hianin a rawn tichho leh a, tunah hian Bangladeshi te avangin India ram tam takin harsatna kan nei a, chungah chuan heng Border Fencing-te pawh hi Central Sorkarin ama sensoa rawn tiin tun hunah pawh hian West Bengal, Assam, Meghalaya, Tripura leh Mizoramah pawh Border Fencing hi Central Sorkar Home Ministry hmalaknain kan neih chho leh mek a ni. Chungte han en chuan Mizoram, a bik takin Bangladesh leh Myanmar-te nena in ramri kan nih avangin Bangladesh side chauh mai hunga a zau zawk huanpal lehlam pang hung ve loh hi kan Ram kan Hnam kal lehzel tur atan a him lova hriatna kan neih avangin he House zahawm tak hian Central Sorkarah thlen hi kan tih makmawh niin ka hria a ni.

Pu Speaker, tuna Mizoram chhunga Border fencing kan neih mek Indo-Bangla Border fencing kan neih mek hi tawite in kan Resolution tihfiah zualna atan pawh kan hmalak chin leh kaldan phung hi han sawi hmasak ka duh a. Mizoram leh Bangladesh Border hi 318 Km a thuiin kan in ri a, chu chu a hungna senso atan hian Home Ministry hian vaibelchhe 656 sanction a rawn neiin chumi hung hna chu Contractor firm pali tunah hian a thawh chhoh tir mek a, tin, he Border fencing a tih mek hrulah hian paralel road a siam a, chu road chu truckable road kan tih truck engkim tlan theihna fencing bulah hian kawngpui tunah hian ruahman chhoh mek a ni. Hei hi tunah hian thui tak kan kal chhohpui a ni a. State Sorkar hian thui tak thu kan neih loh leh Central subject anih avangin a lehlamah Central-in State chhungah thil tha tur a rawn tih avangin a third party angin kan State Sorkar pawhin tunah hian kawng chi hrang hrangin Central Sorkar hmalakna a lo thawhpui a, a survey tihnaah te tin, a hmun hma a harsatna eng engemaw awm mihringin an lo luah tawh mek mihring han sawnchhuah ngaite mi huan lo ram compensation pek tur chungchanga, a hlut zawng han tehpu leh a buaipui hi State Sorkar a kan District Magistrate-te kan D.C. ten an area-ah tunah hian an buaipui chho mek a ni. Tin, tuna hmalakna vang hrim hrim hian Western Belt-ah Bangladesh

nen kan in rina lama hung phui kan ni a, kawngka mumal tak Sorkarin a siam a, chu kawngka mumal takah chuan security force-te an dina an kal hian kan Ram kal zel turah Bangladeshi (Bengali) kan tihte Chakma foreigners-te kan rama lo lut chho tur danna atan pawh tha tak mai a ni tih a lang a.

Kan hriat tlan angin Bangladesh awmna a hniam a, tui a chim chin lo sang zelin kum 2050 chho velah phei chuan Bangladesh portion tam tak khu tuipuiin a chim tawh dawn avangin mihring tam si, a chheh vela in seng hawi tur hote helamah mihring kan la thawlna lamah deuh pawh an lo kal hlauhthawnawm thuahei hi venna tha tak nia a lan avangin khulai a Border fencing kan neih mek a khu a tha hlein a hriat a. Amaherawhchu, thil tha tak tak kan tih rual hian a man han pek then ve ngai keini pawhin engemaw han chan ve ngai deuh te, tin, a hnaivaia Border hnai vaia awmte pawhin an chhungkua anga han tawrh ve deuh engemaw an eizawna thin han kalsan ngaite pawh a awm a ni. Amaherawhchu, hei hi Sorkarin a enpui chho mek bawk a ni. Tin, Pu Speaker, Mizoram bik hrim hrim hi international boundary kan neih Bangladesh leh Myanmar nena kan in rina international boundary hrim hrim hi 722 Km Mizoramah kan nei a. Ka sawi tawh ang khan Bangladesh nena kan inrina hi 318 Km a ni a. Myanmar nena kan inrina vawiin Resolution-a kan rawn putlul hung ve atana kan rawn rawt a hi 404 Km a thui a ni.

Tin, Central subject Border chungchang hi a ni kan tih ang khan tun hunah pawh kan state-a kan hmuh leh kan hriat angin Bangladesh leh Mizoram kan inrina Border ven leh enkawl hi Border Security Force (BSF) kan tihte kuta awm a ni a. Myanmar leh Mizoram inkar kan Border venhim hi Assam Rifles-te kuta awm a ni a. Kan state Police-te hian Border management cell-te insiam vein a tul ang leh State tana tha tur angin a remchan dan angin Outpost-te siamin an enkawlpu ve mai chauh a ni. Chutiang chu a nih avangin vawiinah hianin he 404 Km hmabak a la awm hi hung tel hi a tha hlein a hriat a ni.

Tin, India ram pumpui han thlir pawhin India ram hi Myanmar Sorkar nen hian 1643 Km inri chhova. Mizoram chan hi 404 Km a niin a bak 1239 Km a ni a. Chu chu Manipurah te, Nagaland-ah te, Arunachal-ah. Hetianga India Sorkarin Border fencing hi Pakistan side-ah leh Bangladesh side-ah a tihchhoh hnu hian a policy rukah hian a nei chho emaw chu aw, a tih theih a. Indo Myanmar sectoral meeting an neih pawh khan Border fencing chungchangte hi an sawi chho ve tawh a. Chumiah chuan Myanmar nena kan inrina lampangah pawh enchinna atan pillar No. 79 – 81-ah bul tan ila, an ti a. Chu chu Manipur Moreh bul tuna Border Trade kan neihna bulah hian bul tan an tum a. Chumi bak chu khawilam atangin nge kan tih tan leh ang, tiin ngaihtuahna a lo kal mek a, a nawr hun lai tak pawh nia lang a ni. Tin, Mizoram lampang side-a kan border hrim hrim pawh hi tunhma deuh nikum 2006 chhung khan Ministry of Home Affairs-a border cell Director Pu M.C. Tiwari leh a hote, a team member pathumte khan Mizoram pawh rawn tlawhin kan border hrang hrang hrul velte pawh an rawn enfiah tawh a ni a. Hengte han en hian Central Sorkar hian border hung hi a tum chho ni pawhin a lang a. Tunah hian keini Mizoram rorel khawl sang hian Central-in

a tum mek laiah hian Km 1600 laia thui awm siah hian a bul tanna hmasaah he Assembly hian India Sorkarin policy pakhata a neih mek hi kan State lam atangin han tan ta che u, tia kan lo welcome hi a fing hmasa, a remhre hmasa kan nihna tur niin a hriat theih a ni.

Tin, Indo-Myanmar border Trade hi hung a tul riaua ka hriatna chhan kawng tam tak a awm a. A hmasa ber atan chuan Mizo mipuite tan a him dawn a ni. Chu chu a chhan chu dan lova lo lut tam tak Mizoramah an awm a. Khawchhak lam atangin foreigners an identity pawh kan chian loh an lo kal hnem em em a. Chungte ho chuan Mizoram chhungah crime tam tak an rawn comit a, crime rate a san phah em em a. Pawngsualte, rukrukte, tualthahte, lirthei Bike rukte a tam em em a. Border fencing a awm si loh avangin Km 404 zeta inri siah an duhna zawn zawnah an chhuak a, kan Police ten han um thin mahse, an duh duhna zawnah an put ru a. Zalen niin an inhria a ni. Kan rama harsatna tam tak kan neihah hian khilam atanga lo kalte hi tam tak a langsar zawk niin a hriat a. Tunah Border Fencing kan nei a, mumal taka a chhuahna awm, a gateway mumal tak kan siam a, chu gateway-ah chuan Police-te, tin, Border Security Force a ni emaw, Assam Rifles leh Mizoram Police-te an duty-na hnuaiah chuan mihring kan identified thei zung zung anga, engti tura lo kal nge an nihte pawh kan hmu chiangin, an let leh dawnah pawh engkim chiang takin kan ti thei dawn niin a hriat a. Tin, ralthuam tawlh luh smuggling of arms and ammunition-te, puakthei thil dang tam tak tawlh luhna hi khawchhak lam atang khian Sorkar mumal lo zawk deuhte awmna leh tin, a chhak lampangah China ram atangte, hmun hrang hrang atangin hel ho tam tak hnen atangin mi tam takin ralthuam an la lut chhova, chung chu a kalkawng remchangah Mizoram te hi an rawn hmang chawk niin a hriat a. Kan Police chhuanawm tak tak ten ralthuam thahnem tak tak, State danga hel hote hnena pek turte emaw. Pakistan ISI kan tihte hnena pek tur emaw, khawi khawi ami emaw an lakluh kalkawngah helaiah an hman fo avangin henga an pal fo chuanin henglaiah thlah thinte pawh neih ve theih a nih avangin kan ram Security atan hrim hrimah pawh hei hi ngaihtuah a tulin a hriat a.

Tin, ruihhlo tawlh luh drugs trafficking hi a nasa em em a. Golden Triangle lam atanga lo chhuk thla helaiah hianin awlsam taka Mizoram mipuite ralmuang tak peaceful state kan ti a, ralmuang taka kan awm lai hian heng thilsual ti thin hote hian min rawn pal zung zung fo thin niin a lang a ni. Chung laka kan ram, kan hnam kal zel turah kan thalaite an himna zawk tur leh India lairil lamah te, khawvel hmun dangahte an pekna tur kalkawngah hmang baw mahse Zoramah tam tak, an paltlang na na na chuan an thlahthla thin a. Chung chuan kan hnam kal zel tur, kan ram kal zel tur, kan future kan thalai rualteah pawh harsatna min thlenin chhungkaw tam tak buaina min siam sak niin ka hria a.

Tin, chubakah chuan terrorist-te, insurgent group kan tih tam tak, helhote chet velna a awlsam phah niin a hriat a. Home Ministry pawhin a sawi fo angin Myanmar side-ah hian engemaw zat India ram ami helhoten training camp nei fo thina hriat a ni a. Chung ho chuan khawi khawi atangin emaw an lo luh nikhuain Mizoram lamah, a him lamah te kal khanah

rawn hman theih a awm fo niin a hriat a. Ramri hung a nih si loh chuan chung ang zawng zawng lokal thinte, a chang chuan Myanmar Sipai ngeite pawh an ralthuam nen tlanbo a Myanmar Sipai ten an rawn umzui a, kan ramri depa awmte, khua leh a vel lo neitute pawh tiralkhelin hun tam tak an rawn hmang fo tawh thin a ni. Chung ang zawng zawng han ngaihtuah hian, kan ram kan hnam him zelna atanah hian Border fencing hi kan tih makmawh a ni dawn lawm ni tih hi ka rilruah a lian em em a. Tin, Border fencing kan ti a, kalkawng mumal tak khawchhak lam atanga lo chhuk turte nen inkalpawhna gate tha kan nei a nih chuan a lo lut leh a chhuakte hnen atangin Sorkarin tax lain revenue tam tak, revenue earn nan he Sorkar kal zel tur atanah pawh tha tak Central Sorkar custom lamin an lak piah lamah State atang pawhin lak tur tam tak kan nei turah ka ngai a. Hei hi kan State tanah tha ngawih ngawihin ka hria a ni.

Tin, vawiin niah hian keini ho Legislators-te kan ram kan hnam kal zel tur tana thil tha ngaihtuahtu tur kan nih angin vawiin niah hian he border fencing chungchanga Resolution kan pass hi kan tih makmawh niin, kan duty lian tak niah ka ngai a. Chumi tur chuan vawiin niah kan Member zahawm tak takte hemi hi min pass pui ngei turin ka sawm bawk che u a. Tunah hian Border Trade nichinah zawhna hun kan hmanah pawh kan kalpui tawhte han en khan Border Trade Zokhawthar lamah tunah kalpui chhoh mek a ni a. A hlawhtling chho tan viau a. Chutianga Sorkar pawhin a kalpui mek laiin khawi khawilai sirah emaw ramri hung a la nih loh avangin smuggling thil a lo kal fo thin a. Kan ram tan him lo tam tak a lo kal thin. Border Trade kan neihte hlawhtling zawka a awm a, sumdawng hote pawhin mumal zawk leh Sorkar pawhin hlawk zawka thil engkim kan kalpuina atanah thain ka hria a.

Tin, Central Sorkar hian Look East Policy a ti a, khawchhak lam ngaizawng zawngin kawng engkimin tunah hmalakna a nei mek a ni. Chu Look East Policy avang chuanin nakinah chuan Border fencing kan tih hnuah gate mumal kan neih chuan India ram lairil zawk atangin Myanmar ram dawrtute an ni emaw, khawi khawi ram dawr turte, chhak lam kal tur ten helaiah gateway mumal zawka an rawn hman theih turte a la ni dawn a. Governor Speech, hmannia kan ngaihtlakah pawh khan Tidim thlengin BRO, Border Road Organisation ho ten land survey-te nei tawhin tunah hian laih chhoh tum mek a ni. Kawngpui lian tak tih tum mek a ni tihte kan hmu a. Tin, chhim lamah Akyab. Siltwea an tih tak lawngchawlh hmun pawh tunah hianin Look East Policy avangin tihpuitlin tum, lian tham takin nikum lawkah kan Commerce Minister Jairam Ramesh-a lo kal pawhin tih thuai a ni dawn e a rawn ti a. Hetiang hianin foreign ram lehlam zawkte nena kan inkalpawhna tur leh sumdawna kan kalpui tur, kan kawngpui tr thate tunah hianin a induang chho mup mup a, chutianga kallaia he ram tana roreltuten kan ram kan hnam himna tur atana kulhbang chikhat border fencing kan lo tih hma hi kan ram tan kan tihmakmawh a ni dawn lawm ni ka ti a ni.

Awle, Pu Speaker, ka Resolution Border Fencing hi Indo-Bangladesh chauh pawh ni lovin Indo-Myanmar Border Fencing hi he House zahawm takin lungrual taka kan pass chuan kan Sorkar hotute Home Ministry lama a hlawhtlinna atana dawrtu turte tan pawh an kut kan tihchak ngei ka

beisei a. Tin, he House, i dinglama thute leh i vei lama thute pawhin kan theih ang chin chinah hemi hlawhtlinna atana nawr zui hi kan kovah a awm a ni tih hi he House Resolution kan pass chuan kan ken tel dawn chuan kan ram kan hnam tana tha hi a takin kan lo chhuah theih ngei ka beiseiin tunah hian he House zahawm tak hian min pass-pui ngei turin ka sawmin ka ngen a ni e. Ka lawm e.

**SPEAKER** : Le, tikhan Resolution neituin a rawn move ta a, kan sawiho anga, kan sawiho zawh chuan a dangah kan kai zel anga, Private Member's Business-ah hian tlai dar 4 pel lo turah inngai ila. Kan sawiho ang nge kan pass mai ang. A nih tih dan pangngaiin minute 10 inpe ila tha kan ti tlang mai em ? Aw le, Pu A.B. Chakma hi a la sawi ve lova, a rawn phar a, i lo sawm ang u.

**PU A. B. CHAKMA** : Pu Speaker, ka lawm e. He House zahawm takah M.L.A. ka nih hnuah vawikhat ka sawina a ni a. Tin, Mizotawng hi ka thiam em em lova, amaherawhchu ka thiam ang angin sawi ka tum ang e. Engemaw sawi thiam loh emaw sawi sual palh a awm chuan min hrethiam turin kan M.L.A. zahawm tak tak ka rawn ngen lawk a ni.

Hei tuna "Indo-Bangladesh Border chauh ni lova, Indo-Myanmar Fencing pawh hi Border Fencing ti turin Central Sorkar nawr ni rawh se" ti a Pu Lalchhandama Ralte-in a Resolution putluh kha a tha ka ti a. A chhan chu hei hi a bik takin Indo-Bangladesh border-ah chuan no. 1-ah chuan a remna insurgency kan tih ralthuam tawlhru, smuggling of arms, ruihhlo tawlhruk, drugs-trafficking leh dan lova India rama luh illegal immigration tihte ven nan chuan a ngaiin a tul a ni. Hei hi chu kan hre theuh a, a bik takin heng hi Chakma issue chungchangah chuan dan lova India rama luh tih hi chu sawina a awm a, hei vang hian tuna Indo-Bangladesh Border Fencing an tih hi an zawh chuan engemaw chen kha chu min dal dawn tih kha chu a chiangin ka hria a.

Tin, Indo-Myanmar fencing sawi hmam Border Indo-Bangladesh fencing chungchanga sawi duh ka neih chu, tuna District pathum, Mamit, Lunglei leh Lawngtlai District-a an tih meka hi Contractor-te entirnan, BRO te, NBCC, EPIL te an ni a, kan Chakma District Council huamchhungah he Contractor an tihte hian a then chu an zo ti tih tawh a, a then an la ti mek a, chutiang bawkin District dang pahnih Lunglei leh Mamitah pawh an ti a. Amaherawhchu, Central guide-lines ang hian he Contractor-te hian hna an thawk lo nge tih hi ka hre lova, hetah NBCC-a Ministry of Home Affairs a sawi ang khan, "NBCC shall be responsible for liaioning with the state government local authorities for acquisition of land and getting forest and environment clearance for carrying out the

fencing and related work. NBCC shall finalised the alignment of defencing in consultation with BSF and District Magistrate of the area where the fencing is proposed" kan hriat danin heng Contractor-te hi Deputy Commissioner chu an pe tho nain engemaw official-a tihfel hmam hna an thawk tan a, tin, District-ah chuan Deputy Commissioner in verification team niawm tak a ni. Amaherawhchu, khami tihfel hma hmam compensation leh land acquisition tih leh Sorkar atang pawhin order mumal awm lo mahse, hna an thawk chhunzawm a. Tuna Tlabung, LLI District, Mamit District lamte leh keimahni Lawngtlai District lamten khulai Border Area-awmte chuan an hrethiam lova, an mangang a. A then chuan in an tichhia a, Leilet te, Fruit Bearing Trees te an tichhiain kawng an lai a, compensation Sorkarah an tih leh kan ti mek an ti a. Local verification an ti tawh niin ka hria a, Mamit District-ah chuan compensation ruahman cheng nuai thum singriat sang kua leh sawmnga tih a ni a. Amaherawhchu, hei hi eng chi nge ni, a thenah chuan Chakma District Council huamchhung ni lo, Lunglei leh Mamit District-ah chuan LSC hi an nei tlem a, a tam zawk chu V/C pass leh periodical pass nei an ni a. Chu chu Land valuation kha LSC nei lo tan chuan Sorkar tan pawh a Land Valuation Measure tur chuan thil harsa a ni thei a. Mahse, nuai 3 chuang an tih chi engtiang zawngin nge an chhut ? Land Valuation nge ni a, anmahni in tihchhiat man ? tih hriat a la ni lova. Nakin zel atan engtia pek tur nge Sorkarin hei hi clarification a pek theih lawm ni tih leh khaw thenkhat te chuan Border Fencing chu pawnlam a nih vangin in leh lo hmam pawh an nei lova. Hei hi Sorkarin a compensation lai kha puih tur ni awm tak a ni a. Chu chu engtinng e Sorkarin hma a lak dan tih an la hre lo a ni. Chuvangin a buaithlak em em a ni tih hi ka hriatpui a.

Hemi chungchangah hian Lunglei leh Mamit-ah hian tunah Contractor-te thawk tawh lo turin an ti a, an buai em em a, an mangang a ni. Deputy Commissioner hnenah pawh an thlen tawh niin report an pe a ni. He compensation-ah hian kan State Sorkar hian inrawlhna a neih avangin a compensation lai tak leh re-settlement lampang tifela compensation hi pe thei se chuan ka lawm khawp ang.

Kan ti thei anih chuan Indo-Bangladesh ai mahin Indo-Myanmar hi a tulin ka hria a, a chhan chu hel leh thil dang dang hi khu lampang atangin a tam zawk niin a lang a ni. Chuvangin IBB fencing rualin Indo-Myanmar border fencing pawh hi a tulin ka hria. He Resolution, Pu Lalchhandama Ralte in a lo move hi ka MLA pui ten pass-pui turin ka sawm duh a ni. Pu Speaker, ka lawm e.

**PU S. HIATO**

: Pu Speaker, vawiin kan thil sawi hi a thalo lampang pawh sawi ka tum lova, Central Sorkarin ngun takin a ngaihtuah tawh a, border fencing hi a policy awmsa a ni. Manipur chu Burma nen an in ri avangin Burma an fercing leh a ni mai a. Policy neihsa zu pass hi a sawngsawhlawt angem tih ka ngaihtuah a ni.



Tunah hian Bangladesh hi priority pek zawk avanga tih mek a ni a, hemi zawh hi chuan Burma-ah a kai chhoh mai ka ring a ni. Helaia hah taka lo chai chi emaw ni dawn le kati a ni.

Tin, Border fencing awmsa hi Tlabungah te Marpara-ah te keimah ngei pawhin ka tlawh tawh a, kan Home Minister khan thu a tiamin ka hria a. Mahse, tun thleng hian en a la ni lova. a lan danin. Hna an thawk a, mipui a hmuna cheng ho an harsa em em mai a, kan hriat theuh angin yard 150 vel India ram chhungah fencing kha tih a ni a, pawnlama awm ho zawng kha India ram atangin cut chhuah a ni a, fencing a awm tawh lova an lo lut thei dawn lova.

Tin, in neite, huan neite, lo neite Chakma hi a bik takin lui dunga riah chilh kha an ni mai a, khang ho kha compensation tur ngaihtuah sak hmasa lova hna an thawh tir ta mai hi tha ka ti lova.

Tin, Revenue Department lam pawh Deputy Commissioner-te hi compensation turte, Land requisition turte pawh hian order an tichhuak lo te pawhin kan hria a, chu chu a pawl em em mai a. Sawta awmte saw an harsa em em mai a ni. Pu A.B. Chakma sawi ang khan mi tam tak Contractor pawh thawh tir lo turin an nawr a, tunah hian a thawk thei lo te pawh an awm a ni. Chulai chu kan Sorkar hi border fencing-ah hi chuan kan indawr lovang an ti ta nge ni ? Enquiry-te pawh tih a hmunah te pawh tlawh mup mup tawh awm tak a ni a, tih hi House-ah hian ka sawi duh a ni.

Tin, chu bakah kan forest ram hi tam tak rin chhuah a ni ta a ni. Marpara-ah te chuan Km khat lek lek an hungna hi India ramah a ni a, plantation tam tak an siam tawhna kum 30/40 plantation an siamte kha, pawn lamah a awm vek dawn a, keini tan te pawh hi an enkawl theih tur an ni lova. Bangladesh atan pawh enkawl tura pek chi pawh a ni si lova, fencing an tih dante pawh hi kan enpui lo lutuk a, tin, kan ram chhunga an lut thuk lutuk reng rengte pawh hi a dik ka ti lova, 450 feet pawh hi dik chiah chuan a thui a. ramriah tak hian zuk awm mai se lehlam Bangladesh ni mai se, keini lam ni mai se ven pawh a awlsam dawn tih kha keini ngaihdan chu a ni a. Hetah hian kan Sorkar hi inrawlh sela.

Tin, a District Council Area takah chuan Chakma District Council-ah chuan District Council an awm a, an ni hian an enkawl thei deuh anga, compensation-te Land settlement-ah chuan. Mahse, Lunglei District awm ho Tlabung area ho hi an harsa em em a ni. Helai Silsury lam pawh a ni a, Marpara lam pawh a ni vek a, heng ho hi tun atanga a thawktuah chuan an thawk thui em em mai lehngal a. Kawng parallel road an lai a, a fencing turin thir an zam tawh a, black top-te pawh an bei a, khutiang a nih chuan keini tan inrawlh leh ngaihna a awm lova, an tih leh turah tal hi chuan Pu Speaker, kan Sorkar hi hre teh se, a hmunah en leh se tih hi ka phut ve duh a ni. Tin, tunah a nghawng zual tal hi chu thawk thei lova an dahna chhante compensation ngiat a kan revenue pawh hian ensak sela tih ka duh a. Tin, a lehlamah chuan Border fencing hi Sorkar policy-in a

tum a ni a. Burma ho hi kan mizo puite vek an ni a. Hetia fencing rip tak kan han tih hian a tha zawng awm mahsela, tam tak chu harsatna a thlen awm mange aw tih ka ngaihtuah a. Chhungkhat hnai intlawhtawn tak takte kan ni a. Khang ho BSF in a gate pakhata dahkhawm mai tur hi chu Burma-ah chuan a tul lutuk em ni chu aw tih ka mimal ngaihdan chu a ni a. Ka sawi tawh angin Pu Speaker, Home Ministry-in policy nghet tak an neih tawh hi chu keini hian lo fight lo ila, a lo kal tho tho tur a ni tih tawitein ka'n sawi duh a ni e. Ka lawm e.

## PU LIANSUAMA

: Pu Speaker, vawiina kan Resolution ho hi a tha khawp mai a, a dawt lehte pawh hi sawi hman atan a tha em em a. chutihrual chuan kan thlawp nachhan tawi tein han sawilan ve ka duh a. Indo-Bangladesh Border fencing chungchang kha han sawi lawk ka duh a. He hna an thawh dawn hian kan State Sorkar involve lovin duh aiin an kal chak mah mah a, alignment chungchangah te, tin, approach road an laih turah te, tin, Chawngte bialtu zahawm takin a rawn sawite leh Pu Hiato, Member zahawm takin a rawn sawite kha thudik tak a ni a. Kan State administration-te hriat mang lovin thui deuh mai an rawn sawi a. Mahse, tunah chuan thil a kal fel leh tan mek tawh a. Khawthlang lampang, keini Phuldungsei bialah te khuan hma an lakna nasa a ni a. Pukzing atangin an verh thla pawp mai a, Hnahva leh Silsury panna kawnga mimal ram an tihchhiatte leh a fencing boundary tak kalna turah pawh kan State Sorkar inrawlh hman hma khan an kal chak khawp mai a. Pu Speaker High Court-ah kan kal mai dawn em maw ni aw tih khawpin kan State Sorkar pawh hi min tham lovin ka hria a. Chu chu vawiinah hian kan Minister, Home Minister-te leh kan House hriatpui atan ka'n tarlang ve duh a ni. Chutiah karah chuan Mamit District-a compensation cheng nuai thum leh singriat lo lang hi a tak takin uluk deuhvin a hma khan heng ang compensation hi tihfel hmasak nise chuan kan miten an tuarna a ziaawm deuh tur a ni a. Tun hnuah chuan Indo-Burma Border-ah fencing tih tur a nih pawhin hei hi min tifyingtu atan kan Sorkar leh he House ngei pawh hi kan mit tivartu atan a tha khawpin ka ring.

Tichuan Border Fencing hian advantage tam tak a nei a, nichina a rawn move-tu Tlungvel bialtu zahawm takin a rawn sawite kha chu sawi chhawng leh vak lo mai ila. Hetia kawng an han laih tak hian a chhehvel ami te tan a tangkai khawp mai a, a tangkai hmasa ber chu kha border road sector tam tak fencing hman tur khan kawng tha pui pui mai kan State Sorkar senso ngai miah lovin an han siam ta a. Black Top-a Phuldungsei atangin pan thla a awm bawk a, Pukzing atanga pan thla a awm a. Mamit District-ah chuan Marpara atanga sawtah Buarpui Bial lam leh Tlabung Bial lama panna a awm bawk a, Tuipuibari atanga Ander Manik panna a awm bawk a. Chuvang chuan Indo-Bangladesh Border State Sorkarin a tihngaihna pawh kan hriat mang lovah kawng a thlur seng sung mai a. Chu tak mai chu tualchhunga kut hnathawktute tan a tangkai a. Agriculture Link Road, Horticulture Link Road-ah a chang ta vek mai a, a tha ngawt mai a. Chutihrual chuan Tualchhung mite inhlawhfakna tam tak a piang a, company lianin hna an thawk a, tin, chubakah chuan heng contract hna NBCC an ni emaw

midang dang hian kan tualchhunga kan contractor-te hna an han pe leh ta bawk a, vaibelchhe telin kan ramah hian nichina kan ngaihthlak tak vaibelchhe 600 chuang ami kha a material phailama lak tur tam tak awm bawk mahse, tualchhung ami tam tak kan Balu-te, kan lungte a lo ngai a. Chuvang chuan he fencing hi a tangkai khawp mai a.

Tin, chubakah chuan employment tam tak a siam a, a tha ngawt mai. Amaherawhchu, hetah hian royalty kan hmuh tur Sorkarin a hmuh loh a awm a, Balu leh Lung hi an hmang tam em em a, tichuan Forest Department-in an neih thin kha Industry Department-a Geology & Mining Wing-in an enkawl lai a ni a. An indaih si lova, Bangladesh border tluan mai a Lung leh Balu hnathawktuten an lakah khuan kan State Sorkar hian royalty kan chang tlem ta lutuk hi chu enchian a ngai khawp a. Kawng dang daihah Chief Minister kan dawrnaah pawh kan sawilang tawh a, waviinah hian ka'n tarlang leh duh a ni. A thatna lam a tam khawp mai a, a thanlenna tur pawh a tam a ni. Hetihual hian nichina Chawngte bialtu zahawm takina a sawi tawh ang khan a fencing line pawn lamah hian kan ram chhung nisi hmun thenkhatah pheichuan thuk angreng takah yard 150-ah a kal zai zai tur a nih tih kha a lo tih theih hauh lova, leilet ramte, huan puitling tawh ramte hung pawnlamah hian a awm thluah mai a. Tin, Silsury khuaah te pheikhu chuan in 100 tel he fencing pawn lamah hian a awm dawn ta a ni. Chumiah chuan Sorkar establishment awmsa School-te leh Health Sub-Centre bakah chung re-settlement leh Sorkarina reconstruction a siam tur leh khaw thar din turte a lo awm ta a. Helai hi a pawimawh lai tak a nih avangin waviinnia he Resolution kan sawi rual hian kan Minister-te leh kan hruaituten min lo chhinchhiah sak sela a tha khawpin ka ring a. Chuti a nih rau rau chuan kha fencing pawn lama kha engtia tih tur nge ni ang, gate-ah khan tunhmaa rambuai laia permit system a nih kha chuan a ngeiawm hle dawn a. Hengte pawh hi tun atang hianin kan harsat phah tan mek a ni a. Heng hi kan hotute lo hriat atan kan tarlang tel duh a ni.

Tichuan Indo-Myanmar border fencing hi han nei pheila chuan khawthlang lama duh ang tawka kan State Sorkar pawh inrin hma a hma an la te hi a ni tawh lo anga, chhim tawp atanga hmar lam thlengin tangkai takin kan hmang thei anga, nichina Tlungvel Bialtu zahawm takin a rawn sawilan Damdawi thalo chungchangte, illegal migrant chungchangte. ralthuam leh hel venna bakah khan tualchhung tan infrastructure an siam tam tak advantage a awm dawn a. Tin, Sorkar hna tluk deuh thaw a tha company lian pui pui hnuaiyah kan nula tlangval ten hnathawh tur tha tak tak an neih bakah economic growth a pui dawn a. Tiau Lui dungte khawchhak tuipui luidung vela kan ram hausakna lakchhuahna atan hian nasa takin a tanpui dawn a.

He Resolution hi pass ngei chi a ni anga. Central Sorkara Scheme awmsa leh policy awmsa a lawm, lo tih kher a ngai em ni tih kha chu Scheme awmsa hi nawrzui deuh loh chuan health for all te pawh hi a awm reng mai a. State Sorkarin chak deuha a nawr zui loh chuan a tih theih loh. Hmannia kan House Leader-ina nauchaw barh a tehkhin ang deuh kha a ni a, keini lam hian lo lem duak duak ila, a bak zelte pawh kha a sam deuh a nia. Tichuan Scheme awmsa hi advantage kan lak a, a lo ti hmasa nih hi mi awhfak a ni mai dawn a. Chuvang chuan Pu Deputy Speaker, he Resolution hi a tha khawp a, kan ram leh hnam leh thangthar tana tha tur a nih avangin pass ka duhin ka thlawp a ni.

**PU LALRINLIANA SAILO**

: Pu Deputy Speaker, vawiina kan Resolution sawiho tur Border Fencing hi Indo-Bangladesh chauh ni lovin Indo-Myanmar Border ni turin Central

Sorkarah nawr ni rawh se ti a rawn sawi ve ka duh a. Tam tak ka sawi lo anga, kan move tum lai hian Central rilru hi kan hre sa nge ni anga kan hrechiang lo zawk ka ti a. Central Sorkarin kan hriat angin khawthlang lamah a hung tluk tluk tawh a ni a. Tin, khilam Manipur lamahte pawh a tan a ni tihte pawh kan ngaithla a, khami a nih kha chuan pal hung kal lai mek khawimaw lai awng la hmabakte kha keiniin kan lo chai mai niin a lang a. Central Sorkar kal lai, a hmalak lai mek tih ni rawh se ti a zuk nawr chu Central pawh hianin in titha hle mai min lo ti angem aw ka ti a. Amaherawhchu, keinin helaiah pass mah ila pass lo mah ila a kal dan tur chu a kal reng tho dawn a. Tin, Pu Deputy Speaker, kan ngaithla tawh a, a inang deuh putin a lang a. Fimkhur thuah erawh chuan sawi thain ka hria. January 17 khan Subject Committee-ah a hmingin Chairman-ah min dah a, kan Member zahawm tak tak Saiha bialtute. Kawrthah bialtute tin, Kawnpui bialtute nen kan zuk kal a, khulai Marpara thlengin. Border Fencing pawh a hmunah kan zu tlawh a, a hmuh nawm hle mai a. A tangkaina tur hrang hrangte chhut chhuaka chutih ruala rilru khawih em em tu chu kan ngaihthlak tawh angin kan ram hi a zim nak alaia Border Fencing-in min han sat heu thla leh hi chu a uihawm hlein ka hria a. Nikum lamah khan Session-ah kan Tlabung bialtu zahawm tak Pu Nihara hian a rawn sawi tawh a. Border Fencing an tan hma pawhin ngaihuahna a lo seng tawh a. Khatih lai khan Sorkar beng kha a lut lo reng reng niin ka hria. Tunah hian hmuh hrehawm em em mai a chu, khulai Boundary vela kan mipuite leh Forest Plantation enkawltute ngei pawhin an sawi chu BSF thu lovin Fencing Area pawn hi kan pel thei tawh si lova, tin, lo nei laklawhte an awm a, chungte chuan special permit siam a ngai a, an hotute an lo awm loh chungchanga buainate tawh a nih thin thute an sawi kan zuk thlir a, kan plantation tha em em maite chu pawnah an awm ta a, chung chu an hung phui mup dawn a ni a. Tin, Forest hotute nen kan sawihonaah pawh khung kan Sanctuary-te pawh kan sah then chhoh zel tur a ni a. Tiang chuan a then laiah chuanin helai hi Sanctuary em em chu tia thil kal lai mek la puitlin loh deuhte pawh a awm niin ka lo hria a. A tlangpuiin khulalah khuan Km 1 ramri atangin Km 1 zar zar khu kan chan niin Forest hotuten min hrih a ni a, uihawm hlein ka hria a, Km zat kan ngaithla tawh a, khulai hungna kha. Chuvangin kan Member zahawm tak Tlabung bialtu Pu Nihara'n nikumah a sawi lawm lawm a.

Tin, Pu Deputy Speaker, kan ngaithla tawh a, yard 450-500 ah pawh kei ka lo hriat dan chuan 500 vel a ni a, enga pawh chu ni ta se, yard 50 ah chuan kori a tu thui lovah ngai ta ila, chuti tur a nih laia hetia duhna lai laia contractor ten Mizoram an duh lai lai anmahni benefit-na tur a tlangdung rem tha lai lai an zai mai a khu a uiawm em em a ni. Chu chu a paw ka'n tih lai em em a chu a ni. Chutiang tho chuan Indo-Myanmar-ah pawh khian kal chho dawn ta ila, kan Sorkar Revenue nge ni a, engnge ka hre lo. Khamiina Member ten ngaipawimawh a an sawi lawm lawm laia kan sawi lo kha paw ka ti a. Tunah pawh hian khatianga hung leh tur helaia kan pass a ni emaw, ni lo emaw Central Sorkarina subject a nih anga a rawn tichho zel a nih pawhin chu chu kan en loh chuan a paw leh dawn a ni. Tiau kamahte kan hria a, boundary Mara District

Council hnuaiahte, Tiau Lui kamahte hmun hrang hrangah mahni lo leh hmun hlun an nei a, thlaite an ching a, lelette an nei nasa a ni. Chungte chu hum sak theih dan hram a awm em tih ka rilruah a awm a. Mahse, kan sawi tam takte hi chu ka sawi hram duh chu Silai leh thil thalo drugs-te tawlhna tur tihlai hi kan fencing hian a huam tak takin ka ring lova. A chhan chu tunah hian Mizoram, Aizawla Bike bo hi Burma-ah an hralh nasa tih kan hria a. Hmanni Chanchinbua kan hmuh pheih chuan Pulsar Bike ringawt pawh hi 200 chuang a bo tawh a. Khang kha gate-ah Tiau kawngah khian gate kawngkapuiaah khian an kaltlang em em ang tih a rin theih a ni. A chhan chu khawimaw lai ramhnuaiah khan Bike rit tak tak kha an pu an pu miah lovang. Khimi kawng thovah khian an kal a ni tih a chiang hle a. Khingte khi Sorkar anga ngaihtuah a, duty that zawk khi kan mipui himna leh keimahni theuh himna zawk niin ka hria a. A fencing avanga chung ang thil hrang hrang avoid tura kan sawi, thil thalo drugs a ni emaw, Silai tawlh rukna ang chi pheih chu ka ring lo hul hual a. Tunah pawh hian a Sorkar hotu berina Burma mi, Myanmar mi, Block President-a a neih a. Champhaite an thut kha chuan tihngaihna a awm chuang lo reng reng. Chuvang chuan understanding, inhriatthiamna thui tak nena kaltlang an ni tih a chiang em em a. Kan Sorkarin direct-in an pawtlut ka tihna a ni lova, mahse, Myanmar mi, Burma mite, helai vote pawh neilo tihchawp, khangte Block hruaitu a MNF Party-in an neih duh chung chuan kan ram hi a him tak tak ka ring lova. Chuvangin a pawimawh ber zawk chu Central Sorkar tum lai a ni a, keini chuan an rawn tichho leh dawn a nih pawhin Burma ramriah khian khawilayah hian nge a kal anga, Sorkarin a phal chin yard 450 a ni emaw, khami chin a nih chuan khatiang taka kal a kan ram mipuite leh kan ram chan tlem zawnga kal hi a thain ka ring a. Kan Sorkar pawh hian chumi lam hawi chuan a ngaihtuahna a hman a tul hlein ka hria. Tunah pawh thlang lamah khuan an buai hle a ni. Kan zuk hmu chianga harsatna hrang hrang an tawh a, chung chu kan dinhmun mek a ni a. Engpawhnise, tunah hian kan pass emaw, pass lo emaw Central-in an rawn tih leh dawn hian Sorkar hian mahni ta ang tak tak a he ram hi en tawhin ngaihtuahna hmang tawh selangin, a ram humhalhna chang hre tawh selangin, mipuite harsatna hriatna chang hre tawh selangin, tichuan boundary ami an ni emaw, khawilai ami pawh himna zawk leh thlamuanna leh lawmna zawk kan nei ngei ngei ang tih ka ring a, chu chu Pu Deputy Speaker ka rawn dinpui a ni e. Ka lawm e.

**PU ZODINTLUANGA**

: Pu Speaker, ka lawm e. Hei kan Resolution rawn putluh hi kan Sorkar. dinglam ami ten an ngaipawimawh viau ni tur a ni a. M.L.A. pali (4)

ngawtin a inang thapin Resolution an thehlut a ni. Indo-Myanmar Border Fencing hi ngaihtuah chian atan a tha khawpin ka hria a. Political Party hrang hrangahte kan awm a. chung a kan duh tlan chu Mizo hnahtlak rorelna khat hnuaia awm tihte a ni a, chumi piahlah chuan pawl hrang hrangte pawn mizo hnahtlakte kan inzawmkhawm leh theihna tur atana hma la mekte kan awm a, chutianga kara vawiin ni a Myanmar leh Mizoram inrina a thirlen hling nei paltlang theih loh, Mizoram Sorkar pawh ni lova, Central Sorkar Sipai tena ven tlatna tura han in hung khat tlatna hian, chutianga khawchhak lama kan unaute nena kan inkalpawhna leh kan inunauna hi a tireh thei angem aw ? tih hi ngaihtuahnaah a awm ve a.

Khatianga inhungna phenah chuan kum 50 te, kum 100 te han kal liam ta sela, kan thilnunga kan inunauna hi a reh thei mai ang tih hi ka ngaihtuah a. Tin, khawvel ram changkangah chuan politics avanga Bang awmte pawh nasa taka thiah tumin an nawr a, entirnan, Berlin Wall te pawh nasa taka rei tak an beih hnuah tihchhiata a awm chuan a khaw mipui, khawvelin kan lawmpui a nih kha. Chutiang chuan vawiinnia thirlena kan inhung ping a nih chuan kan inunauna angte hi a nep telh telh angtihte hi a hlauhawm a.

Tin, thil thalo tam tak rawn lutte kha kan Mover-te khan a rawn sawi a. Drugs-te, Silaite tihte a ni a. Amaherawhchu, lehlamah chuan han ngaihtuah hian khawchhak lam atang hian thil tha tam takte a rawn lut ve tho a ni. Entirnan, Aizawlah, zanah lum takin kan mu thei lovang tih hlauin khawchhak lam kan unauten Blanket-te an rawn tawlh luta, T.V. tha tak takte kan hman turin an rawn ti a. Tin, anmahni rama ei ve mai awm Sate kan ei tui lovang tih hlauin Vawk nen Bawng nen an rawn tawlh thla ve reng a ni a. Chungtiang avang chuan khawchhak lam atanga thil rawn kal zawng zawng hi thil tha lo vek an ni lo tih kha, vawiinniah hian ka'n rawn sawi tel duh a. Tin, Pu Speaker, keini hi Border Area a awm kan ni a, kan Mover-te khanin khulaia border fencing ina mipui a tih harsat dan hi an hrelo emaw ni chu aw, kan ti a. A thatna leh a that lohna ai mah khanin vawiinnia Resolution atana kan neih tura ka duh zawk a chu, vawiinnia border fencing-ina Mizoram mipuite, a effected area harsatna an siamte leh an in leh lo an chante an thua an awm theih loh ang chite, hetiang ang hi harsatna an tawh lohna atan Central Sorkarah chak takin nawr ni rawh se tihte hi Resolution-ah hian rawn kal hmasa zawk ni sela. Chutiang anga border fencing avanga harsatna kan tawhte, kan neih tawh loh hnuah a chhak lampangte kha chu Sorkarah nawr ni ta selang chuan a ziaawm zawk awm mange aw ka ti a.

Khu ka bial chhung, Teragunia khua khu Pu Deputy Speaker, hung chhuah a ni a. Tin, kawng an laih dan kha nichinah kan Member zahawm tak tak ten an sawi tawh a. A norms-ina laihna tur a tih chin laih a, kawng awmsa, BRTF kawng awmsaah khuanin kawng thar lai angin tikhuan an hung phei pep pep ringawt mai a ni. Sawtah New Sachan thlengin khami Boundary leh kan ramina ram kan hlauh tura kha ngaihtuahna pakhatmah an nei lova. Hengte hi nichina kan Member sawi ang khan, kan Sorkar-ina an tih hunlai anga an bengte an lo chhit tawh loh leh hma an lak tawh loh vang khan a ni thei a. Amaherawhchu, chumi piah lamah chuan, vawiinniah chuan Teragunia leh New Sachan-te, Marpara atanga kal dawn chuan. Pu Deputy Speaker, zan chhuah an phal lo a ni. BSF an duty-a, BSF-te chuan khaw mipuite chu tlai dar 5 atanga zing dar 6 thleng chhuah an phal lo tawp mai a ni. Tin, kei ngei pawh hi vawi 4 ngawt mai kalkawngah min tidingin min lo check a ni. Mawl zawk an ni ang chu, chung chuanin khawiah nge i kal dawn engnge i tih an ti a, Silai nen min lo tin a, an tiralmuang lo em em a ni. Chungtiang ang chu kan ram chhung ngeiah vawiinniah hian a ni a. chungtiang ang chuan Border Fencing Area hmun, hmun tam takah pawh a nih ka la ring a. Chungte avang chuan Indo-Myanmar Fencing pawh khi ti leh pawh ni ila, a tuar tura a thatna tur tam tak a awm rual khan helaia a that lohna vawiinnia Mizoram mipuiina harsatna kan tawh hi kan tihfel hma chuan khingte khawchhak lamah khi chuan ti lo hram ila tih hi ka han sawi ve duh a. Chuvang chuan kan Member zahawm tak

Resolution neitu khanin vawiinni atan chuanin inhnukdawd thei sela, vawiinnia Border Fencing avanga harsatna kan tawhte hi Central Sorkarah hetiang harsatna kan tawh leh tawh lohna tur atan chak takin nawr ni rawh se tiin han her thei mai selang chuan kan lungrual tlangin a rinawmin ka ring a. Chuvang chuan kan M.L.A. zahawm tak kan Resolution rawn move-tu kha withdraw leh turin ka rawn ngen ve a ni e.

Ka lawm e.

**SAILOTHANGA SAILO**

: Pu Deputy Speaker, ka lawm e.  
Vawiin kan Resolution, Border Fencing hi Indo-Bangladesh chauh ni lovin Indo-Myanmar Border pawh

Fencing ti turin Central Sorkarah nawr ni rawh se tih hi a tha khawp mai a. Mahse, ka rilrua lo awm chu Border Fencing siam a nih hian a State Sorkarten ngun taka thil kan ngaihtuah a tulin ka hria a. He Border Fencing tuna an han siam chhin tuna kan hmuh theih mai khumi Indo-Bangladesh-ah pawh khuan Sorkar hian kan ram hi hloh hian a inhria em aw ka ti a, ka zawt bawk ni selangin. Hloh lova kan inggaih chhung hian kan hlauhin ka hre tlat a kei chu. Chuvangin fimkhur hi a ngai hlein ka hria a. Tin, he Border Fencing kan siam, an siam avang hian mipui tam takin khumi a effected area hianin kan tuar a ni tih Sorkar hianin hre tawh pawh nise hre nawn leh turin kan han ngen ni selangin. Chubakah chuan an harsatnate hre rengin re-settlement tihte leh eng eng emaw tanpuira hi a ngaihtuah tha hlein ka hria a, kan ngenpui ni selangin.

Tichuan Pu Deputy Speaker, khumi Indo-Bangladesh Border fencing kan hmuh ve theih chin kumin january thla khan hemi Forest Department thil tih endik tura Subject Committee zu kalte kan Chairman Pu Lalrinliana Sailo, Khawhai bialtu te leh Kawrthah bialtu zahawm tak Pu Saikapthianga-te leh sawmi Saiha bialtu zahawm tak Pu Hiato te leh Kawnpui bialtute an zuk kal a, thil tam tak zuk hmu lo mah ila kan hmuh theih chinah lungawina aiin lungawi lohna a tamin ka hria a, tikhuan an lai ta vak mai a, kawng zau tak lamlian zau tak an sawi a, chumi bulah chuan Border fencing kha an han kal pheipui ta zel a, kawr ruam thuk tak takte pawh khati khan an la cham a, lamlian lian tak angin an han siam a, a kal hrim hrim phe chu a nuam viau a, unemployment-te pawh a generate anga, tin, kalkawng la awm ngai lo kalkawngte an siam a, kawng tinrengah tangkaina a awm pawh a ni thei ang. Mahse ka sawi ang khan han kir leh lawk ilangin, khulai tuna an tih chin pawh khu Sorkar hian uluk takin han en ta sela, kan hriat loh hlanin kan ram nasa takin kan hloh a lawm mawle, helai zawnah phe chu an feet sang tel kan hloh der mai a lo ni a. Tun chinah chuan fimkhur hle a ngai tawh a ni tih hi an hmuhchhuah ka ring a. He Border fencing hi a pawimawh anih a rinawm a, khi South Korea leh North Korea-te pawh kan hmu a, tikhian Border fencing an siam a, ka hmaa sawituin a sawi ang khan East Berlin leh West Berlin-te pawh ti khan a laiah border fencing an siam a. Brick an chhu chhe laite pawh kan hmu a nih kha, engpawhnise Pu Deputy Speaker, he border fencing hi Central List nimahse helaiyah kan State chhungah an thawh miau si

avang hianin pawngpaw enpui loh ringawt hi chu a dik hauhin ka ring lova, tuna an tih chin ang pawh khu he Sorkar hianin zu enfiah ngei ni selangin. Tin, an tih tur angte pawh khu uluk zawk leh fimkhur zawkin he Sorkar hianin rawnate siamin remruatna siampui sela a tha awm mange aw ka ti a.

Tichuan helaiah Indo-Myanmar han sawi kai ta zel ila. Indo Myanmar hi a pawimawh thova, Sorkar hianin priority a pek dan hi kan hrethiam chiah lo nangin Indo-Bangladesh an hmanhmawh bikna leh hetia prority an pek nachhan tam tak zinga langsar lak ni a lang chu kan ngaithla tawh a. Khulaiah Bangladeshi tam tak an awm a. India ramah hei Assam-ah phei chuan nasa takin kan buaipui/an buaipui a ni a. Mizoramah ngeite pawh, kan thenawm State-ahte pawh an buaipui tan a ni tih hi he Central Sorkar hian hre rengin tihian chak takin hma an la chho a ni a. Chulovah pawh thildang tam takah security thilah a nei ang tih kan ring a. Chuvangin hetia rawn tih hi an tih awm tak a ni a. Tichuanin Indo-Myanmar chungchangah hi chuan kei ka duh ve dan chuan kal theihna tur chauh hi awm sela, phui mangkheng hianin he border fencing hi siam ve ngawt mai ilangin a thain ka ring a. Vawiiinniah Myanmarese, kan Mizo hnahtlakte pawh an tel ang, Mizoramah an lo lut a, Mizoram khua zawng zawng phei chu kan ti thei lova, Mizoram khua tam takah an rawn settle a, an han awm rei deuh a, tichuanin hnuhma an nei chho zel a, an awmna apiangah. Karhmasa lawk pawh khan Rangvamualah chhungkaw sawmpanga lai phei chu NGO hovin tikhan kut an thlak a ni tilte pawh kan lo hre thawi a.

Chuvangin kan unaute an nih chuan kan pianpuite pawh ni selangin ram tan leh khawtlang tana thil thalo ti na na na chu danin a sawi angin a chungah dan a lal tur a ni a, kan hrem mai tur a ni a. Myanmarese kan Mizo puite, kan Mizo hnahtlak pawh ni sek sek selangin an sual na na na chuanin dam chhung Lung In tang tur a nih nak chuan a tang mai tur a ni a. Mizoramah an lo kal a, Aizawlah Zoram khaw hmun hran hranah an awm a thil sual an tih..... Chuvangin unaute an nihna avanga kan dimdawihna tur chuang ka hre lova, mahse, khua leh tui tha tak an nih chuan an dawn tur ang an phu tawk erawh chu Sorkarin a ngaihtuah tur niin ka hria a. Indo-Myanmar fencing border khi a tul khawpin ka hria a. Vawiin hian a move chauh a ni a, Central-ah kan ngenpui dawn chauh niin ka hria a. Resolution dang pawh kan lo siam tawh thin a Pu Deputy Speaker, a tlang mawh khawp a, nikum maiah pawh Assam leh Mizoram border chungchangah Resolution he House ngei hian kan lo pass tawh a, mahse, vawiin thlengin a result engmah kan la hre lova. Mahse, khi Indo-Myanmar fencing khi chu tih ngei turin Central-ah he Sorkar hian nawr selangin an lo ti leh dawn a nih pawhin khulai Indo-Bangladesh fencing atang khuan experience lo nei tawhin an thil tih dik lohte an hriat chhuah phahna a nih theih a rinawm a. Khilai khi an ti leh dawn a nih pawhin Sorkar hian ngaihtuahna hmang tawh se, tih ka han ngen duh a.

Tin, hei kan Resolution hi a pawimawh hlawm hle mai a, helaia No. 6-na hlei hlei kan Member zahawm tak Pu Lalduhoma Resolution hi sawi a chakawm hle a. Thlai thar leina tur budget-ah dah ni rawh se, a ti a, a tawi hle a, mahse, a sei hle thung a. A thu ziak hi a tawi a, a thu



erawh hi chu darkar 4/5 sawi a tlingin ka ring a. Hengte hlei hlei hi sawi a chakawm a, engatinge ni i pawh fuh loh hlauh mai pek chu aw, Pu Chhantea hi a vannei hle a ni. Thil awmsa kan sawi a ni mai a, hengte hi sawi felna turin chance min pe la. nangmahni lamah khan chance min pe la, nangmahni lamah khan chance 2/1 sawi tir leh langin chawhnu lamah chuan he Resolution hi kalkhum dan a awm lawm ni le. tih kha ka han ngen duh che a ni e. Hun tha tak min pek avangin ka lawm e.

**PU F. LAL THANZUALA**

: Pu Deputy Speaker, ka lawm e. Hemi border fencing te a lo piang ta zel hi kan khawvel ralmuan lohna rah a ni a. Security concious tak mai khawvel

kan lo ni ta a, side a tam a. Pakistan nen inramrina phei chu an ti nasa a ni tih kan hria a. Hemi fencing avang hian himna pawh lo lut tur tam takte pawh man tur a tam a. An lo luh theih loh phah a. Khawvel hnuhnung zelah hian Sakhuaana avangte hnam hrang nih vangtein buaina a lo tam ta a. Chu chuan hei hi a rawn nghawr chhuak ta a ni ber mai a. Mahse, security reng reng hi han ngaihtuah a han tih tum tak tak chuan a lehlam side-ah khan sacrifice a awm a ngai ve ziah thin a. Thlawhtheihna hruai kawte a hlauhawm thin a. Hetianga hijack-te a awm loh nana security han tih strict chuanin freedom tam tak hi hloh a ngai ve thin a ni. Chutiang deuh chu a ni a helai border fencing pawh hi. Kan him lohna tam tak a awm tih kan hre reng a, heng Mizoramah te pawh. Mahse fencing han tih dawn tak tak chuanin chân tur engemaw zat kan nei tih a lang ve mai a. Chuvangin kan ngaihtuah vang vang hianin thil hrehawm lam chu nimahsela a tulna hian a urthlu a. Security kha thil dang zawng zawng aia chungah dah loh theih a ni si lova. Chuvangin border fencing-te hi kan thlawp mai turah ka ngai a. Tin, kan India Sorkar pawhin tul a ti a, a programme te pawh lo awm tawh, nawr hman hmawhna tur atana thil tangkaite a lo ni a. Kan thian thekhhatte sawi ang khan kan ti emaw ti lo emaw tih tho tur a lo nih phei chuanin ti lo zawnga han sawi han sawi pawh kha thil tul ni lemin a lang lova. Chuvang chuan he Resolution hi keipawhin kan thlawp ve phawt ange. Tin, hetiangah fencing a lo awm hian soal lokal tur zawng zawng hi a dang vek ang tih theih a ni hauh lova. Heng kan Aizawlah ngeite pawh kan ram chhungah police nena kan thutna hmun ngeiahte pawh thil hi khatiang thak kha a ni thei lova. Hmanni lawka motor pakhat hal a ni ringawt maite pawh kha kan in awm pawlh nuai nuai karah khan a lo alh ta mai kha a ni a. Hetiangte kha a ni ve a, prove tak tak theih a ni lova. Hetianga han in prove hi chuan border fencing hi ti mah ila kan ralmuan lohna thil eng eng emawte pawh hi a dang zo vek ang tih kha tih theih a ni chuang lo a ni. Amaherawhchu, kei ka ngaihdanin a tam tak mai a te hi chu, a zualpuite hi chu a dang ngeiin ka ring a. Hei kan ramah ralthuam tawlhthe a lo awm a, mante a lo awm a. Tute nge an nih han tih chuan Burma lam an lo ni leh a, drug tawlh ru teuh mai an man han ti ila, Burma lam an ni deuh zel mai bawk a. Khatiang khan zu zawrhna hmunahte pawh hian tute nge thawk ti ila, Burma lam an lo ni leh a.

Kawng lehlamah chuan chi leh kuang lamah kan unaute han ti thin mah ila, a tam takte lo tlak thlaka an khawsak dante hi chu unau khawsak pawh hian an khawsain a lang lem lova. Khatiang dinhmunah

khan kan din avangin fencing-te a lo awm a, kalna tur khan pawimawh deuhahte khatianga dannate a lo awm chuan a lo harsa sawt dawn a, duty-te an awm bawk chuan. Heng ralthuam tawlh emaw, drug han tawlh emaw, a zualpuite hi chu a dan theih hian ka ring a. Khawiahmah hian 100 percent a prove tak tak hi a awm thei lo a ni. Chuvang chuanin he thil hi khatiang anga kan prove zawh vek loh vanga a tha lem lo e tih theih turah ka ngai lem lova. Amaherawhchu, rilru tinuam lo ve thei tak hi chu hei fencing-te han ti tak tak se keini, ka bial Thingsai te, Cherhlunah te chuanin Tiau phai zawl agriculture lama an thil thar tam tak awmnate kha an tih dan han ngaihtuah hianin hung pawnah an dah mai hmelin ka hria a. Rilru pawh hrehawm lawk tak a ni. Amaherawhchu tih tirh a ka'n sawi ang khan security kan duh a ni si chuan engemaw sacrifice hi a ngai ve tlat thin a. Han buk han bukin, security a awm loh chuan thil dang zawng zawng kha a nawmnate pawh a lo awm lova, a tangkainate pawh hi a lo nep thin a. Chuvang chuanin thawk lo thei chu niin ka hre lo a ni. Amaherawhchu, uluk taka an tih dawn hunah te pawh enpui a, an duh ang ang ni ringawt mai lova, mipuite, a ram chhung mite harsatna remchang lo siam tlem thei ang bera ti tura mit kan len pawh a ngai khawpin ka ring a. Chutiang ang chuanin he Resolution hi ka'n thlawp ve a.

Hrehawmin huphurhawm viau mahsela, kan dam chhung niah hian security a awm loh chuanin thil dang nuam hi a awm thei lova. Sum leh pai lo tam ta pawh ni sela, security himna leh muanna, Law & Order kha a awm that loh chuan nun a nuam thei lo a ni. Chuvangin, he thil hi thlawpa tihtluk ngei thain ka hria. Ka lawm e.

**PU H. ROHLUNA**

: Pu Deputy Speaker, ka lawm e. Vawiina Tlungvel bialtu zahawm takina Resolution a han putluh Border Fencing hi Indo-Bangladesh chauh ni

lovin, Indo-Myanmar Border pawh fencing ti turin Central Sorkarah nawr ni rawh se, tih a ni a. Indo-Bangladesh Border fencing a nih chungchangah hian problem awm hranghrangte, a border hnaih deuh a kan M.L.A. zahawm tak takte khanin harsatna a thlen dan kha an han sawi hlawm a. A bik takin Chawngte bialtu phei kha chuan a hun zawng zawng deuh thaw kha harsatna a thlen dan helai House min hrilh a ni a. Chuvang chuan problem khati zo zai awm a nih si chuan, fencing tih hi a tha ber lo a ni mai lo maw tih hi a zuk ngaihtuah theihin ka hria a. Central policy kal mek lai Manipur lamah pawh an rawn tan tawh a, helam Mizoram zawn an la rawn thlen loh vang maia helaia keinin heti tak maia kan lo buaipui hi vawiin niah hian thil dang tul tam tak karah kan tih hmasak tur a ni em aw ? tih ngaihtuahna ka nei a. A bik takin Indo-Myanmar lamah phei chuan, kha Buarpu bialtu zahawmtak khanin a sawi tawh a, party tinina policy-a kan lo neih Zo hnahthlakte insuihkhawm tihte, tin, a bik takin tuna i dinglama thute phei chuan, Pu Deputy Speaker, tunhma zalenna an sual laia Arbawm inhunna apiang chu Zo hnahthlakte Zoram a ni mai an lo tih thinte han ngaihtuah let phei chuan, vawiinniah hian Zo hnahthlak tam tak rilru hi kan tina angem ? tih hi a ngaihtuah thain ka hria a. Kan unau tam tak khawchhak lama awmte hian an rawn inawp dante, an awmnaah hrehawm an tih ziate an sawi thin a. Tunhma,

keini rambuaia kan awm lai khan an theih ang tawkin min lo hum a, min lo tanpui a. Theihtawpin kan tlanhhiat lai pawh khan ei leh barah ni se min lo tuamhlawm a ni a. Vawiiinniah chuanin India Sorkar pawhin fencing tiin, min han daidang dawn mahsela, la ti rih lo e a, ti tur zawk ni awm tak an nih laia heti tak maia Indo-Myanmar border fencing an rawn hmanhmawh ta mai hi enge ni an rilru chiah awm ta tih hi a ngaihtuah theihin ka hria a.

Tlungvel bialtu pawh hian an Party Policy-te hi a enchiang ta lo em ni ? Hetianga Resolution a putluh tak mai ka ti a. Tunhma chuan rambuaiah kan awm a. Chutihlai inremna awm hmata chuan Zo hnathlak hi rorelna hmun khat hnuaiah hian kan awm hun a la awm anga tiin tuna Zoram chhunga awm hote pawn beiseina sang tak an nei. Chutihlaih Central Sorkarin vawiiinah min daidang turin fencing tih an tum mek a ni a. Chu chu keinin kan la nawr hmanhmawh a nih pheii chuan kan unaute rilru kan va tina awm em. Helaia rorelnaa thute hian nakina thangtharte kal zel dan ngaihtuhtute rilru hi kan va tina awm em tih hi ka ngaihtuahnaah a awm a ni. He Resolution hi kan hnam leh ram a kal zelna turte ngaihtuah hian thangtharte min demna hun hi a la thleng palh ang tih hi ka rilruah a awm a. Chuvangin, han pass em tur chu a ni em aw tih ka ngaihtuah a ni. Greater Mizoram-te kan sawi vul chuk thin a, mahse, kan tum ram kan la thleng zo lo a ni mai thei. Mahse, hetiang a daidangtu atana keinin International Boundary awm mai pawh thiah kan duh laia inkalpawh theih miah loh tur hian indang ping law law teh ang han in tih a, Central-ina tih a tum mek laia, keinin hmanhmawh chuk chukin ti sela min daidang vat teh se han tih khum kha chu a diklo deuhin ka hria. Hei hi vawiiinah he ram roreltutena kan tih tur phung chu nilo deuhin ka hria. Tichuan, kan bialte hi Indo-Myanmar Border a awm an ni a. a bikin Tiau phai leilet nei ho tan pheii chuan kan Resolution sawiho mek hi a hlawhtling mai ang tih hlauhawm tak a ni. Leilet nei hote chuan an leilet an chan vek dawn a ni mai.

Chuvangin kan bial dinhmunte kan en hian heti taka nawr hmanhmawh tur kan ni love, kan Sorkarin kum 3 chhunga intodelh min tiam a, kan la irtodelh chuang si lova, ei leh bar zawn kan la ngai bawk si a, kan leilette kan chan zel dawn a nih si chuan, hei hi kan kalphung tur a ni dawnin ka hre lo a ni. Kut hnathawktute thawhrimna rah hi kan inngahna a ni mai. Kan la tharchhuak tha thei bawk si lova, beiseina sang tak nen kan lo thlir a, mahse kan la intodelh thei chuang silo a ni. House hianin Resolution hi kan pass a nih chuan mipuiten min la dem mai ang tih a hlauhawm hlein ka ring. Ka bialte pawh an la inpeih si lova, pass hi tha ka la ti lo a ni. India Sorkar pawhin min hung sak dawn pawh ni se kan la harsa rih e ti a la chhan ka duh a ni.

Central-in a hun takah a ti mai ang. Central policy kal lai mek a ni a, Indo-Bangladesh border an hung mekah pawh kan ram mipuiten harsatna tam tak an tawk a. Chuvang chuan, Indo-Myanmar lamah hi chuan muangchang deuhin rawn ti zawk teh u, kan mipuite dinhmun hi kan lo siam rih phawt teh ang, an intodelh a, an dinhmun tlema kan siamthat hnu deuhah rawn ti zawk teh u, ti tur zawkah he House hi ka ngai a ni. Ka lawm e.

**SPEAKER** : Aw le, hei vawiin chu hun kan hmang thiam tlangpuiin ka hria. Hei hun pangngai dar 1:00 P.M. a lo ri ta mai a, kan chawl rih anga. chawhnu lam dar 2:00 ah kan chhonzawm leh dawn nia. Sitting Adjourned: 1:00 P.M.

Afternoon : 2:00 P.M.

**SPEAKER** : Kan rorel kan chhonzawm anga, tunge sawi ang. Awle, Pu H. Vanlalthaliana i sawm ang.

**PU H. VANLALTHALIANA** : Pu Speaker, ka lawm e. Vawiina Tlungvel bialtu zahawm takin a lo putluh Indo-Border fencing hi Indo-Bangladesh chauh ni lovin Indo-Myanmar border pawh fencing ti turin Central Sorkarah nawr ni rawh se, tih hi vawiina kan Mizoram a mamawh ngawih ngawih niin ka hria a. A move-tute leh mi tam takin harsatna kan tawh dan an sawi tawh a, khalam kha chu sawi lutuk a tulin ka hre lova. Mahse, Pu Speaker, i veilam amiten hlauhthawn an neih tam tak hi han tarlan deuh a thain ka hria a. Kan ram kan chhan tih te, kan unaute nen bangin min daidang a, kan intlawhpawh tha thei lovang tihte leh kawng hrang hrang an sawi hi he border fencing hian dan anga kan intlawh tawna turte, mumal zawka kan inpawh theihna turte a siam zawk dawn a ni tihte kan hriat a thain ka hria a. India Sorkarin border fencing a siam hian Bangladesh lam phei chu kan hriat tawh ang khan state dang tam zawkah chuan an zo deuhthaw tawh a. Mizoram chhungah hei kan ti mek a ni a, a hnunung pawl kan ni a. A mipuite tan harsatna tur tam tak hre chungin mipuite tana that zawkna a nih hriain a ti a ni a. Tunah hian hei Bangladesh border an hungah hian K.M. engemaw zat dan zelah gate siamin mipuite tan hna an thawh theih tur kawng ruahman vek a ni a. He border fencing-in a ken development tam tak bakah kha ram fencing pawna awmte ram neitu tam takin an ram an enkawl theihna turin an kal theihna tur hi a awm vek dawn a ni. Chutiang tura ruahman a ni tih hi tarlan a thain ka hria a. A chhan chu kan kal thei tawh lo anga, hna kan thawk thei tawh miah lo ang, tih kha kan hotute rilruah khan a awm deuhin ka hria a. Khatiang kha a ni dawn lo. Miin ram a neih a, hna a va thawhna kha a dal dawn lo. Mahse, hungchhung ang em ema zalen erawh chu a ni dawn lo a ni. Awmze nei takin a mipuite harsatna sukiang tura ruahman a ni tih kha kan hriat a thain ka hria.

Hei Burma lampang a ni a, helam hi Mizo hnahthlakte kan chhukna lampang a ni a, kan unaute tunhmaa zalenna kan sual lai pawha kan tlanhhiatnate leh kan va tawmna pawh a ni a, anni pawhin min ngaihsak a, vawiinni thlengin kan intlawhpawh em em a, insumdawntawna leh mamawh hrang hrang inphuhru tawnin kan awm a. Chutih lai chuan thil thalo tam tak kan ramah a lo luh phah ve bawk a ni. Heng zawng zawng hi kan hotuten an sawi tak ang khan reh duak lo mahse, thui tak chu tuna border fencing hian a tireh dawn a ni tih a chiang em em a ni. Entirnan, Champhai Zokhawthar border trade centre, kan intlawhpawhna hmunah, vawiinnia kan hung lova hetah kal lova hmundang tam taka tlanhhe ho, a ruka relhru ho hi kan hung vek chinah chuan, khatianga tlanhhiatna a awm loh chuan kawngpui takah kal an tum anga, dan anga rawn khawsak an tum ang tih hi ka rindan a ni. Chuvang chuan dan lova sumdawnnate, dan lova rawn luh rukna tibo tura dan dik taka an lo luh theihna tur ruahman a ni tih hi ka dawnsawn ve dan tlat a ni.

Tin, India Sorkar leh Burma Sorkar, Sorkar dan hrang nei ve ve, rorelna pawh hrangten an mipuite dan ang ve ve Burma Sorkar phalna leh India mite Burma rama an luh theihna tur India ramchhunga Burma mite India dan anga an lo luh theihna tur rawn regularise-na tur a ni tih hi he border fencing hi niin ka hria. Chuvang chuan ka support em em a ni. Kan mipuite kan danbehna emaw kan hrenbehna kha a ni dawn lo, dan ang thlapa rawn kal duhte an lo kal theihna tur a ni tih hi kan chian a thain ka hria. Chutiang a nih lova a chhe lai chauh, a thendarh lai chauh, a harsatna lai chauh kan sawi chuan mipui rilruah thil diklo a tuh dawn a ni, chuvang chuan he border fencing hian lokal tawh suh se, lo ti tawh suh se tihna kha a tum ber a ni miah lova, dan hnuaiah danin a phal chin ang zela intlawhpawh tawnnate, inkalpawhna leh insumdawn tawnnate a kal that zawk theihna turin he border fencing hian a pui dawn a ni a, chu chuan kan ram a tihralmuan ka ring tlat a ni.

Mizorama thil bo tam tak an chhui hi Chanchinbuah kan hmuh danin kawng mumal lo leh thingtlang kawngah an tlanbopui a tam em em a ni, zing lama kan ngaihtlak tawh ang khan, chuvang chuan he border fencing hi a lo nih chuan Sorkarina Sipai BSF te, Assam Rifles-te duty-na ang zawn zelah khan kal a lo ngai tawh anga, thil tisuatuten, rukru thin ten a ruka relhrukna an zawn thin kha, kha gate-ah lo chuan a kal theih dawn loh avang leh hung a niha awlsam taka kal a theih dawn loh avang khan a tifimkhur anga, sualna leh thil thalo thui tak chuan a dangbet ang tih hi ka ring tlat a ni. Chuvang chuan he border fencing Indo-Myanmar hi Indo-Bangladesh chauh ni lovin Indo-Myanmar pawh fencing ti turin Central nawr rawh se, tih hi kan pass ngei ngei a tulin ka hria a, Central-a kan nawr chak chuan vawiina kan harsatna, vawiina Aizawl khawpui chhunga bo leh damdawi leh thil thalo tam tak hi hemi hi peih hma a nih loh chuanin a pumpelhin a reh deuh ang tih hi ka ring a ni. Chuvang chuan he Resolution hi thain ka hria a, Chubakah, development tha em em mai a keng a, a dik tak chuan Mizoram, a vai hian a ramri zawng zawng international border-in min hual avangin a kawng tha nei lo vek, zep tur pawh a awm ka hre lo. Chutiang neite, chutiang awmte tana kalkawng pawimawh development rawn hringtu tur a ni tih hi a chiang em em bawk a ni.

Chuvang chuan mipuite tan a tha em em tih hi a lang tlat mai a ni. An ram eng emaw zat an ch n avanga ram tlem hung pawl an awm avanga ch n tura an insawi avang hian an ch n dawn reng reng lova, kan enkawl vek thei dawn. Amaherawhchu, ka sawi ang khan gate kaltlang a ngaih avangin ramri kan hung chhung lamah chuan a zalen deuh ang. Chumi tur atan chuan India ram Sorkar entir nana Electors Photo Identity Card pawh kan nei sa vek a, India mi pangngai chuan. Chutiang mite tana India mite tan chuan harsatna kan neiin ka hre lova. Khatianga hnathawh neite kal dawn ta sela chuan khami gate-ah khan engmah problem an nei lovang. An leilet emaw, an huan emaw va tlawh dawn ta sela khatianga an awm dawn phawt chuan India citizen nih leh nih loh zawh kher ngai lovin duty ten an hre vek dawn a ni. Chu chuan gate-ah harsatna an nei lo anga, an hnathawhnaah harsatna lutuk a thleng lovang tih chiang takin ka hria. Lehlamah chuan hna han thawh a, bul han tan chuan harsatna deuhthe, buaina deuhthe kan hriat lawk chiah loh tam tak a lo thleng thin. Chutiang harsatnate pawh tam tak a lo thleng thin tih chu a chiang a. Chutiang tur atana hemi Indo-Bangladesh Border hma kan lakna hian Burma lamah chuan finna pawh min pe anga, tha tak leh mumal taka compensation chungchangahte tualchhung mi harsatna chungchangahte pawh mumal taka Sorkar inbuatsaih erawh chu tulin ka hria. Khatianga Sorkar a inbuatsaih chuan a tlawh khua, a khawih khuate hnenah harsatna awm lovin a tlawh theih dawn a ni. Chuvang chuan he border fencing hi a pawimawh hlein ka hria a.

Nikum November thla tawp lamah khan Laitlang, khumi Chhimtuipui mawng lamah ka zu tlawh a, chutah chuan Laitlang ka zuk tlawh khan ka ke a nat avangin ka kal chak thei lova, Block hruiutun hmahruai teh u, ka ti a, ka va thlen tirh phat a min hrilh chu Burma Sipai pathum an lo duty a, khaw pawnah hian, kawtchhuahah hian MLA a lokal asin an ti a, hmanhinawh takin an tlanchhia a, kei chuan "engatinge hetah hian an lo kala" ka ti a, an khua a mite ka'n zawh khan kan hnung lawkah khan hel ho nen Burma chhungah an intibuai deuhva, an rawn umlut a lawm le, chuvang chuan helai hi pass nei deuh avangin an rawn duty a ni, an ti a. Khalai tlang mipuite an thlabar em em mai a ni.

Hetianga border fencing kan neih chuan ram kilkhawr border neite harsatna hi security pawh a chhawk ang tih ka ring tlat a ni. Chuvang chuan he border fencing hi tha taka kan pass theihna tura House-in tha taka thu kan neih kha thain ka hria a, harsatna thil kan sawi zawng zawng hi dan ang taka hma kan lak theihna tur a ni tih hi kan hriat thain ka hria a, chu chu ka rawn dinpui a ni. Ka lawm e.

**PU H. LALSANGZUALA**

: Pu Deputy Speaker, Tlungvel bialtu M.L.A. zahawmtakin a Resolution, Indo-Myanmar Border fencing Resolution hi ngun taka ngaihtuah chian a ngaiin ka hria a.

.....168/-

Hei tunah khawthlang lampangah kan hria a, Subject Committee-in an zuk en a, tah chuan, an kawngpui han sialte kan ram chhung leilung an lak hek dante an report atangin kan ngaithla tawh a. Tunah khawthlang lampanga an hung leh ramri kal dan dik lote leh thil dang kan bengah kan hre chauh a, a that leh chhiat pawh hre lova khawchhak lam Resolution centre-a lo ngen hi a hma deuh lo maw ka tiin ngaihtuah chian deuh hlek ka duh a. Chuvang chuan he Resolution hi kan ti dawn a nih pawhin khawthlang lampanga an hung leh an kawng sialte khuan kan ram leilungte a hai chhiatte leh a thatna leh that lohnate zir phawt ila, Central chuan a kalphung pangngai leh security thilah te a rawn kalh dawn tho thova. Tin, kan duh chuan Sorkarah pawh Resolution kan siam tho tho thei a. Chuvangin a that leh that lohna hi la thlir phawt hi a thain ka hria a. Kan Tlungvel bialtu M.L.A. zahawm tak khan a Resolution kha withdraw leh thei sela tih hi ka ngaihdan a ni a.

Tin, kan khawchhak unaute sual veka kan dah hi a dik lovin ka'n hria a. kan unaute an ni vek a, tunah pawh Border Trade-te kan sawi a, khawchhak lam atangin thil tam tak a rawn chhuk a, an hnen atanga thil a rawn kal loh chuan kan tamin kan hrilh a hai nghal mai a ni. Tin, Champhaiah chuanin market lian tak mai pawisa tam tak senga sak a ni. khing pawh khi a borat deuh mai a ni angem ? kan insumdawn tawna atana ka unaute, engkima kan tangkai theihna atana ramri hung putin a awm a. Sum leh paite kan mamawh tam tak kan changtlunna tura kan phuisuina tur kan dang pin leh si chuan a tha dawn em ni ? tih hi ka ngaihtuah dan pakhat a ni leh bawk a. Tin, pakhat lehah chuanin insuihkhawm leh zai i rel ang u tiin kan u leh naute khawchhak lama awm an duh vang renga awm pawh nilo harsatna vanga khilaia tal laklawh tawhte helaiiah kan u leh naute hi ..... kan tumin in unauna inzawmkhawm leh kan tum lai karah kan u leh naute lung bang leh thirlena han hung dai dan daih mai hi a va rem awm lo em tih hi ka ngaihtuah bawk a. Chuvang chuanin, ngun taka ngaihtuah chian hi ngaiin ka hria. Engpawhnisela Central Sorkar chuanin a policy angah chuanin invenhimna security thilahte chuan hma a la rawn la zel anga, tah chuan a la rawn tichho turah ngai ila.

A hmasaa ka rawn sawi ang khan khawchhak lampangah Bangladesh ramri khulaia a hungna chungchangahte kan ramri nena kal dan hi ngun taka ngaihtuah chian phawt hian chutah chuanin khimi khawchhak lampang Indo-Myanmar a pawh chu hung ni se tih chu Central-ah ngen hi a tha zawkin ka hria a. Chuvang chuan, kan ramina kan mamawh kan harsatna ngawih ngawihthe sum leh paiah kan dinhmun chawmhlawm kan ni kan inti a, chuvang chuan, khawchhak lampang atanga sumdawnna kawngah kan inzawmnate tha kan nei a, thil kan kalpui thain ka hria. Engpawhnisela, thil thalo khilam atanga chhuak veka kan dah hi Golden-Triangle kan ti a, a dik vek bik lovin ka hria a, dik tak chuan tunah pawh Cachar - Assam lampang atangte pawh khuan a ni dawn lawm ni. Whisky-te, Rum-te englaipawha heti khawpa total prohibition kan hmang chung si a Revenue pawn chhiah tam tak a neih theihna tho pawh hi khulampang atanga lokal tho khu a ni si a. Engpawh ni se, kan MLA zahawm tak ten an rawn sawi ang khan khilai hung avang ngawt khian kan Ram hi a thianglim dawn chuang lo. Chuvang erawh chuan, kalphung dan dik taka kan kal chhoh kha a apawimawh zawk a ni a. Chuvang chuan, kan Tlungvel bialtu M.L.A. zahawm tak khan a Resolution hi withdraw leh thei hram se tih hi ka ngaihdan a ni e. Ka lawm e.

**SPEAKER**

: A indawt deuh diat diatin ti ila, Pu Nihar Kanti Chakma hi tun tuma a phar vawikhatna a ni. Pu Nihar Kanti Chakma.

**PU NIHAR KANTI CHAKMA**

: Pu Speaker, ka lawm e. The Resolution moved by the Hon'ble Member from Tlungvel Constituency – “Border fencing hi Indo-Bangladesh

chauh nilo Indo-Myanmar pawh fencing ti turin Central Sorkarah nawr ni rawh se”. Pu Speaker, if i am not mistaken more or less the same resolution has been passed during the previous term. And also adopted the then Hon'ble Member Pu C. Sangzuala has move the resolution. The resolution is more or less the same “Mizoram International Border fencing siam turin Central Sorkarah thlen ni rawh se”. Pu Speaker, we are looking only one side of the story we have to see the other side of the story also. During the previous session also I had spoken the problems faced by the people due to the fencing. I am not opposed to the fencing Pu Speaker, here I want to clarify my stand that the Government cannot shy away from its responsibility. What I want to say is that before passing this resolution the Government must address the suffering, the problems they will face while constructing the fencing. Recently, one incident has taken place just recently. One house has to be dismantle while constructing the fencing. The owner of the house came out with gun. If you dismantle my house I will shoot you. Yes, his action is justified because an in thiah chuan khawng an awm ang ?.

Therefore, before passing this resolution we have to address the problem. There will be many villages that will be left out of the fencing. Moreover, one more problem we are feeling is many villages will be bifurcated into two. Some villages will be outside and some will be inside the fencing. This clearly violate our right we will not be able to move freely, this violate right to move freely our basic fundamental right. We have to looked all this problem clearly. One more problem Hon'ble Minister incharge i.e. Revenue may clarify his stand. Now problem has arisen land value and compensation an dawng thei lova, engvang nge dawng lovang le ? I want to have this question clarified. The land by which they are earning a livelihood that land had been destroyed due to fencing. Engvang nge compensation min pe lovang. This thing has to be clarified by the Government. Government should come forward to help we are not opposing to the fencing because we clearly agree and support the reason but problem is that this problem has to be attended otherwise we have no objection and one more thing I want to clarify, e.g. Chakma Autonomous District Council they are having an LSC for Lunglei, Mamit District we don't have LSC. Anmahnin an dawng teuh anga keini chuan 1000 – 2000 chauh kan dawng anga. There is no uniformity in getting the compensation. So all these problem has to be look before passing this resolution.



Tunah Bangladesh-ah kan thawk mek a hei hi problem, lehpekah Indo-Myanmar Border-ah pawh kan thleng dawn tho tho a nia. So this is very serious, we have to look into it. Pass ringawt hian awmzia a nei dawn lo, mipui harsatna kan thlen dawn a, chu chu a mover hian hrethiam se, let him withdraw the resolution, we will think it properly after completing all the formalities. For example, Government has to reply whether all those villagers will be allowed to stay outside. If not, we have to bring them back. Tunge pawisa pe ang ? How to re-settle them ? Pawisa ngai a nia, pawisa pe lo chuan tunge lokal duh ang ? All the people are very poor, the condition is very pathetic, Government has to look this matter urgently. Chu chu sawi ka'n duh a nia, otherwise no problem.

At last, as per my assesement 49 villages will be affected while constructing Indo-Bangladesh Border and about 5970 families will be affected and there will be human hazard. There will be environmental hazard. So all these problem has to be look properly and I also request that compensation against all categories of affected land should be given to the people. With these few words Pu Speaker, thank you.

**PU D. THANGLIANA**

: Pu Speaker, ka lawm e. Hei wawiinniah kan Member zahawm tak Pu Lalchhandama Ralte Resolution, "Border fencing hi

Indo-Bangladesh chauh ni lovin Indo-Myanmar Border pawh fencing ti turin Central Sorkarah nawr ni rawh se" tih a rawn pulut a. Hei hi kan pass ngei turah ka ngai a. Bangladesh border fencing hi chu tunah Central Sorkar ruahmanna angin chak taka hmalak a ni a. Tin, State Sorkar pawh hian theihtawp chhuahin khanga harsatna tawkte tana compensation-te ngai a ni emaw engemawah khan hma a la ve mek a. Mamit District chungah phei chuan compensation hi vaibelchhe thum chuang lai mai tunah hian pek theih turin Deputy Commissioner-te hmalaknain ruahmanna siamfel a ni a. State Sorkar pawhin kan tih tur kan ti zel turah kan ngai a. Tin, engemaw harsatna fencing chungchangah kan tawh tam takte pawh kha kan Sorkar chak tak hian a hria a. Chak takin a chawhreh dan tur leh a solve dan tur kha a dap reng a ni tih kha kan rilruah awm sela thain ka hria a. An harsatna sawi kha a tha love ka ti hauh lova, amaherawhchu, border fencing hi India Sorkar hian hmundangah pawh a lo ti tawh a. Chumi a nih avang chuan zawng chhang tlak niin a hria a. Mizoram, Bangladesh te, Burma te ri tu ramah pawh hian fencing kan tih hian kawng tam taka harsatna kan tawh tur pumpelhna tur kawng niin an ngai a. Chutiang chuan Central Sorkar hian hma a rawn la a ni a. Tah chuan keini hian kan ram chhunga harsatna hrang hrang nichinah kan Member-pui zahawm tak tak ten an sawi tawh a. khangho pumpelhna tur a vaiin kan pumpelh vek ang heng harsatna zawng zawng hi border fencing avang hian kan solve vek ang an ti hauh lova. Amaherawhchu a zualpui erawh chu mumal taka border fencing a niha a kalna tur gate mumal taka a awm hian a zualpui erawh chu pumpelh a ni ang tih kha kan Member hote pawhina an sawi kha a ni a. Chuvang chuan wawiinniah kan Resolution hi Resolution tha tak Central Sorkarin chak lehzuala border fencing hi a rawn tihna tur atana nawrna tur a nih avangin harsatna awm lo turah ka ngai a.

Tin, kan Member-pui zahawm tak tak ten an sawi border fencing a nihah hian a fencing kha border turah kan ngai deuh niin ka hria a. Hei hi a ni lo a ni tih kha kan chian a pawimawhin ka hria a. India Sorkar hian a ram hi inch 1 pawh hi hlauh/chân a phal hauh loh tur a ni a, ngun tak leh nasa taka a ram leilung pawh humhalh thin India Sorkar hian Mizoram chhung Bangladesh nena kan irina te, Burma nena kan irinate, helai hi chu Mizoram a ni bawka engemaw chente hi chu lo hloh mah ila a pawl love tih hi India Sorkar ngaihdan a nih ka ring lova. Chuvang chuan a fencing-na a kha Border a ni lo tih lai a kha kan chian a pawimawhin ka hria a, hlauhthawnawm a awm lem lo. Engemaw chenah harsatna deuh chu a awm mai thei, huan lo ram nghet nei tawhte tan chuan harsatna a awm theih kha a rinawm a, mahse khang pawh kha Sorkarin theih tawpin tan a la zel turah ngai ila. Tin, Burma Border Fencing chungchang hi chak taka nawr hi a tha ka ti khawp mai a. Nichinah Phuldungsei bialtu zahawm tak khan State Sorkarin kan Fund atanga kan tih theih lem loh tur Economic Road angte pawh, Phuldungsei bial patlangin an ram thalaite katlangin kawngpui tha tak tak a thlur sung tawh a ni tih kha arawn sawi a. keini bial Burma border/area ritute kan ni a, keini North Vanlaphai bialahte pawh khian Burma nena kan irina lui Tiauhte khian Balu tha em em mai a tam em em mai a, chumi kan lakchhuah theihna tur atan chuan kan Sorkarin hma a la a, BADP atangin kawngte kan han lai tlang a, duh thu a sam lo em em mai a. Chuvang chuan Burma border fencing-te hi a tha thei ang ber hian ti sela keini Burma ram ri a awmte tan chuan development ropui tak kan thawhna tur niah ka'n ngai a.

Aizawl khawpuite pawhin kan in sakna tur atana Tiau Balu tha kan han neih theihna tur kawng a te kha a kawng lo pawp tawh sate min han chei sak anga, Metal-a min han tih sak phei chuan Mizoram tan Tuichangral tan chauh nilo Mizoram tana sengluh chakawm tak niah ka'n ngai a. Chuvang chuan he Border Fencing hi Zoram hmasawna atan pawh a tha a. Tin, India hian a ram chhunga a ram mite humhalhna tur atan hian hetiang ruahmanna a nei pawh hi a tih awm tak a ni. Vawinniah hian Pu Speaker i veilama thute pawh hian an Pu te'n uluk taka an ngaihtuaha tha nia an hriat hi an thlawp ve mai hi a pawimawhin ka hria a. Pute thuawih lo nih pawh hi tha lo ve deuh mai a nia. Chuvangin helai, keini Sorkar kan kut a ni chiah lo chungin, amaherawhchu, chak lehzualin Central Sorkar pawh hian min tihsak thei ang tih kha a beisei awm a.

Tichuan he kan Resolution tha tak mai hi Law & Order chungchangahte, Mizoramin vawinnia thil hrang hranga harsatna kan tawh ruihlo chungchangah te pawh nasa taka tihkiam a nih theih nante, khawsak phung mumal taka kan ram chhungah kan khawsak theih nante, Burma ram emaw Bangladesh ram a ni emaw kan Mizo hnahthlakte, kan u leh naute nena kan inkalpawhna chungchangah pawh dan ang thlapa mumal taka inkalpawhna tur kawng in hawna tur a ni dawn a. Heng avang hian anni kha kan duh ta lova, kan malmak ta e tihna a awm chuang lova. Kan inlaintnate, inunaunate kha border fencing avang hian a danglam chuang lo a ni tih kha vawinah kan hriat a tha a. Tin, insumdawn tawna turah pawh border fencing anih loh avanga Mizoram thlenga harsatna kan tawh drugs thil tam tak lo lut a awm a ni. Heng hi kawngpui nilo atanga lo lut a ni tlangpui a ni. Chuvangin kawngpuiyah gate mumal tak awmarawn lut chu ni sela

chuan Mizoramina kan buaipui drugs leh thil dang dang a hi a tlem phah ngei dawnin a lang a. Kan insumdawn pawhnaah hian border fencing a nih avanga kan insumdawn pawh tawna turah hian harsatna tawhna tur a awm miah lova, dan ang thlap zawka mumal taka insumdawn pawh tawna tur kawng hawngtu tur kha a ni zawk a ni tih kha vawiinniah hian kan hriat tlan a pawimawh a. Border fencing hi mi thate danna tur a ni lova, misual a ruka Sorkar duh loh zawng thil thalo titute danna tur atana pawimawh tak a ni tih kha kan rilruah awm tel sela. A mi chengte chu keimahni chi leh kuangte, kan u leh nau pawh an ni thei khang kha kan thlauhthla ta e, u leh nau atangin kan satthla ta e tihna a ni lova, kan unaute an ni reng tho dawn. Chhungkhat intlawnna turah pawh dan mumal tak hmanga ka intlawn theihna tur a ni tih kha kan hriat a pawimawh hlein ka hria a.

Chuvang chuan kan Resolution puluttuin a rawn putluh ang tak hian Bangladesh lam chauh ni lovin, Bangladesh lamah chuan harsatna eng eng emaw kan tawk a, kan hria a. Chutiange pawh chu mumal zawka kan tawh lohna tur atan ruahmanna fel tak Central Sorkar pawhin an tih theihna tur atana Burma border pawh hi fencing kan tih ngei hi thil pawimawh tak, kan ram tan pawha thil tha tak, Central Sorkarin kan ram tana thil tha min lo tihsak hi chak lehzuala nawr a nih theih nana keini House hian he Resolution hi harsatna awm lova lungruah taka kan pass tlan theuh theihna turin Pu Lalchhandama Ralte Resolution hi ka rawn thlawp ve a ni e. Pu Speaker, ka lawm e.

#### PU LALDUHOMA

: Pu Speaker, ka lawm e. Vawiinah hian History kan siam dawn niin ka hria a. He Resolution hmang hian kan hnam pawl kan khawih mek a ni tih ka hriat chian em em avangin ka thinlung a na hle a ni. Kan Bible chuan "Leichung zawng zawnga awm turin bul hmunkhat vekin hnamtin mi a siam a, an awmna ramrite pawh a kham sak a" a ti a. He ram hi Pathianin min pek a ni a, kan humhalh tur a ni a, miram kan tibuai tur a ni bawh hek lo. Amaherawhchu, Pathianin min pek ram hi humhalh thei lovin British-in chaknain 1890 atangin min awp a, kan zalenna min chhuhsaka. Divide and Rule Policy hmangin vawiinah hian Zohnahthlakte hi Sorkar pathuma then darhin kan awm a, kan ram tana Khuau'n min pek hi kan luah ho thei lo a ni. Chumi avang chuan party tinin greater Mizoram tiin Zohnahthlak Rorelna pakhat hnuai dah leh kan tum vek a ni lawm ni kha? Chumi avang chuan Cachar lam ramri te pawh hi hmasang atan vawiin thlenga party tinin lungruahala kan pawm tlan chu 1875 Inner Line kha a ni lawm ni? Chutih lai chuan kan hnam kal zel tur ngaihtuah tel hauh lovin he Sorkar bawh hian 2001 March thla khan ramri hung hi lungruah takin a lo pass tawh a. Chutih lai chuan ZNP in M.L.A. kan la nei ve lova, pawnlam atangin a pawl thui tur zia kan lo tlangaupui daih tawh a ni.

Vawiin hian Myanmar nena kan inkar K.M. 404 hung rawtna a lut leh hi a vanduaithlak lutuk a ni. Tiau-ahte khian han hung dawn ila, Burma ram lamah chuan kan hung theih ka ring lo, Mizoram lam luikamah an hung ngei ngei ang. Chuti a nih chuan Chakai leh Chengkawl nen lam

kan pe fai vek dawn a sin. Chu mai chu a ni lo, he ramri an siam lai khan a committee-ah mizote aiawh kan tel lo, kan remtihna pawh an la lo, barh luih ramri a ni a, keini chuan kan pawm ngai lo. ZNP hian tuna ramri hi kan pawm ve ngai lo. Fencing siam a nih vaih chuan chu barh luih ramri chu kan pawmin kan nemnghet tihna a ni dawn a ni.

A thatna te leh a hlawkna tlem tlem an sawite kha, hawh u, i rethei ngam zawk ang u, khang kha i awt lovang u. Tute emaw misual an lo lut ru tihte kha chu administration a chak loh vang mai a ni. Tualchhung mi an ni emaw mikhual an ni emaw pawl a sawi chuan a chungah danin ro a rel mai tur a ni. Kan chingfel mai tur a ni zawk. Heng thil hi chu kan zavaiin kan duh lo vek.

Kan hnam hi kan pumkhat loh hlauvin kan hruaitu hmasa, Mizo Union ten ni 22 April, 1947 ah Memorandum an lo thehlut a. Mizo hnamte chu hengte hi kan ni e tiin, hnam 47 list leh kan luah chin ram tarlangin an thehlut a ni. 1965 ah MNF in chutiang tho chuan Memorandum a thehlut leh a ni, khang hunlaite kha ava ngaihawm ta ve le. Kan luah china Zo hnahtlak chengte chu, 1981 chhiarpuih khan OP. Sharma lekhhabu (S.T. population and Literature, 1991) ziakeh chuan, Mizoram, Manipur leh Tripura-ah hian 607.903 kan ni a, Arakan Hill Tracks-ah hian Brown-a ziakeh, Burma Gezetteer, Arakan Hill Tracks, 1960-ah chuan 1991 chhiarpuih 15800 kan awm a, Chittagong Hill Tracks-ah Sneyd-a ziakeh "Chittagong Hill Tracks, Delhi, 1968-ah chuan 1901-ah 14800 kan awm a. Tin, Burmese way of Socialism, Rangoon, 1968-ah chuan Chin Hills-ah ringawt khian Zo hnahtlak hnam 43 tarlangin, 1967 chhiarpuih khan 339,000 kan awm a ni. Zoro hruaituten UNO Secretary General hnenah 1995-a Memorandum an thehluhah khan, 1991 chhiarpuih Zo hnahtlak nuai 50 vel khawvelah kan awm an ti a ni. Zofaten ramthleng inzawma kan luah chin ram chu, 145600 Sq. KM vel a ni a, chu chu tuna Mizoram kan tih let sarh vela zau a ni. Pu Speaker, Zofate rorelna huangkhat dah tumna thinlung paihthla a, vawiina kan indaidanna tur bang an sawi mawi ta mai hi thinlung a na a, thangtharin min thiam ngailo ang tih hi ka ring khawp a ni.

2003 kumah khan kan Chief Minister hi ZORO khawmpuih khuallian a ni a, chuta a thusawite leh vawiinnia thil thleng hi ava inang ta lo em, zalenna sual a nih lai khan vawiinnia bang lehlama dah an tum atang hian engzatnge hnam Sipaiah khan inpe a, an thisente rawn seng ve le ? A va zahawm ve le ? Chungho chu, kan daidan ang maw ? He Resolution hi MNF party atangin vawi 2 an putluhna a ni ta. Hmanah 2001-ah khan an lo pass tawh a nih kha, kan tel ve hmain.

1976-ah daih tawh khan Mizoram hi Integral Part of India a ni e tiin Mizoram hi ziakeh an lo dah tawh a. Kan ram hruaituten khawvel awm tirh ata vawiinni thleng hian ziakeh meuha hetiana ti hi pakhatmah kan la awm lo MNF chauh lo hi chu. Zoram remna ziakeh a nih khan MNF chuan a Article of Association a tidanglam ang tih a ni, tihdanglam a ni ta reng a, MNF policy pawimawh zual zawng zawng paih sak a ni a, MNF ti-MNF-tu zawng

zawng kha hlehchhum vek a ni tawh. Vawiinah hian MNF hming an la chhawm zelte hi zalenna sualtu ropui tak mai Party hming tihbawrhanna mai a ni tawhin kei chuan ka hria. Hnam hlate pawh kha, vawiinnia kan hotute ngei phuahte. Jail atanga an phuahte kha a va lunglenthlak ta em! Vawiinah hian sa ve tlak leh sa ve thei an nih tawh loh zia hi, mipui hnenah an inpuangzar lek a ni lawm ni ? Chuvang chuan Baal hmaa thingthi ve ngai lo hian kan duh phawt chuan kan la sa thei e. Martar-te hi an zahawm a ni lawm ni ? vawiinniah hian an Thlarauin min thlir ka ring, "For their tommorrow, we give our Today" tihte kha mawi ti taka an lo sawi thin, kan lo sawi thin a ni lawm ni kha ? Vawiinah hian keini ho hian chu kawng chu kan zawh ta lem lo a nih pawhin, thangthartena kan hnam hma an rawn sial kuak zelna tur dal zawnga lochet kher kher hi engemaw a tulna awm le ? Kawng daltu lo siam kher hi engemaw a tulna awm le ? Chuvang chuan tuna kan Ruling party-te hi Mizo Nationalism kalh hian an khawsa nasa lutuk tawh a, Economic-ah pawh chu tho, vai Ar zawrhna hmun tha an pe a, Zo Ar zawrhna a awm lova, vai Sangha zawrhna hmun tha an pe a, Mizo Sangha zawrhna a awm lova, an um darh a, vai thlai zawrhna hmun tha an pe a, Mizo thlai hnah zuartute Police hmangin an sawisa a, Tlawng Luiah ran ang maiin an chhuah a, motor awm lovin an hawn sana, riltam tuihala awm turin hman kum lawkahte khan, he House-ah hian kan aupui a nih kha. Nationalism kan tih hian heng zawng zawng hi a huap tur a ni dawn lawm ni ? Mahni ram thil ngaihsan nachang pawh hre lova, mahni ramri pawh humhalh nachang hre lova, kan chung a rorela min awpbettutena min barh luh ramri pawmpui tura vawiina he thil an han rawt hi, hnam hmangaihtu tih dan a nih hi ka ring thei lo reng reng a ni.

Pathianin kan hnam awm dan tur Zawlnai hmangtein min hrilh ve a. "Mahar, Mahar, Sabatlai, ka rela, ka rel zo tawh, in ram thu chu, tuman an tidanglam tawh lovang" tiin. "Zoram khawpui thar lo lang tur" te pawh tarlangin, "Kan ram chu her tlun mai hian a tum takah chuan a inkhalh lut ta ruau ruau mai a" a ti a nih kha. Kan hnam hi a la ding chhuak dawn a ni tih ring pha lo lek a vawiinnia hetiang thil a lo thleng ta mai hi a pawl em emin ka hria a.

Pu Speaker, keimahni leh keimahni inkara kan inpumkhatnate pawh hi politics avanga chhia a tha thin a nih dan pawh hi tarlan ka duh a. 1991 chhiarpuih khan Mizoramah Hmar hnam hi mi 10,411 an awm a ni. 1961 chhiarpuih chuan 3,118 chauh an awm tawh, an thi fai ta em ni ? an pem fai ta em ni ? ni love, Hmar inti an tlem tak vang a ni. 1981-ah chuan 43,852 an lo ni leh a, an pung hlauh mai a ni. Paihte hi 1901-ah 2870 an awm a, 1961 chhiarpuih Paihte pakhatmah inziak an awm tawh lo. 1981-ah erawh chuan 30959 an lo ni leh daih tawh. Heng zawng zawng hi politics vang a ni. Ralte hi 1901-ah 13827 an ni a, 1981 chhiarpuih chuan 109 chauh an lo ni ta a, Lushei hi 1901 chhiarpuih 36322 an ni a, 1961 leh 1981 chhiarpuih Zoramah Lushei an awm tawh lo. A nomenclature kha 'Mizo' a ni emaw 'Zomi' a ni emaw, 'Zo' a ni emaw, kan buaina a ni lo, chhiarpuih a lan danah chuan 1981 khan 92% in 'Mizo' an inti duh a, Manipur leh Tripura-ah erawh chuan 60% chauhin Mizo tih an la duh a ni tih a lang thei a. A hmingah hian kan buai tur a ni lo. Inpumkhat hi kan duh mai a ni. chu chu kan chhiarpuih hian a lang Chiang em em a, Politics avangin a changin kan inpumkhat a, a changin hnam hrang enin kan inen thin a ni. Manipur-ah Zohnahthlak hnam panga, Naga hnama assmila-te an ni tawh a, a pawl em em a.

Vawiinah hian Naga expansion policy chu a lian em em a ni tih kan hria a. Mite expansionism-a an kal laia keini a intei te zawnga kal hi kan tih tur a ni lovang. Kum 1999 khan Gangte Youth Association chu YMA-ah an rawn inchnunglut a. Gangte Student Association chu MZP ah an rawn inchnung lut bawk a, a lawmawm khawp mai. Khatiang zawnga kan hnam hi kal tur kan nih laia vawiinnia hnam inpumkhatna ngaihtuah thleng lo leh kan hnam future kal zel tur he Zo hnahthlakte kan inzawmkhawm a rorelna pakhat hnuaia kan awmna tur hi India hnuaiah a ni emaw. chulam chu engpawh ni se, rorelna pakhat hnuaia awm kan duh a ni mai, chu chu dodal zawngin engatinge tunah hian Resolution an theh luh le ? A thehluttu M.L.A. zahawm tak hi MZP hruaitu hlui a ni lehngal a. A tih tur a nih ka ring lo a ni

Kum 1892-ah Calcutta-a Fort William-ah British Sorkarin Chin-Lushai Conference a ko va, "Heng hote hi thlahkhat an lo ni reng mai, chhulkhat chhuak an lo ni reng mai, kan thendarh hi a diklo a ni e, rorelna pakhat hnuaiah i dah leh ang u" an lo ti a nih kha. He kan Resolution hi Calcutta-a Chin Lushai Convention Fort William-a mi ang khan boundary hi hung ni rawh se tiin i thlak zawk ang u. Chuti a nih loh chuan vawiinnia Mizoram chhung leh Mizoram pawna Zo hnahthlak awm zawng zawng "Zofa Diasporus" hming hian he Resolution puluttu hi khawngaih takin kan hnam hminga withdraw leh turin ka ngen duh a. A in-withdraw theilo a nih chuan he hnam pawikhawihnaah hian keini ZNP Legislature Group chu kan tel dawn lova, kan chhuak dawn a ni. Ka lawm e.

**PU R. LALZIRLIANA**

: Pu Speaker, ka lawm e. Thui tak sawi tur ka nei lova, vawiinah hian. Hei Tlungvel bialtu zahawm takin Border fencing hi Indo-Bangladesh

chauh ni lovin Indo-Myanmar Border pawh fencing ti turin Central Sorkar-ah nawr ni rawh se, tih a rawn pulut a. Hei hi ama irawma chhuak a nih ka ring lova, a bul vela Pu Thlenga-te ho hian an ziak anga a lo sign ve mai em ni aw ka ti a. Tunhma MZP a an awm lai leh vawiini thlenga a rilru hei a thusawi chhuah atang te hi chuan a tih awm loh tak a tiin ka hria a, a pawl ka ti khawp mai a. Kan State lu ber Chief Minister, he House Leader berina a sawi thin Mizoram chu ralmuang ber State India ramah kan ni ti a a sawi thinte ka han ngaihtuah hian vawiinnia kan Resolution neitupa hianin Mizoram chu Arms smuggler-te kalkawng, ralthuam tawlh rukna a ni tih kha chiang takin a rawn sawi a, kan hria a. Chutiang chuanin a ni hi mi rinawm tak a ni a. Politics hi ram siamthat tak taka hman duh mi niin ka hria a. Chutiang ang MNF M.L.A. te zingah a lo awm te pawh hi a ropui ka ti a. Kan ram a lo hmuh dan thin hi vawiinniah zalen takin a rawn sawi chhuak a. Kan hruaitute kal sual mek khalh ngil leh nana a forum dik takah khatiang thu a han sawi kha ropui hlein ka hria a ni. Chuvangin, lalna leh thuneihna chauh ena Silai leh hel hmanruaa hmang duhtute kan awm a nih chuan inngaihtuah let a tha hlein ka hria a ni he House chhungah hian.

Tichuan, hei a Resolution dangte kan han en a, Mualkhang Gas Bottling Plant chungchang lawmthu sawina tih velte,

Ch. Chhunga te, Ch. Saprawnga te Truck Terminal tih mek lawmthu sawina tih angte, State-ina Bus Terminal an sak lawmthu sawina tih angte a rawn lang nawk mai te hi ngaihtuah chiang mang lova vawiin he Resolution ang deuha tih tlan hi a ni mai awm mange aw ka'n ti deuh a. A thu hi a sep sel deuh thinin ka hria a. Tin, PMGSY hmanga Truckable Road laihna lawmthu sawi tih lek pheih chu Chief Minister Adviser niin ka hria, a titu hi. Helaiyah hian 4 percent pawisa khawntute zing ami kha a ni a. MNF Ministry hnuai Party-in pawisa an lo lakna hnuai a nih avanga he kawnglah lawmthu sawi tih ang reng kha chu a chi loh hrim hrimin ka hria a. Tin, PMGSY hi Mizoram development hnathawhna zawng zawngah corruption lian ber awmna a ni tih nimin lamah keimah ngei pawhin ka sawi tawh a ni Pu Speaker. Hei hi chhui chian a la ngai a ni. Chuvangin, Sorkar neituin Engineer-te corrupt practice tura a tihna scheme/project a ni ti ila, a sual miah lo ang. 4 percent an lak khan hei hi MNF ten an la tih kha Engineer-ten an ziak thieng si lova, hnathawk ang vekin an la a, MB ah khan an khung ta a, bill an siam a ni. Chuvang chuan hei hi kan Sorkar hnathawkte diklo taka kan fuihna a ni tih hi a chiangin ka hria a. Chuvang chuanin, heng thu te nau sep sel te te bakah vawiinnia kan Resolution ngei pawh inhungbik chial kan duhna hian rilruah ngaihtuahna min neih thui tir hle a. Berlin Wall-te a chhut chhiat leh an chak a, a chhut chhiat leh hun chungah mi tam tak an lo boral tawh a, kan hria a. Chhut chhiat pawh kha a harsa a ni. Chutiangin, N.Korea leh S. Korea te pawh vawiinniah hian khatiang ang kha ti lo turin an duh zawk a, khatiang bang an siamte chuan chhungkhat laina thinlung a ti hel a, tahna a thlen a, chhungkhat kum 20 hnuah inhu lehte pawh vawiinniah hian an awm chauh a ni tihte kha chanchinbuah hmanni lawkahte pawh khan kan hmuin kan hria a ni.

Chuvangin, Mizo hnaathlak inpumkhatna kan ngaihtuah mek lai leh party tin ten Greater Mizoram tihte kan ngaihtuah a, he MNF Party ngei pawhin Greater Mizoram tih a lo la vung deuhva, thisen hial lo chhuah, silai hial lo lektu tena vawiinnia an policy an phat ta tih chiang taka rawn lantirna niin a lang a ni. Indo-Myanmar Border hi lo hung phui tlat pawh ni ila, Sorkar dawrawm leh chaklo tan chuan drugs tihte, silai tawlhruk tihte, heng khapna hian hmasawna a neih ka ring chuang lo a ni kei chu.

Nichina kan MLA zahawm takina a han sawi kawngte kha a tha chu ka ti ang reng viau a. Kawng ruka kal zel zel thin ten kawng pakhat nei tawh ila a han tihte kha a tha fuin ka hria a. An rilru tak tak a ni emaw ka hre lo. Tiang ang chuanin tunlai tunhma deuhva ralthuam tawlh rukna a inhnawhni thinte hi Ruling Party mi leh sa Minister tena an hriatpuinaa kaltlang thin ni hian a lang thin a ni. An han mante reng reng hian, a tawpah an man chauh thin a. Chu pawh chu hrem mang lovin an chhuak fo thin tih hi kan hriat dan a ni. Chuvangin ram himna leh ralmuanna chu a chhunga chengte rilru, Sorkar neitute rilruah hian a awm zawk a ni tih hi kan hriat a pawimawh hlein ka hria a. Ka ngaihtuah ber zawk chu Myanmar hi sipai roreina hmun a ni a, Zo hnaathlakte pawhin democracy an lo sualna mek a ni a. Heng ho hi kan dang char anga, Myanmar sipai hote i man tir vek mai ang u tihna ang deuhah te pawh hian ka zu ngai deuh a. Ka ngai runthlak lutuk deuh te pawh a ni mai thei e. Hetiang ai chuan ka duh zawk a chu India laipua kan zu dil dawn a nih rau rau chuan Central Sorkara

kan ngen tura chu hetiang zawk hian ti ila. Burma ram ruak zau pui khi an enkawl seng chuang lo bawk a, chuvangin sipai chakna hmangin min laksak rawh u tiin zu ngen ta ila. Hnam inpumkhatna atan a tha zawk daih lawng maw tihte hi ka ngaihtuah a ni hung phui ai hi chuan. MNF ten zalenna an sual laiin Mizoram mi tam tak min mikhual a, kan hnam tan theihtawp chhuahin, kan hrehawm ang tih hlauvin duhsakna tinrengin min lo mikhual a nih kha he Burma rama awm mizo hnahtlakte hian. Khang zawng zawngte kha kan theihngihlh ta em ni tih hi ngaihtuahnaah a awm deuh a, zau deuha rilru put a tha hlein ka hria a ni. He Resolution hi kan unaute nena insuihkawm lehna lam ni lovin inlakhanna hmanrua, kan rilru tilangtu chauh niin ka hria a, chuvangin Resolution neitu hian khawngaih takin withdraw leh mai sela, tih hi ka ngenna a ni. Ka lawm e.

**PU K. VANLALAUVA**

: Pu Speaker, ka lawm e. Tuna kan Resolution 1-na hi ka thlawp a, he kan House zahawm tak hian lungrual taka kan pass pawh a thain ka hria a.

Thu reng reng hi a lek zawnga lak tum chuanin a lo theih viau vek a. tuna member zahawm tak tak tena an han sawite pawh kha ngaihtuah chiang lo tan chuanin a ni ve thei tho mai a tih a ngaihtuah theih awm e. A nihna takah erawh chuanin a dik hauh lova. He Sorkar hi ngaihtuah chian poh leh mipui tan leh ram tana chhenfakawm a ni tih hi phat rual a ni lova, kawng laihah te, tui hnianghnar pek chungchang thuah te, i vei lama mite thliar hauh lova, an han tih nasat em em dante hi zuk ngaihtuah chuanin a ropui ka ti a. Han en vang vang ila, Pu Speaker, i vei lama mite ban len tawh ziate, an dulte pawh a len tawh zia ngaihtuahin kei pawh i vei lam angah khan kum 5 ka awm tawh a, a rek hian kan rek ngawih ngawih mai kha a ni a, engmah hi kan sawi thei reng reng lo mai kha a ni a. Ram laili deuha awm lo tan pheii chuanin khami hun lai leh tunte hi kan ngaihtuah thin a, heti em ema Sorkar ngilnei, eptu leh ep lotu pawh thliar reng reng lo maia development-a han kal tir hmiah hmiah maite hi, mipuite chuan an hria mawle, tih hi a chiangin ka hria, chu pawh chu zu ngaihtuah vang vang hianin he House-ah hi chuanin a sirah a nilo zawngin kan han kalpui e, ram phatsanna hawi lek lekte pawhin a langin ka hria. Keini aiin an hrechiang em em a ni. Hetiang fencing hi hnam inpumkhatna tichhetu a ni lo, Ramri sawnna a ni lo tih pawh hi an hrechiang em em a. Mahse, hetah mipuiin an lo thliar dawn tih hriain an tichiam chiam a, kha zawng zawng kha kan ram mipuite hi bum theih an ni tawh lo tih hi Pu Speaker, ka sawi duh a ni.

Chuvangin mahni chian loh avanga mipui chiang lo tura ngaihtuahna hman hi tunah hianin kan ram tan a him lo a ni tih hi vawiinah he Resolution kan sawi lai hianin ka sawi tel duh a ni. Ram channa ni sela, he Sorkar hi inch khat pawhin a tawlh ngai lo ang tih ka sawi duh a ni. Ram channa a ni lova, u leh nau inthen darhna lam a ni lo tih a hriat chian avangin he Resolution hi move a ni. Uluk taka ngaihtuah tlana siam a ni. Chuvangin, Pu Speaker, hre fuh ila, record tur kan ziah tur nakinah kan thusawi ziah lo chhuak leh tur hisap ranin Gallery play miah lovin a nihna tak i sawi ang u. Central hianin khatiang kha uluk taka ngaihtuah a, Mizoramah pawh an rawn ti a ni a.



Dik tak chuanin he thilah hianin Mizoram Sorkar hianin kan tel lo, kan thu lo tihna chen tam tak kan neih rualin a thatna tam tak a awm avangin hei hi erawh chu uluk takin enpui zel chi a ni tih erawh chu kan Chiang ve thung. Kan Member-te sawi tam tak kha pawm awm tam tak a awm. Compensation pek chungchang thute muang chang deuhin a tehnaah te, tin, a in la hlei lutuk deuh e, a thenin a nuai tel an dawn laiin sang tel lek lekte an dawng tih kha chu enchian tur kan bawrhsepten uluk takin en rawh se, hei hi chu, Ram hlutna nena teh a nih chuan a inang vek thei lo ang tih chu ka ring. Tin, an thawh chak leh chak loh te, tin, a nih ang takin an thawk em? tih pawh kha enchian tur, chutiang zawng chuan tunah hian ngaihtuahna hman a thain ka hria. Amaherawhchu, a mipui hruai kawi zawnga mipui rilru dawn ang zia zanga hnam inpumkhatna tichhe zawnga ramri emaw tibuaitu tih ang reng zawng chuanin tuman an awih lovang Pu Speaker. A chhan chu, chutiang ni sela Central hian a rawn ti ngai lovang; hmun dang tam takah pawh a tih hi a la inchhir. Chuvangin heng zawng zawngah hian he Sorkarna neitu hian khami hre reng khan thil a ti ve bawk a ni tih kan hriatchian a thain ka hria. Chuvangin tunah pawh hianin Bangladesh border 318 Kms an hung mek hi an zo har tawh lo mai thei, kan ram kan ngaihtuahin kan rilrua lian ber chu sualna hi engtingge kan do ang, khawi lam atangin nge kan do ang, eng hmanrua nge kan hman ang tih hi kan ngaihtuahnaah a lian lo thei lo; khawpui kan ni a, city kan ni a, chhim leh hmar, chhak leh thlang atangin tuten emaw engtin emaw rawn sumdawn nan a hlawk e tiin he Mizoram hi an rawn pan huai huai a ni. Chumi chu Kohran lam pawhin tawngtaina nasa takin an bei, tlawnggai pawl zawng zawng pawhin a bei a, a sawt e, a tha, mahse a kawngka a zauh lutuk chuan a harsa tawh thin a ni. Kha kawngka zau lutuk kha kawngka zim i siam ang aw, heng sual hrang hrang lo tla mek hi a ziaawm deuh anga, kan check thei deuh anga, tihna a ni.

Ram hralhna lam a ni lo, hnam hralhna a ni lo, u leh nau intuithlarna lampang a ni lo, ni dawn se he Sorkar hian a ti ngai lovang, a Chiang ber zing ami niin ka inhria. Chuvangin, kan mipuite, Mizoram mipuite hi chumi zawnga zirtir ka phal lo, kan ram humhimna tur a ni, sual venna tur a ni. Chuvangin, heng thil hi uluk taka ngaihtuaha, chhim leh hmar leh chhak leh thlang thlir chungka kan sawi a tha, chu chu kan ramin min mamawhna a ni. Helai House-a thu zawng zawng min mamawhna a ni, thil tha i sawi ang u, thil thalo pawh i sawichhuak ang u, kha kha a thiang vek he House-ah hianin. Chutah chuan he Sorkar pawhin a tih tur lo hre rawh se, lo zir zel rawh se, vawiinah pawh hianin Member zahawm takte thusawi atang khanin thuneitute leh mawhphurtuten tih tur tam tak an hmuhchhuah ka ring a ni. Chutiang chu a ni vawiina he House-a thu phak tura chunglamin a dahte hi chuan zirtirna dik, zirtirna tha kan sawi fo a ngai a ni.

Chu tak chu a nia he Resolution hian a tum chu ni. Chuvangin sual dona a ni tih ringan kan zavaiin inchhuahsan lovin ban i phar ang u, ka chhuak e tih hi chu a puitling lo tlat. Puitling takin kan tih tur chu kan dingchar ngam tur a ni. Hneh loh pawh hneh loh ngam mai tur. Heng thil tih theihna Pathianin min pek hmanga heng Resolution atana uluk taka ngaihtuah chhuahte hi kan sawi tlang anga, dik ni a kan hriat kan sawi ang. Ban tam vang ringawt ni lova, a dik ti an tam miao chuan a lo tha deuh nge nge thin a, kawng tha chu

zawhtu pawh an tam. Tha viau angin lang mahse, a zawhtu an tam si loh chuan a tlak loh a ni mai. Kawng tha nge nge, zirtirna tha nge nge chu zawhtu pawh an tam thin a ni. Chuvangin, he Resolution hi lungrual takin i pass ang u. Pu Speaker, ka lawm e.

**PU R. KHAWPUITHANGA**

: Pu Speaker, he Resolution puluttu-ina a rawn move-ah khan a move thiamin fiah pawh a fiah a. A informative em em a, ngaihtlak pawh kan ngaihtla

tui viauin ka hria. Sawiho vak lo khan, a dangte pawh hi a tha fu mai a, han pass tlanah a tha a. Tu thehluh pawh ni sela, Central-ina tih a tum lai mek, nawr chakna tur chauh a ni a, Central atanga policy lo awm, Bangladesh lam leh Border hrang hrang amite pawh an lo tih mek lai, tha kan tih vek si khawimawlai an thlen dawna engemaw harsatna lo sawi a kha, remchang engemaw kan zawng emaw ni aw tih mai loh kha chu ngaihtuah thiam a har a. Tichuan, kan sawi anga, a dangah hian kan kal zel anga, vawiini chu kan kal thui deuh dawn a nih hi mawle tih kha ka lo ngaihtuah dan deuh a ni a. Amaherawhchu, hnial lo tura ka ngaihte khan an hnial tlat mai kha chu a maki ka ti a ni. Kan hriat angin Border fencing a hi ram hlauhna a ni chuang lova, a ramri lai takah khan fencing a kal thei chuang lova tih chhan a awm a, kan hre theuh a ni. Tin, kan ram dinhmun kan hria a, tunhma pawha kan buaipui em em thin Western belt-te pawh kha, hemi party election dawna a thun tur kan buaipui nasat ziate kha ka ngaihtuah thin a. Thenkhat border hnaia awm, India lama lo tek chho leh an duh huna thlang lama kal leh mai engemaw zat kha an awm a, khangte kha min vote tura kan duh avanga roll-a kan thun paih leh tur paih loh turte kan hahpui ziate kha a hretu vek kan ni. Chu chu kawng khat ni sela. India Sorkarin Al-gueda-te a hria a, keini tan pawh a hlauhawm tho tho ka ti a, chumi danna atana puitling taka a han ngaihtuah chhuah a ni a. Kan ram tana thil tha a ni a, policy tluantling tha a ni, member ni pha tawh chin tan chuan a support zawnga kal tura ke kan pen kha kan tih tur a ni. Engpawh ni se, khawthlang lam atang hian kan hriat theuh angin, kan ram tana thil thalo tam tak a rawn chhuak chho thin a, helaia India ram laili atangin khawthlangah duh duhin an tlang thla a, khati reng reng kha a ni a. Chuti chu nilo sela pawisa tam tak senga Sorkar laipui hian a tih hi a rinawm loh a ni. Keini ram tan pawh a ni a, a tuartu kan ni a, chuvangin ralthuam tawlh rukte Bangladesh a lo chho leh a hetia a kal theite hi a hlauhawm a ni, a ralmuang lo a ni tihte a sawitute kan ni a. Khami a dan theihna tur kha a ni a, kan ram kha kan hloh dawn chuang lova. Khaw awmnaah chuan KM thum danah an hawng anga, kha kha luh hun leh chhuah hun an siam mai dawn a ni a. BSF te an duty reng ang, a dik ang, kha kha chu. Amaherawhchu, control a lo ngai ve ta a, ram a lo kal zel a, mi leh sa kan lo inchawhpawlh a, foreigner leh goforeigner thliar hran hleih theih lovin kan awm ta a. Identity Card-te pawh siam a lo ngai a, khatiang ang khawvelah kan awm tawh avang khan mihring kan changkang zel a, sual tih dante kan thiam a, Terrorist-te pawh hi nidang aiin an hlauhawm tial tial a. Chuvang chuan chumite tan chuan ram pumpui venhimna atante, State venhim nan te, kan khawpui venhim nante, thinthia kan muthilh theihna atan te, ralmuanga kan awm theihna atante, economic atante pawh a ni anga. Chumi atana inhumhimna tur thil

kan in defence-na tur a ni a. Kan han sawi tak ang khan kan hahpui em em ziate, kan hria a, tunah hian an hung mawlh mawlh a, hung theih a ni tawh lova, a dawt leh hi ti leh ang hmiang kan tih avanga kan tan vakna kha engemaw ni le ? Chhak lamah chuan kan unaute an awm a, kan hria a, kan Mizopuite an ni a, kan ti a. Amaherawhchu, engatinge hmanah khan Y.M.A. te pawh khanin i hnawtchhuak vat ang u tih phutin an lo kal mai a, kan unaute an nih an hai reng reng lo. Amaherawhchu, mimal an rape-a an tlanbo daih a, man chhuah an thei lo, border-ah khan tun thleng hian a ni tho tho. Anmahni leh anmahni pawh an in khawih nawk nawk a, unau an ni tho tho.

Tin, chulovah chuan, thil an rawn zuar a, number 4 te an rawn zuar a, border an cross-a, Champhai lamah an theih loh chuan Thingsai lamah pawh an chho daih thei, khatiang khan sawmi chhimtawpah pawh an ni vek mai a ni. Chu chu a nih avangin sual tihna kawng, thil tha tam tak tihna nimahsela, sual tam tak tihna kawng a ni. Chuvang chuan sual tihna kawng tak tak a awm avangin i control ang u, tihna chauh a ni. Chuvang chuan gate a awm anga, kan lutin kan chhuak anga, kan leilet kan chan dawn chuang lo. Kan ta chu kan ta a ni reng dawn tho, kan unaute kha kan unau an ni reng thei dawn tho tho. Unau kan nihna kha kan pianpui a ni a, bo thei pawh a ni lo, kan inlaintnate pawh kha a bo dawn chuang hek lo. Amaherawhchu, misual, anmahni pawhin an duh thil a kha kan nih avangin helaia border fencing, chhaklama a lo kal tak avanga ping tura ngaihtuahna neih kha a puitling vak lo a ni. Mizoram chiah hi lo inhawng ta sela, helam Manipur, Nagaland an tih hung vek si sela, helai hi lo hawng phiau si sela, awmzia a nei tak tak chuang lo. Chu chu a nih avangin India Sorkar laipuiin puitling taka ngaihtuahna an siam hi kan ram tan a tha a ni. Chuvang chuan hung zel sela. Central-ah pawh kan nawr anga, kan zuk sawi anga, nakin lokal zelah chuan a lo awm mai ang, Berlin wall ang ema sawi theih a ni lo. Kum tam tak an in tlawh thei lo, a bang a lo chim khan kum tam tak an intlawh leh thei chauh a ni. Chutiang ang ni lovin, kan intlawhpawh tho tho a ni. Chu chu a nih avangin engnge kan hlauh viau lem le, sual kawng khat i dang ang tihna chauh kha a nih avangin, hei hi chu khawchhaka kan unaute nen kan in hmuh sualna tur a ni a, hei hi chu kan tlawmngai pawl duty nasat ziate hi tunah hian border zawng zawng hi han hung ta ila. Y.M.A. duty hi chu an hahdam sawt ang. No. 4 lokalte, a thalo lokalte, damdawi diklote hi kan control anga, duty-in pangngai angin, dan angin a lo kal tawh anga, kan intlawh tawn anga, chutiang chu a ni anga, awmze nei lo a kan intlawhtawn hi a tha vak lem lo a ni.

Chuvangin hei hi chu Pu Speaker, kan zavai hian rilru hmunkhat puin i nawr ang u, a thenin duh a, a thenin duh lova tih lampang ni lovin, Central Sorkar hnenah an tum reng pawh ni se tha taka an tih theih nante a tul a, ka hriat loh tam tak ka hria a, ka han sawichhuak a. Chuvangin kan hlawkpui hle tawhin ka hria a, a tawpah hian lungrual takin hei hi pass thei ila a lawmawm hlein ka ring a, ka han ngen bawk a ni. Ka lawm e.

**SPEAKER** : Kan hun hi adjust a ngai a, kan Opposition Group lian ber hotuin a sawi duh em ? Sorkar lam.....ngawi rawh u..... khati zat zat chu a theih tawh lovanga, englovin i ti teh ang. Pu Andrew hi a pharna a rei tawh a, sawm ila, chumi zawhah chuan Opposition Group Leader kan sawm anga, tichuan, Sorkar lam ngaihdan sawi turin Home Minister sawi turin sawm ila, House Leader sawm ila, tichuanin, tin i tum tawh mai ang u, chutilo chu dar 4 kan pel ange.

**PU ANDREW LALHERLIANA** : Pu Speaker, ka lawm e. Hei vawiinnia kan Member zahawm tak Pu Lalchhandama Ralte Resolution hi hei amah hi mithar a ni a, a zahawm tehluul nen, a Resolution rawn putluh erawh chi chu ka support thei dawn lo a ni. Border Fencing hi Indo-Bangladesh chauh ni lovin Indo-Myanmar Border pawh fencing ti turin Central Sorkarah nawr ni rawh se a rawn tihah hian Border Fencing tih hi Ramri hung tihna a ni a, Ramri tih lai Nomenclature tihlai takah hian kan inanlohna a lo chhuak ta niin ka hria a. Khilai khi keiniin Border-ah kan ngai lo, kan ZNP constitution-ah chuan Zohnahthlak inzawmkhawm hi kan thupui ber No. 1 a la nih tlat avangin. Khilai khi kan Border-ah kan ngailo phawt a ni. Chin Hills-a kan unau zawng zawngte nena Ram khat kan nihzia a la lan theihna tura kan la inzawmkhawm hi kan duhna a nih avangin vawiinniah hian kan inkarah hian Border recognise ve tur kan neilo a ni keini chuan. Fencing satliah in sawi a nih chuan thudang a ni. Border Fencing hi kan pawm theilo keini chuan, kha kha kan danglamna a ni. Ramri kan pawm a inanglo, chutah chuan, kan MNF unaute pawh hian inngaihtuah chian chuan induhlo tih ka hria, Chiang takin, in party danah pawh a awm ve tho. Amaherawhchu, tun kum 10 leh tih chhung lek hian in duh loh hi in ti hnem lutuk tawh avangin hei pawh hi duh anga awm mai mai angin in lang mai a ni. Kan Ram Sorkarna kalphungah pawh hianin en chiah rawh u, in duh loh in tih hnem tawh zia hi Right to Information dan siam in duh lova, Central-in a rawn passed avangin hmang lo thei lovah min siam a, in duh chawp a ni. Fiscal reform, Fiscal responsibility & Budget management bill kan pulut a, in duh lova, amaherawhchu, Twelve Finance Commission leh Central Sorkarin siam lo thei lovin an siam che u a.

Pu Sepaker, kan siam in duh lova, amaherawhchu Twelve Finance Commission-te leh Central atangin siam lo thei lovah an rawn siam che u a, in siam ve ta mai chauh a nih kha. Municipality bill pawh hi in duh hlei nem, in duh zawk chu Aizawl Development Authority kha a lawm, kha Aizawl Development Authority a kha en chiah rawh u, Municipality dan aiawh tura siam a nih kha. Amaherawhchu, in duh lova, in duh lo chungin JNNURM pawisa in hmuh theih dawn tak loh avangin Municipality bill siam chuk chuka pass a emergency meeting siam pawh in duh hial a nih kha. Vawiinni pawh hian in inngaihtuah chian chuan in duh lo ang. Amaherawhchu, kan Home Minister khan Session hmasa khan Chiang takin a sawi. Hei hi Central Sorkarin min rawn lova, a

nih danah pawh hian min rawn hek lo a nih kha Session hmasa khan kan sawi kha, in duh loh barhluih a nih a, duh awm taka langin nawr chak ang u inti mai mai a ni. Hnam rilru pu dik tak hian hetiang hi a duh theih loh, hei hi chu kan chiang. Chuvang chuan he ramri lem, engtik niah emaw Pathian khawngaihna a zarah kan la thiat ang kan tih hi vawiinni hian hawh u Border fencing i siam ang u tia accept leh lo recognised zawnga hmalak hi Mizo dik tak tan tih chi a nilo reng reng. Chuvangin in duh loh hi ka ring tlat in thinlungah chuan, in ngaihtuah chiang rawh u, kan unaute khawchhak lampang atang hian chhia zawng zawng lokal a ni bik lo, thil tha pawh a rawn kal ve tho. Thil chhia lokal a chu hetah Law & Order machinery tha tak nei hi dik takin hmang ila, kan che thei ang. Tih tak emah chuan Sorkar hian tha puiin Drug-te pawh hi chhui tum ang hmiang, theih tawpin hma la ang hmiang. Hengte pawh hi kan um tawm ang, kan Y.M.A. ngei pawhin theihtawp a beih lai khan an tawm tawk tawk mai a nih kha. Y.M.A. leta tha nei leh sum nei kha Sorkar a sin ! Chu chu a nia a dinhmun zawk chu mawle. Y.M.A. ang lek pawhin an nawr tawm theih chuan Sorkar thapui chuan a thei reng, chiang takin.

Mizo hi drug-a kan tih hmemna ber hi enge ni le, Proxyvon a ni, khawi atanga lokal nge ? Silchar phailam atanga lo kal asin. Chuvangin thil chhia khilam atangin a lokal a, kan duhlo tlang a ni. Hawh u, lokal thei tawh miahlo turin i fencing ang u tih kher a ngai hlei nem. Thil tha tam tak pawh a lokal a sin, ka hriat sual loh chuan independence thleng pawh khan khilai border anga kan neih a khi hnam khat kan nih zia tihlan nan inkalpawh theihin i siam ang u, tiin khilai border an siam atanga 40 miles ve ve hi heng hnam ve vete hian an cross thei lo ang tih dan kha a awm a sin. Independence hnu pawn kha dan kha kan nei. Unau kan nih zia kha kha danah khan tihlan a ni. Chuvang chuan inhung hran a ngailo, hetiang zawnga sawi hi a thalo reng reng a ni. Zute pawh hi khawi atanga lokal nge kan hria chiang lutukin Silchar lam atanga lokal a tam ber. Thil tha tam tak khawchhak lam atangin a lokal, kan music-te pawh hi engngatinge hma kan sawn em em kan tih chuan khawchhak kan unaute music thiam an rawn chhuk thlak avanga Mizoram pawh music a sang kan ni chhut chiah mah rawh u. Chuvang chuanin hei hi kan pawmlo hulhual a ni, he inhung hran a hi. Mizo hnahtlak inzawmkhawm hi engtikniah emaw chuan a la hlawhtling anga, khatiang kan beih hun theih laiah khan hmanlaiin keini chuan border hi kan lo pawm tawh a, chuvangin khawchhak lampang chu hnamdang in ni kan ti dawn em ni ? A theih loh, chuvang chuan he Resolution hi withdraw leh hram selangin, kan withdraw theilo a nih chuan sawi tawh ang khan keini chu a pass-naah kan tel theilo tih kan hotupain a sawi kha a la ding reng a ni.

Chuvang chuan helai India ram rorelna, helai a hmuna kan awm hian kan duh loh tam tak min rawn force a awm anga. under protest in kan lo tolerate a nih pawhin kan lo tolerate mai tur a ni. Border fencing-te pawh hi khilam kan unauten an rawn tilui a nih pawhin lo phurpui chung chi a ni reng reng lo, tihngaihna kan hrelo a nih pawhin lo dawh mai mai rawh u, kha kha a dik zawk. A chak zawk awm tak leh khatianga lo awm kha a diklo. Kan ram hi chhut chiang rawh u. Rihdil khi Mizoram dilah a lian ber a ni tih hi vawiini thleng hian a la dik a ni. Khawiah nge a awm ? Khilam pang side-ah a ni, mahse kan ram a ni. Mizo hnahtlak inzawmkhawmna leh kan thinlung inunauna then

tur zawnga a lai laklawha border kan recognise angreng chi reng reng tur hi chu pawm miah lo ang u tih vawiini hian ka sawi duh a ni.

Chuvang chuan kan ngaihtuahna i hmang let teh ang u, inhung zawngin a hrim hrimah hnam hi a him ngailo. Naga-te pawh sawi tawh ang khan an inzauh nasa lutuk a ni. Chiru, Kawm Mizo hnahtlak ngeite pawh hi an rawn chim tawh tunah hian Maring te nen pawh. Keini hian kan chhehvel hnamte hi unaua siama chim chhoh a Mizo hnam tihlen zawng hi kan kal dan tur a ni dawn lawm ni ? Khing kan unau Naga intite pawh khi engtinge kan tih Mizo theih ang, kan inkarah hian border fencing hi rawn ti dawn ta se kan pawm angem ? kan pawm tur a nilo. Chuvang chuan Mizo hnam hi a nih tur ang taka a parchhuah theihna tur hian inhunga inven tit tet a nilo. Kan parchhuak anga, a theih angin kan intilian anga, kan chhehvela ram leh hnamte ngei pawh la zawkin leh intilian zawkin he Mizo hnam hi parchhuak tur a ni.

Naga-te hi kan let an ni tawh a sin, 1971 chhiarpui kha en rawh u, keini aiin tlemin an tam chauh a sin. Engatinge vawiinniah hian kan let aia tam an nih tak ? Naga nih chakin an chhehvel ami an siam a ni. Keini chu inhung chi hlirin kan khawsak avangin kan inti te tel telh a, Mizo kan tih chin pawh hi a te tawh lutuk tunah hian. Chuvangin khatiang lampang rilru reng reng rawn ti zeltu hi kan border fencing-te pawh hi instrument lian tak a nih ka ring a ni. Chuvang chuan kan Mizo hnahtlak inkara ramri siam chawp ang chi reng reng a bik takin inpawh tawna tur tichhe chi reng reng ang hi chu hawh u i do vek ang u. Chuvang chuan hei hi khawngaih takin member zahawm tak hian withdraw leh hram rawh se. Ka lawm e.

**PU LAL THANHAWLA**

: Pu Speaker, in sawi zo sauh sauh a, in silfai daih mai a, a Resolution taka zuk chen hmian nichinah khan an sawi tawh a. Hmanniah khan

Governor's Address motion a move khan hemi Resolution neitu Member zahawm tak Pu Lalchandama Ralte hi a maiden speech-a motion a rawn move-te kha ti tha ka ti khawp mai a, ka tawng a huat thu suhah a la junior vei nen. Tin, hei vawiinah tukina i sawi tawh ang khan Pu Speaker, a tluang dawn a niin ka ring a, duhsak awm hlein ka hria. Resolution tam tak zingah a ni ta Ballot-a lo chhuak nawlh maite hi thil tluang, duhawm tak a nih ka ring a, chuvangin he House tizahawmtu leh tluang taka a hun a hman chhoh zel keipawhin ka duhsak a ni. A Resolution-a hi Pu Speaker, Central Sorkar policy-a ni a, kan hre vek a. Tin, a bulthum hre lo mah ilangin a chhan pawimawh berah chuan hemi insurgent (hel) kan tih mai Bangladesh-ah khuan tam tak hi an trained a, chi hrang hrang ho hi tin, Burma lamah Burma Sorkarte a lo chak vak lo a, anmahni ram chhunga helte leh keimahni ram chhunga helte a bik takin Naga ram lamah te inkalpawh a, khatiang vel avang khan Border Fencing hi an ti a ni a. A Border tak a hi keinin kan lo recognised leh recognised loh lam pang ai mah mahin kha a thatna kan hotuten an sawi tawh a, sawi nawn pawh

a ngai lova. Tin, a that lohna lampang pawh kha a dik ve tho mai a Pu Speaker, chuvangin tuna pawimawh ta zawk a chu hemi Border fencing avanga thatna tam tak a awm laiin leh thalo tam tak a awm a, chuvangin a pawimawh zawk a chu kan Sorkar hian a ngaihtah loh a, a Central Sorkar leh a Contractor-te pawhin an duh duha helaiah hma an rawn lak a, an rawn tal loh hi a tha ber niin a lang ta a. Entirnan, khawthlang lamah Bangladesh Border an fence mek tih kan hria a. Chuta harsatna a bial neitu Member zahawm tak tak ten an rawn sawi kha kei ka zuk chik ve lo nain a dikin ka pawm nghal mai a. Tunah hian kan ram tam tak hi chan hlek lo mah ila a luahlumtu mekte chuan an chan a ni tih kha pawm mai ila a dikin ka hria a. Chuvangin khang kar khua leh tuite an ram ngawih ngawih chantute hamthatna tur, zangkhaina tur kha kan ngaihtuahpui a ngai pawt mai a ni.

Tin, BSF-te a hel veng tur ten an awm a, Border-ah a tha khawp mai. Amaherawhchu, an veng tak tak lo a ni tih hi chu Mizo ho hi chuan kan hre vekin ka ring a, tin, an petroling-ah silai an putin hel rual an hmuh chuan veilamah an pu mai a, tha takin inpel ang u an tihna a ni tih hi kan hre vekin ka ring a, zep thu a awm lova. Tin, an dang tehchiam lo a ni ang tih a lanna chu. Phaileng leh a chheh velah khuan Naga hel tam tak an awm a, a takin kan Police-te pawhin an man tih kan hria a. Chuvangin, a pawimawh ber zawk chu he fencing an tihnaah hian Central Sorkar leh a contractor leh hnathawktute hi an duh duhin rawn tal lo sela tih hi a pawimawh ber a. Chu chu kan Sorkarin a hma tur niin ka ring a.

Tin, nichina in an thiahsak tur silai a keng a, ka in inthiah chuan ka kap dawn che u a ni a tihte kha, Zopa tan chuan tihawm reng a ni. Compensation-a thenawmte ram an laksakte, an hung sak ten compensation pakhatmah an la pe si lova, chuvangin, ka tawng an huatthu suhah kan Sorkar hian thui tak mawh a phur zawkin ka hria. A chhan tam tak kan hria a, kawng tha tam tak kan neih phah a, a thlur diah duah a, mahse chutah chuan zalen taka kan kal theih chuan siloh chuan kan M.L.A. zahawm takte pawh silai nen BSF ten an duh hun hunah rambuai thim chhah lai anga, check lohna gate-ah pawh an lo check thei a nih chuan kan ram tan chuan a tha vaklo tihna a va ni mai awm ve. Chuvangin he fencing hi kan dang theilo a nih chuan kan Sorkar zawk hian kan ram kan chan lohna turin, ram mipuiten an tawrh lohna turin an freedom of movement-te an right tam tak kha zalen taka an hman zui theihna turin Sorkar zawk hian hma a lak tur tam tak a awm a ni. Tin, a reng reng thua engahnge kan ram zel hi kan chan bik ang le, Bangladesh ramin an chan, kan va lak puk ve, kan member zahawm tak tak a hmuna hria ten an sawi ang khan ka hre miah lova. Kan ram kan chan lampang zawk kha a ni a. Bangladesh lampangte pawh chu an va hung belh zawk loh le, a contractor-te leh Central Sorkarte hian tih pawh kha ka rilruah a lang a ni. Chuvangin, a kal zel dawn a nih chuan kan Sorkar zawk hian tun aiin tan la deuh selangin. Central-ah pawh an nawm an makin an rawn ti a, kan mipuite pawhin nasa takin an tuar titein zuk ti selangin. Mamit Deputy Commissioner-in District Collector-in Compensation tur assessment-te an siam a, an hmu dawn a nih chuan District danga Deputy Commissioner-te pawh hian engatinge kan Sorkar hian an compensation rang taka an hmuh theihna turin an ngaihtuahpui loh le tiin ka ngaihtuah a. Tin, LSC leh LSC loh lampang ni lovin, anmahni ram anga an lo luah tawh kum 10 lai

a nih tawh phei chuan Forest Area-ah ngat phei chuan anmahni ta anga ngaih tur a ni tihte pawh dan a awm ve thova. Chuvangin LSC leh V/C pass emaw thliar lovin, an tuar a ni tih kha kan Sorkar hian pawm selangin kan Sorkar sum leh paia compensation pek tur a nih loh ngat phei chuan khalaiah khan zuk ren pui vak tur awm pawhin ka hre lova. Tin, a tuar a te kha kan tuarpui a ni tih hriain an right, an hmuh tur a kha an dawng tur a ni tih kha an ngaihtuah berah nei selangin a tha berin ka ring a. Tin, a hungnaah khan kan ram kan ch n hnem lo dawn pawh niselangin kan zalenna kan han hlauh ta phawt a, kan duh hun hunah kan kal thei tawh lova, chuti a nih chuan kan ch n ti tih chu a ni der tawh a ni. Chuvangin helai pawh hi enfiah a tul a ni. Tin, a hungnaah pawh kan mipuitena lo neihna leh an eizawna kawnga harsatna an tawh a, bial neitute pawhina zalen taka an bial an fang thei tawh dawn lo a nih chuan chulaiah chuan kan chep der tawh a ni, keimahni ram chhungah. Chuvangin chung zawng zawngah chuan kan zalenna tur leh kan fihlimna tur kan ngaihtuah hi kan mawh a ni tih hi kan Sorkar pawh hian hria se, chutiang chuan hma la se tih hi ka duh a ni.

Tin, khawchhak lam pawh an hung dawn tih a hriat sa reng a, Government of India policy a ni a, hmalak mek a ni. Manipur-ah pawh an hung mek a ni tih kan hriat kan lo han nawr ve ringawt kha a tha em aw ! tih te, a tul em ? tih te ka ngaihtuah a. Tin, Zo hnahthlakte insuihkhawmna turah khan, chu chu British Government pawh khan a hriat avangin 25 miles on either side of the border hi no man's land kha an lo puang tawh a ni. Chu chu vawiin thlengin a awm a, hemi zalen taka u leh nau thisen zawmpuite kan inkalpawhna tur a kha he fencing hian thui tak chu a dal dawn a, hemi Western border-ah tunah an ti tawh a, an ti leh ngai a nih phei chuan kan free movement kha curtail dawn chiang khawp mai, a tisukuk dawn chiang khawp mai. Chuvangin kan dang zo lo a nih pawhin hmanhmawh tura nawr hi engemaw a tulna le ? tih kan hotute, a hrechiang tuten an sawi atang khan ngaihtuahna min neih tir a, kan ZNP Members zahawm tak tena an sawi ang khan hnam ang pawh hian kan chep sawt khawp mai. Tin, he House-ah hian sawi tur a nih leh nih loh kan hre lova, mahse, Mizo tena kan hriat a tulin ka ring a. Kan ram hi a zim sawt viau a ni. Mizoram hi a zim sawt khawp mai. Chuvangin Mizoram hi a zim sawt a ni tih hriain ram hruaitute hian helaiah hianin lungrualin Party pawh ti lovin inlunguala kan ram hi a zim sawt a ni tih hi chiang taka kan hriat a, a zauh zawkna turin kan thawh ho hi a ngaiin ka hria. Hei Tripura ramah Pathianin ram min pe a, Mizo hnahthlak dik tak ten an luah a, vawiinah chuan tu tute emaw, helte avangte pawhin an chep sawt hle tawh a ni. Khungte khu engatinge an thlavang kan zuk hauh loh le ? kan hun laiin Kawnpuih theih anga an thlavang hauh turin hel lakahte, Police post kan dah a, tichuan, an market-ah te hmun dang dangah an lut anga, civilian dress-in, mi state a ni a, an duh ang angin an awm thei lova. Amaherawhchu, market place-ah in kal anga, tichuan in silaite in ak lang anga, hlauhawmin in awm tur a ni, kan ti a, nuam an ti em em a, an hlim em em a, khulai Mizote pawhin an lo thlamuanpui ni awm te pawhin kan lo hria a. Chutiang bawkin hei, Manipur lamah chuan, Kuki unaute, Mizo hnahthlak, Hmar, Paihte, sawng ho, Naga leh Ralleng ho leh Meitei ho, an ram luah chin bikah an chep a. Chuvangin helamah expansion an duh a, tiang chuan keimahni Zo hnahthlakte an fuihpawrh a, an inbeih tir a, In leh Lo te an in halsak a, chumi an ram ruak a chu anrawn luah phei zela, tiang chuan, Mizo hnam, Mizo hnahthlak a pawh hi engemaw zat min neih sak tawh a ni.



Dik tak chuan, Thangkhul unaute pawh saw, Ralleng ho hian Naga-ah an pawm lo a ni. Tin, tawng thuahte chuan keini ho min hnaih zawk a ni. Mahselangin an ni chu sawi loh, a chi te zawk leh hnam te zawkte tunah hian kan ch n teuh tawh a ni. Chuvangin Zo hnahtlak reng reng hian, helaiiah Mizoram Sorkar tia koh theih an ni a, an mangan nikhua, harsatna an tawh nikhuaah Inpui kan nei alawm, Zoramah nu leh pa kan nei alawm Zoramah tiin helam pang hi an rawn thlir thin. Chumi chu hriain keini pawh hian, kan Sorkar hian Nu leh Pa chan changin Inpui luahtute kan ni tih hriaa hetiang a kan mi leh sate thlabar kha khawiah pawh ni selangin huihaia an inlungualna zawnga an chak theihna tur zawnga kan huihai hi a tulin ka hria a. Political party interest-te chauh ngaihtuah lovin, chumi party in lo din loh chuan, Unit in lo din loh chuan ti lampang ni lovin, Mizo hnahtlakte, kan ram a zim sawt lohna, kan zauh ve zawk theihna tur atana kan ngaihtuah a ngai.

Halflong-ah chuan Hmar te, Kuki te, Lushei te tam tak an awm a, mahselangin Kachari helten engtin tin emaw an fuihpawrh avangin harsatna an tawh a. Chungah pawh chuan Hmar te, Kuki te chu in pui an nihna Zoramah an lo tlan a ni. Chuvangin helai ram Zohnahtlakte Pathianin ram min pek a hi humhalh turin keini inpuia awm zawkte hi kan che tur a ni a. Chuvangin tuna Border Fencing Maynmar-te nena kan Border tih pawh hi Government of India-in an programme kalzelah an rawn huatthu a ni tih an sawi lai leh kan hriat lova hmanhmawh zawk tura tih hi a finthlak angem aw tih ka ngaihtuah a. Kumpinu Sorkar pawhin chutiang chuan u leh nau thisen zawmpui kan ni tih hria a 'No man's Land' min lo puan sak tawh hi keini zawk hian a daidanna chak zawk fencing pal i hung teh ang kan lo tite hi a dik dawn em ni tih min ngaihtuah tir a. Hemi a lan dan ringawta Border Fencing tih hi chu kan zuk oppose pawh a ni hranpa lo, amaherawhchu, khilamah ngat kher kher phei khi chuan chutianga kan hriat phak hma atanga thil awm tawh kha zuk ngaihtuahin hetiang a pal hi hung vat tura zuk nawr kher hi a finthlak dawn em ni tih hi ka ngaihtuah a ni Pu Speaker, ka lawm e.

**PU TAWNLUIA  
MINISTER**

: Pu Speaker, ka lawm e. Hei vawiinnia kan member zahawm tak Pu Lalchandama Ralte Resolution "Border Fencing hi Indo-Bangladesh

chauh ni lovin Indo-Myanmar Border pawh Fencing ti turin Central Sorkarah nawr ni rawh se" tih thu nilengin House-ah kan sawi a, kan ngaihtuahna pawh kan hmang tlang hle niin a lang a. Vawiinniah hian he Resolution thlawp zawng leh thlawp hi a tha a ni tih hi ka han sawi ve duh chu a ni a.

Pu Speaker, tunah hian Mizo hnahtlakte inzawmkhawmna leh chutiang ang kawng zawnga hmalaknaah chuan keini MNF Party hi a sulsutu ni thinin tunah pawh hian kan la kalpui rengah kan la inngai a, mipuiin min hrechiangin ka hria. Tin, Border fencing khawchhak lama siam tuna han duh loh thar thut, Mizo hnahtlak inzawmkhawm tih chhuanlama chhuak tau tate

khan khawthlang lama mite khu kan unaute an ti ve lo em ni ? Chittagong Hill Tract-a kan unaute, Sazep tlangdunga Pang te, sawtah Chhimlam Bawm te, Khiang te, khung kan unaute khu Zo hnahtlak vek an ni. Khawthlang lama Border fencing chungchanga engmah sawi lova, khilam an nih avanga han duh loh hi inthliarhranna (discrimination) nasa tak a ni. Indo-Bangladesh Border Mizoram Sector Fencing hi a tha a ni. Misual leh hel chi hrang hrangte kawng tihpinna a ni a, a tha hle a ni.

A dawt leha chuan, tuna Indo-Bangladesh Border Mizoram chung hung hna kal mek chungchang kha thil hriat fuh loh a awm a ka hriat avangin a awmia House-ah han sawifiah ka duh a ni. Myanmar-ah hian border fencing hi thawh a ni e tih kan sawi khan a thawktute ngei pawh hian min involve lo lutuk kan ti tih a kha wawiinniah pawh hian ka la sawi tho a ni. Tunah chuan Co-operation Committee on Indo-Bangladesh Border Fencing nikum 2006 June thlaah khan Chief Secretary Chairman-na hnuaiyah din a ni tawh a. Chu Committee thuchhuak ang chuan D.C. tinah Land Acquisition dan anga ram lak turin an ti a, Notification an chhuah a. Tichuan D.C. hnuaiyah Committee siamin Lunglei, Mamit District-ah khatiang ang khan tih vek tawh a ni a. Lawngtlaiah hianin KM 27 a thui chauh assessment an la ti a, KM 72 turah khan 21 an ti tawh a ni. Chutah chuan compensation tuna assessed chu cheng vaibelchhe ruk leh nuai 57 leh singthum sanghnih zathum sawmruk pahni a ni. Lunglei District-ah chuan assessment hi April thla a zawh turin target an siam a ni. Pu Speaker chipchiarin kan sawi hman lo anga.

Tin, Mamit District-ah Pu Speaker assessment siam tawh hian Rs. 3,10,11,760/- tih hi assessmebnt siam tawh a ni a. Chutiang ang chuan hna an lo thawk ve mawlh mawlh e tih kha he House-ah hian kan sawi duh a ni a. Tin, LSC nei chu LSC ah pawm a, V/C pass nei chu V/C pass an pawm a, khatiang ang khan assessment tihnaah khan a land, ram leilung hlutna kha an chhut sak a. Chutiang ang chuan thil a kal mek a ni e tih kha kan sawi duh a ni a. Chuvangin kan Opposition Group Leader Pu Hawla'n khatiang Sorkar lamin hei hi la rawn enchiang se an tih a kha kan thawh mawlh mawlh lai a ni a, chu chu wawiinniah hian ka'n sawi duh a ni a. Tin, fencing kalphungah khan, ni e, border tak takah khan a lo harsa a, India ram pumpuiyah fencing tih tura ruahman a ni a. Pakistan nena fencing tih te, Bangladesh nena inrinaah te hian a border tak takah fencing siam a harsa a, tlangramah pheii chuan a lo harsa lehzual a. Chuvangin Mizorama fencing siamah pawh khatiang khan a chung deuh hlekah tih a lo ngai a. Bangladesh Border-ah hi chuan 318 KM hi fencing tur a ni a, fencing hrula kawngpui an laih tur kha 246 KM a ni a. Chutiang ang chuan buatsaihin thawh mek a ni. Tin, hetah hian fencing pawna awmte kha sawn an lo ngai ta a, sawnna hmun turte leh an insawn a tul chuan an in sakna atan pawh pawisa an mamawh a ni tih hi an assessed tel vek a, chu chu Home Ministry-ah thehluh tur a ni a, buatsaih lai mek a ni e tih a kha ka'n sawi duh a ni. Chutiang ang chuan thil a kal ve mek a ni a, hmanah khan kan sawi tawh a, khami zulzui khan Sorkarin fimkhur takin, duhtui takin theihpatawpin keimahni phak chinah chuan kan lo chhuah ve e tih kha hemi Bangladesh nena Border hung chungchang hna kallai a kan sawi chu a ni.

Myanmar leh India ram inrina hi a pumpui chuan KM 1643 a ni a, Mizoram bik nena kan inrina hi KM 404-a thui a ni a. Hemi pawh hi fencing tih ni se, tih hi vawiina kan Resolution-ah hianrawn move a ni a. Keimahni chauh pawh ni lovin India Sorkar pawhin programme kal laiah a nei a, programme kal lai mekah pawh sawirik loh chuan ngaihthah a ni duh khawp mai a. Chuvangin a thatna kawng hrang hrang ngaihtuahin Mizoram Sorkar pawhin Indo-Bangladesh border hung ang bawk hian Indo-Myanmar border pawh hi Mizoram sector-ah hian hung ni rawh se tih hi Central Sorkarah i thlen teh ang, tih hi an hna kallai mek a ni a, zuk sawi kher a ngai em ni ? tih a kha a dik tho mai a. kan tawngtai pawhin Pathianin kan mamawh engkim a hre sa vek a, mahse khami rual khan a hnenah engkim dil turin min ti tlat a ni. Central Sorkarin a thil tum chu kum 10 hnuah nge eng hunah nge a thawh dawn kan hre lova, tun hunah hian hetia kan thlen hi a dik e, tih ngaihdan atangin he Resolution pawh hi a lo lut a ni a. Kan ngaihtlak ang khan khawchhak lam atang khian ruihhlo thil chi hrang hrangte, helna atana hmanrua chi hrang hrangte pawh a lokal thin a ni, tih kan hretlang theuh a. Sorkar chelh tawh phawt chuan heng hi chu kan hai lo a ni. Chutiang chuan dan lovarawn lut rute hi an tam a, sualna chi hrang hrangte pawh a pung a ni. Hel hmanruate pawh a kaltlang em ni ? tih turte pawhin thil a awm a, chung zawng zawng check-na atan chuan border fencing hi a tha e, kan ti a ni a. Ral lehlama kan unaute an lokal kan khap a ni lova, an lokalna kawngpui tur bik i siam teh ang, duh duharawn putru mai lo hian kan ti a ni. In pawh kan sa a, kawngkapui kan hawng a lawm mawle, chutiang chu a ni mai a, kan In pawh kan hung a, fencing kan siam a; kha khan midang lo luh a dal chuang lo. Fencing hian kan unaute an nihna a tibo lo, Berlin Wall pawh Political Will in Politics-in a nawr chim mai a ni. Chu tak chu a ni pawimawh zawk chu.

Chuvangin inzawmkhawm duh tak tak tan chuan he fencing hian a dal lo tih kha a chiang lutuk a ni. Political Will a pawimawh zawk a ni, kan thinlungah chu chu vawiinah hian chiang se ka duh a ni. Chuvangin, Pu Speaker, hemi Myanmar nena kan inrina laia thil thalo chi hrang hrang an duh an maka lo lakthlak theihna tur atana ramhnuai inhawng huau ringawt mai hi chu a tha lo a ni. Hetah Bangladesh lamah kan khar phui dawn bawk si a, khita kawng lo hawn ngawt mai khi chu a ni bik lo a ni. I inhung fel thlap mai zawk ang u, tichuan, kan inkalpawhna kawngpui tur kawngka erawh chu kan hawng anga, Illegal entry, dan lova lo lutte hi kan dang anga, dan angin an lo lut thei tawh zawk dawn a ni. Ramri lehlam atanga lo luhna kan regulate anga, dan angin an lo lutin an haw leh mai zawk dawn alawm, kan unau te, kan nupui fanau te, kan makpa, kan pi kan pute nen pawh kan inkalpawhna kha him takin, ngaihngam takin kan kal thei dawn zawk e tihna ang a ni a. Chuvangin, hei hi a tha em emin ka hria a, Pu Speaker, khawthlang larn kha kan sawi tel bawk si a, khalai thilte kha tawi te a han sawifiah pahin khawchhak lama Myanmar nena kan inrina fencing hi a tha a, he Resolution hi i pass ang u tih kha ka'n sawi duh a ni e, ka lawm e.

**PU ZORAMTHANGA  
CHIEF MINISTER**

: Pu Speaker, ka lawm e. Hei kan Member zahawm tak Pu Lalchhandama

Ralte Resolution Myanmar Border Fencing pawh hi India Sorkar hian chak zawkin rawn ti sela tih a rawn rawtna hi a tul pawh tul tak zetin ka hria a. A lehlamah kawng chi dang a ngaihtuahte pawh awm thei a ni a, a sentimental anga inkaihluhin. Amaherawhchu, chu chu a ni hauh lova, India Sorkarin a tum leh khawvelin tuna buaina tam ber a neih hi chu terrorism leh hemi lokal chho hi a ni a, chumi chu India Sorkar pawhin tunah Bangladesh-ah khuan tuna kan hmunpui, hemi hmunpui India ram rawn tihnaitu a nih avangin hei hi duh duha India rama an rawn putlul lohna turin hung tur a ni tiin policy a nei a. Hetiang hian hna an lo thawk ta a, tihsual palh, a process-ah chuan a tha lo lai leh fello lai pawh tam tak a awm ang. Amaherawhchu, chung zawng zawng chuan mi ramte va sut sak a, an In leh Lote va dislocate, a nilo lai va tihte a ngai a. Kawngin a kal dan remchanglo anga a remchang zawk tur si a tihte pawh a awm ang. Nimahsela, a tum bulpui berah chuan, remna leh muanna a awm theihna tur atan leh awmze neia administration, a tute mah pawhina kal theih nan India Sorkar hian hetiang nasa taka extreme measure ti ila, tih tak taka kan tih loh chuan a Parliament ber a te pawh ti hian min rawn bei a ni tawh si a, tihngaihna a awm lo a ni tiin hetiang hian hma a rawn la a. A tih tur dik tak pawh a ni reng a. Pakistan Border an hungah pawh a hlawk zia leh a thatzia hmuhin Bangladesh border-ah pawh heti hian an rawn ti ta a. Chutiang zel chuan Myanmar lam pawh tih lehna rilru kan nei a. Hei hi an tum ni awm pawhin kan hria a, chu chu kan sawi tlang a ni.

Amaherawhchu, hetah hian an tum tak tak em tiha pawh hi hman deuh atang kha chuan anmahni pawh an inkhap thlu thova, kan la ti zel ang chu an ti a, mahse, hmanhmawhna emaw tih zui thuai tumna emaw pawh hi an nei lutuk lova ni. Keimah pawh hian Home Minister hnenah pawh khuan ka sawipui thin a, 'Ni e, kan ti dawn nia, mamawh ang zelin' an ti a. Tum tho anga insawiin kalpui tak tak mai tum chuang si lo hian an awm thin a. Chuvangin, kei ngei pawhin Home Secretary-te, Prime Minister-te hnenah te pawh lehkha pein, Home Minister pawh ka sawipui a, Bangladesh lam in hung a, hetiangin a inzawm vek si a, Myanmar lam in hung loh chuan, huan chanve hung ang chauh in ni a, huan chanve hung chuan awmzia a nei thei hauh lo a ni, ka ti a. Ne e, hei chu a tha khawp mai kan tih ngei ngei tur a ni, awmzia a neilo a ni an ti reng a. Chuvangin, heta kan House-ah ngei pawh hian hei hi tihhmanhmawh ngai a ni tih a, kan Resolution kan zuk pekthlak hi a tha a, a tul ngei a ni tih kan ngaihdan a nih avangin wawiinah pawh hian lungrual taka hei hi kan pass tlan kha thain ka hria a, chu chu ka'n sawi hmasa duh a.

Tin, a dawt lehah chuan sentimental-a, lehlamah re-unification emaw, thildang emaw a dal a ni. He ramri hi keini chuan kan recognise lo han tih a, House-a han au vek vak a pawh kha a huaisen hmel viau a. Amaherawhchu, khami tura hmalakna lamah khan House-a au vak vak ringawt khan awmzia a nei chuang hauh lo. Kan recognise emaw recognise lo emaw, India Sorkar leh International-ina border tuna a recognise hi kan recognise emaw recognise lo emaw a kal hrim hrim a ni. Chuvangin a fact a kha chu keini pawh kan en a ngai. Keini pawh ramhnuai kan awmlai chuan kan recognise love kan ti a, a regognise lohna period leh inkah lai chuan a kal mai. Nimahsela, international recognised border hi chu tunah chuan border angin a function hrim hrim a ni.

Chuvangin, khawilai veng kilah emaw keinin kan recognise lo ti eng ang mah ila, a kal tho tho, chuvangin awmzia a neilo reng reng. Tin, chuloah chuan tun hunah hian he international border hi kan recognise lo tih hi ram roelna sorkar seat-a sawi chi pawh a nilo. Khawilai political platform-ah te emaw chuan hriat lohah chuan an lo au a nih chuan thuhra a ni. Chuvangin hei hi tuna a sawina tur forum recognition tih lova hi a sawina tur forum pawh a ni lo, a puitlinglo em em a ni. Chuvangin engle khawle khatia lokal kha a ni. Tin, tuna hung kan tihna chhan pawh hi Burma lam tan pawh a thatna tam tak a awm a, keini lam tan a thatna tam tak a awm bawk a ni. Engatinge Myanmar lama kan unaute lokal British hunlai atanga intlawhpawh tura kan tih tunhma zawng zawngin problem kan nei hlei nem, tha kan ti tawn vek a ni. Amaherawhchu, sualna a lo pung ta a, helam a lo changkang a, a lo develop-a khilam a lo rethei a, tichuan Law & Order problem a lo chhukthlate kha mitha tam tak an lo chhukthlak lain misual an lokal tam ta a, crime percentage tam ber kha Myanmar lam atanga a sual lokal ten an commit a nih avangin Myanmar lampang mi zawng zawng pheh hmer loh theih lohvin Zoram mipui kha kan awm ta tlat mai a, chuvangin innawrpui a lo thleng ta hial a ni. Kha kha a thalote an awm avangin regulate a nih loh avangin a thate chhungkhat kan intlawhpawhna tur pawh khan a pheh tuar ta a ni.

#### Chuvangin tunah hetah ramri hrulah

electric hrui pangngai pawh a zawm theih tawh loh, an ru zel a, khatia misualin an ruk zel chuan, pipe a dah theih tawh loh, an ruk zel si chuan thlam bungbel fahran pawh a him tawh loh chuan kan inkar relation kha a titha zawng aiin a tichhe tulh tulh mai a. A tha zawng zawng pawh inrinhlelhna a chhuak vek mai, chu chu fact a ni. Vawiin hian ka rin danin Mizoram mipui hianin vote dawn ila, hetiangha tha taka kan intlawhpawh theih kan duh rual hian hetiangha misualin freedom an neih a, duh duha an tlan theih tha ka ti tih hi Mizoram mipui a tam ber zaa sawmkua chuang hi chuanin he border fencing hi tha kan ti, an tih ka ring, political-a hlawkna tur avangin he border hi keini chuanin kan recognise lo tih a kha chu awmzia a neilo tih kan sawi zo vek tawh. Chuvangin, hemi kan tihna chhan a hi Myanmar lama kan unaute tha taka regulate-a, an lokala sualna tih tumtu erawh kan dan theih nan helam atanga khilamah kal turte sualna tih tumtute pawh dan a nih theih nan regualte a ngai a ni. Chuvangin, regulate-na tur atana border kan fence-a a luhna kawngka leh a chhuahna kawngkaah khan awmze neia kan kalpui loh chuan tuna kan dinhmunah hian, a nih loh leh tuna kan member zahawm tak chhuak ta te khan, hei hi tha kan tilo tiin kan Central Y.M.A. tena heti khawpa an hahna karah hian aupui se support-tu neih kan ring em, a neih ka ring lo reng reng. Chuvangin, tunah chuan hei hi kan kalpui ngei ngei, chak taka kan kalpui a ngai ang. Tichuan, misualina freedom a neih kha political-a inzawmna aiin min then hrangtu vek, misualten keini lam a ni emaw, freedom nei lova kan siam a, a mithate leh pangngaite kan intlawhpawhna tura regulate kha British pawhin tha an ti a, India Sorkar pawhin tha an ti a, Zoram mipui pawhin tha kan ti a ni. Chuvangin, chumi tih theihna tur kan tih border trade kan ti, border trade mai pawh hi a hming pawh hi a nep lutuk e tiin Pu Jairam Ramesh-a te pheh kha chuanin International Trade-ah kan let tur a ni border trade chu a te lutuk, an ti hial tawh a ni a. Khatiangte kha tha taka kan kalpui theihna turin helaiah hian awmze neia kan kal a ngai a ni. Sorkar pahnih inkarah chuan border awm a kha awmze neia kan kalpui loh chuan Kohhranah pawh

danin min phuar a ngai a, Sorkar hran inkar phei chu a tul lehzual a ni. Tunah pawh hian tha kati a, ka rindandin NGO te pawhin tha an tih ka ring a ni. Hemi hi an tih hian thil tam tak misual chetna turah hei hian thui tak a veng dawn a ni. Hei hi chu kan kalpui tlan hi Central policy a ni bawka, a thain ka hria a ni. Chuvangin i pass tlang ang u. Ka lawm e.

**PU LALCHHANDAMA RALTE** : Pu Speaker, ka lawm e. Vawiinniah ka Resolution putluh Border fencing hi Indo-Bangladesh chauh ni lovin Indo-Myanmar pawh fencing ti turin

Central Sorkarah nawr ni rawh se tih sawi hona kan nei tha tlang a, Member 14 velin kan sawi a, kan sawihona kan ngaihlak khan lawmte an awm laiin thenkhatin kan ram a kan mamawh mek House-a kan putluh an hre thiam lova, min han chhuahsan erawh hi chu hrehawm ka ti a ni. Pu Speaker, thawm an la hriat phak takin an hriat thiam loh lai kha wind-up-naah han sawi tel duh hram ka nei a. ZNP President, Ratu bialtu zahawm takin a rawn sawi thenkhatah khan hnam pawikhawihna ni dawn anga ngai leh he Resolution neitu pawh hi MZP President ngei ni a hetiang ang thil tih tura ka lo ngaih loh tih ang zawnga a rawn sawi ang khan leh ZNP hian tuna ramri hi kan pawm lo a ni a hanti ngut ngut mai a, kan House Leader-in a sawi ang khan vawiinah hian Mizopa rilru atangin tun ami ang hi tunge pawm, pawm lo, an ni aiin duh thui thui zawkte pawh kan ni mai thei e. Amaherawhchu, vawiinniah force avangte chi hrang hrang tam tak avangin hetiang hian kan lo awm ta anih avangin vawiinia kan him tlanna tura ti kan ni a ni tih kan han sawite kha an ngaithla duh ta lo emaw ni chu aw ka ti a, a pawika ti khawp mai a.

Tin, Mizo hnahtlak hnamte kan pumkhatna tur leh inhung bingna a awm tak avanga kan inunauna leh Zoram hmel thar kan thlirna bo vek tura an ngaih an han sawi a, Chittagong Hill lampang an kalna tur zawng zawng hung a nih lai pawh engmah thawm chhuah silova tun a taka han tithar leh te hianin gallery-ah play an nei em ni chu aw! te kati a, chu chu ngaihtuahna min neih tir a.

Tin, Khawzawl bialtu M.L.A. zahawm tak khanin hnam inhung bik apiangte a him lo, hnam inhung bik hi a tha lo a ni, din chhuah nan a pawika ni a tihah khan ngaihtuah lo chung a sawi em ni aw? kati a, keini ang hnam tlem tanah phei chuan British hun lai atangin Inner Line Permit-te kan hnam inhung bing assimilate kan nih lohna turin ILP te min siam mek laia hetiang ang hnam inhung bing let let a tha lo han tihte kha a pawiin ka hria. Trading regulation-te pawh an duh tha ve viau khan ka hre thin a, an sawi sualah ka ngai a, an chhuak hma deuhte pawh a ni mahna tiin Pu Speaker, an chhuak ta si a, an lo hriat phak takin ka sawi hmasa a ni.

Tin, Pu Speaker, kan han sawihona hrang hrangah khan, kan unaute, Buarpui bialtu te, Tlabung bialtu ten an rawn sawi rik ang khan Indo-Bangladesh border-te tunah harsatna tam tak kan neih laia Myanmar

lampang han tihte chule, an ti a, he House hian khulai harsatnate chingfel se a tha zawk lawm ni ? tia a rawt kha an ngaihtuah chhuak tha hlein ka hria a. He House-ah Resolution kan thehluh tawh hnuah a hrulah an ti thar a, an bial mipui tan harsatna sawichhuahna remchang erawhchu ka lawmpui a. Mahse, an harsatna kha Resolution-ah tilutin vanneiah pawh tang mai thei an nih laia ti mang si lova, helajia an ti mai kha chu ngaihtuahna a ti thui a. Tin, a chi dang dangah Member dangte Ngopa bialtu Pu Rohluna sawiah khan hnam inthen, unau, chi leh kuang, lehlam lehlama awm, in hmu lo vang vang tura ngaihtuahna hmanga an khawhar lawkte pawh kha kan inhrihfhiah viau tawhin ka hria a. 3 Kms dan velah kawngkapui hawn a, legalised a inkalpawh theihna tur a nih zia kan sawi atang khan a ngaihtuahnaah khatieng tak kha chuan khawharin a ngaihtuah lo turah ka ngai a.

Tin, Suangpuilawn bialtu kan MLA zahawm takin zalen taka chet vel te hi a tha a ni a ti erawh kha chu ka rilru a tibuai a. Tukina point hrang hrang hung a thatna kan sawiah khan smuggling thilte emaw, amunision leh ralthuam thil tam tak zalen lutuka a kal tih chungchante kan sawiah khan khangte kha a ngaithla hman lo a ni mai thei a. Zalenna a la mamawh deuh khan ka ngaihtuahna a ti thui viau a, chumi piah lamah chuan kan motion hi Central Sorkarin tuna policy-a Home Ministry a nih mek a ni a. Pu Speaker, i dinglama miten kan phurpui viau hi chuan Central Sorkar..... Sorkar neitu inti lehzuai, i veilam amite phei hi chuanin kan pute policy a ni e ti a phur taka min thlawp kha kan ring viau a, mahse, khawilai kil kil emaw an sawi a, ka ngaihtuahna tukin zinga an sawi laiah chuan Parliament-ahte tun dinhmunah an aiawhin U.P.A. policy-te zamnaah an thu si lova, khulam policy sawi theihna forum Mizoram Legislative Assembly-ah chuan an pute thu hnial zawng lo hianin thlawp zawngin an kal ang ka tih lain kan hrechiang lo deuh a ni mai thei a. Mahse, min tihlim thung erawh chu an Group Leader, Serchhip bialtuin a sawi takah khan border fencing hrim hrim hi an object lo, mahse ngaihtuah tur a ti tam hle a, thil tha tam tak a awm rualin tha lo pawh a awm thei a ni. Sorkarin chak zawkin ngaihtuahna kalpui se tih erawh kha chuan an nauten an sawi kha chu a khaikhawm thain ka hria a, a lawmawm viauin, a pawng a puin he Resolution hi an dodal lo a ni tih ka hmuh avangin lawmawm ka ti a, lawmthu kan sawi duh bawk a ni.

Tin, Pu Speaker, a tawpna atanah kan sawi nawn leh duh chu tukin zingah khan ka tarlang nual tawh a, he Border fencing tih a tul a ni kan tihna point hrang hrangah khan kan Ram kan Hnam kal zel tur atanah tun chinah hian Drug avangte tin, ruihhlo chi dang dang avangte, silai leh ralthuam tam tak che vel thei thin angah te suahsualna thil tam tak hi khilam atang hian a lokal a, a zawng zawng a ni e ka ti miah lo. Pu Speaker, chutih laiah chuan inhunga tu tute emaw zalen taka an chet ai hi chuan mumal taka enkawlina hnuai atanga helajiah hian helai inkalpawhna hi siam a nih chuan kan Ram kan Hnam kalzelna atan a him anga tiha ngaihtuahna kan neihte tin, waviinnia kan society-ah social problem kan neiht mek kan YMA te ngei pawhin zankhaw taireka inchhung lum pawh luah hman lova ruihhlo an buaipui mekte kan fate kan thalaipuite nasa taka hemi avanga an kaihnawih lai leh kan ram inngahna tur mi tam tak ten chhiatna lam an hawia Ram kan hum mek lai hian he thil hi a damdawi pakhat a ni tih kan pawm tlan hi a tha tak zet zet in ka hria a ni. Pu Speaker, sawi tur ka ngah viau

nain hunte a rei lutuk lohna turin he House zahawm tak hian ka Resolution rawn putluh "Border fencing hi Indo-Bangladesh chauh ni lovin Indo-Myanmar Border pawh fencing ti turin Central Sorkarah nawr ni rawh se" ti a, ka rawn putluh hi he House zahawm tak hian min pass-pui turin ka han sawm a ni e.

**SPEAKER**

: Awle, Resolution neituin rawn sawifiahin adopt a rawn dil a, kan buk mai anga. He Resolution adopt remti apiangin remti ti rawh ule.

Remti lo kan awm chua remti lo ti rawh ule. A intiat lo deuhin ka hria a, ban phar kher ngai lovin remti tih kha an tam deuh zawkah i ngai mai ang aw. Awle, Pu Lalchhandama Ralte Resolution "Border Fencing hi Indo-Bangladesh chauh ni lovin, Indo-Myanmar Border pawh fencing ti turin Central Sorkarah nawr ni rawh se" tih chu House-in a adopt a ni.

Tikhan, vawiina kan business kan zo ta a, kan chawl thei anga, March 19, 2007 Thawhtanni zing dar 10:30 A.M. ah kan thukhawm leh dawn nia.

Sitting is adjourned. 4:10 P.M.